


922 1



422 1.

271

XXXIV

B

8/2

8.2



# AUCTORITATE ROMANI PONTIFICIS

## DISSERTATIO BIPARTITA.

Prima Parte, infallibilitatem Pontifici  
perperam tribui ostenditur.

Secunda Parte, ex opere posthumo  
viri celeberrimi ANTONII ARNAL-  
DI, Concilii generalis in Pontificem  
potestas asseritur.

OCCASIONE

*Epistolarum Pastoralium & Libellorum aliquot  
nuper in Belgio editorum.*



M. DCCXIX



# EPISTOLA

## AD

# AMICUM

*Præfationis loco.*

**Q**UOD multorum, & rudiorum præsertim, nuperis diffidiis exortis conturbatos animos scribis, Theodore suavissime, nec novum nec mirum mihi visum est. Quid enim aliter fieri potest, ubi hinc debita Apostolorum Successoribus reverentia, illinc justitia & veritas animos in diversa distrahunt? Et, quod omnium tristissimum, ubi altera saltem pars feralem schismatis tubam toties inflat: quasi dulce illis sit ab eis qui in Christo fratres hactenus fuerunt, segregari. Post funestas illas Pontificis *Literas*, nil nisi schisma spirant & inclamant *Epistolæ Pastorales* quædam, & miserabiles aliquot libelli nuper in his regionibus sparsi. Atque hanc tam lugubrem Tragediam exordiuntur vix alio nixi fundamento quàm



infallibilitate Pontificis , hoc est opinione incerta, & de qua hæcenus pars utraque consenserat posse salva unitate catholica utrumvis credi. Nam quod aiunt de universæ Ecclesiæ consensu circa doctrinas à Pontifice damnatas, præterquam quod manifestissimæ vanitatis sit, sic illud dicunt, ut satis appareat non eâ re maximè, sed Pontificia infallibilitate se niti.

Eâ de causa non potui tibi illud quod postulas denegare , ut aliquid nempè conscriberem quo planum fieret iis qui sincero animo veritatem exquirunt, quàm fragile sit omne Moliniani hujus ædificii fundamentum , ipsa nimirum opinio de Pontifice falli nescio. Quamquam enim sentiebam majoribus viribus opus esse ad rem illam pro sua gravitate pertractandam, cùm tamen isti operi neminem hæcenus manum admovere audirem, illud saltem existimabam post clarorum virorum egregios labores à me præstari posse, ut specimen aliquod perpetuæ Traditionis super hac controversia exhiberem, quod & sufficeret rei veritati demonstrandæ, simulque melioribus ingeniis amplam in hac messe segetem relinqueret.

At cùm simul audirem nonnullis mirum videri quòd ii qui Constitutioni *Unigenitus*

genitus refragantur, à Pontifice ad Generale Concilium provocassent, idque Romanarum opinionum patroni schismaticum esse inclamarent, simul in animum duxi adjungere aliquid quo ostenderetur, non modò Concilio Generali potestatem esse in Pontificem, sed & doctrinam hanc à legitimis Generalibus Conciliis inter fidei capita relatum esse. Id meditati, mox in mentem venit opus posthumum Gallicè scriptum à viro maximo Antonio Arnaldo adversus Emmanuelis Schelstratani opusculum de Actis Concilii Constantiensis: nam præterquam quod non minimum rei pondus addat celebratissimum tanti viri nomen, qui tot laudibus ob eximiam pietatem, acerrimum ingenium, doctrinam sanam, perpetuosque ad extremum vitæ spiritum susceptos labores pro asserenda veritate adversus Ecclesiæ externos & domesticos hostes, condecoratus est à Summis Pontificibus, Cardinalibus pluribus, Episcopis plurimis, Scriptoribus denique omnis generis, frustra ringente invidia furiosorum aliquot Calvinistarum, quibus egregiè in hac parte succinunt Jesuitæ eorumque imperiti partiarrii: præter istud, inquam, magni nominis pondus, accedebat & illud, tanto robore argumentorum in eo opere veritatem undique munitam esse,

*Eclaircissement  
sur l'autorité  
des Conciles  
Généraux &  
des Papes  
1711.*

ut non appareat quid vel per speciem ei responderi possit. Illud unicè erat molestum, quòd non parvæ molis liber esset, soleantque homines ad majores libros legendos non libenter accedere: quamobrem satiùs visum est interpretari solum ultimum caput, ubi Bellarmini argumenta (quæ adoptare solent adversarii) penitus evertuntur; Decretaque Concilii Constantiensis & Basileensis, & quoad sensum & quoad eorum auctoritatem invictis argumentis asseruntur. Hoc itaque ultimo capite constat secunda Pars hujus Dissertationis; nisi quod duobus aut tribus locis pauca quædam inferenda fuerunt, ubi nempe ad ea quæ aliis locis à se dicta fuerant, lectorem remittebat Arnaldus. De stylo nihil dicam, nisi quod de summa dictionis puritate non magnoperè sollicitus, id tamen conatus sum ne planè barbarus sermo esset.

In Ap-  
probat.  
libelli cui  
titulus:  
*Refutation*  
*du Memoi-*  
*re publié*  
*en faveur*  
*de l'Appel*  
*des IV.*  
*Evêques.*

Primam verò Partem per omnia Secula ordine suo duximus; eam ob rem maximè quod Illustrissimus Archiepiscopus Mechliniensis (postque cum inepti quidam scriptitatores) à Jesuitis suis pessimè edoctus, affirmare non dubitasset, *Opinionem de Constitutionibus Pontificiis er- roneam faveur rori obnoxiiis in rebus fidei & morum, inde cognitam fuisse universa Ecclesia quatuordecim priorum seculorum.* Illud tamen mi-  
ror

for quod scribis, mi Théodore, hanc affirmationem tam robustam viri in magna Ecclesiastica dignitate constituti, nonnullis imposuisse. Sanè si istud à Bosueto quodam, aliove Episcopo Sacræ antiquitatis perito sic affirmaretur, fateor magni ponderis auctoritatem futuram: at cum ejusmodi velut è tripode oracula eduntur ab iis quos fama publica nullius rei minus quàm Ecclesiasticæ Traditionis peritos perhibet; tum verò, fateor, tantum abest ut aliquo loco id numerare possim, ut potius in mentem veniat non male facturos ejusmodi Præsules si talibus Documentis aut Epistolis, subnecterent hanc clausulam non ineleganter pridem in re simili prolatam:

*Faisons très-expresses défenses  
De rire de nos ordonnances.*

Et sanè quid istis quatuordecim seculis de ea re senserint catholici, vel ex hoc nostro quamlibet exiguo specimine perspicui poterit.

Cum vero huic opusculo conscribendo occupatus essem, prodierunt libelli aliquot eorum qui Constitutionis & Pontificiæ infallibilitatis causam suscepèrunt: hos, quod non multum ad institutum nostrum pertinerent non ab omni parte

oppugnare visum est (quod ab aliis fieri nunciabatur); sed quæ rem hanc propiùs attingerent, cursim refutare.

3. *Augustini sensus*  
*&c.*

At, quod præter propositum accidit, alter P. Wavrii libellus nuperrimè editus, secunda Parte hujus Dissertationis non refellitur tantùm, sed in pulverem redigitur circa ea quæ de Concilio Basileensi non minus imperitè quàm intrepidè affirmat. Quamquam enim iis quæ P. Wavrius profert, non ex adverso illic respondeatur, sic tamen illius Concilii auctoritas asseritur, ut spes sit, si eam legat Wavrius, fore ut verecundiùs saltem deinceps de tam venerando cœtu loquatur. Neque audeat amplius *Synagoga Satana* vocitare Concilium, cujus vocem catholicos omnes audire deceret: ac tandem perspiciat an levis culpa sit tam contumeliosas voces in tantos viros coniecisse.

Nec se existimet securum quod post Pium II & Julianum Cardinalem sic locutus sit. Si enim non ex affectu sed recta ratione rem metiri voluisset, facile fuerat videre quàm exigui ponderis esse debeat ista Pii revocatio, quid enim mirum si fortunam & aulam sectatus Æneas Sylvius, paulatim cum honoribus mores sententiamque mutaverit? Certè argumentum nullum quod cum à sententia di-

dimoverit , profert : nec ea quæ priùs scripsit historicè , revocat : profiteturque se tunc nullo odio, nulla gratia abreptum fuisse , sed soli veritati studuisse : atqui hoc solo plus juvat Bulla illa quàm ad- versetur : nec enim Æneæ Sylvii , ut Theologi , auctoritas pondus addebat Concilio Basileensi , sed res gestæ quas ille narrat : harum porrò veritatem ipse ea Bulla rursus confirmat. De Juliano Cardinale si ejus gesta cognoscere stu- duisset Wavrius, comperisset virum fuis- se cujus nec auctoritas nec *conversio* os- tentanda esset , sed exitus lugendus. Is enim est ille Julianus Cæsarinus Sancti Angeli Cardinalis, qui ab Eugenio IV missus ad Ladislaum Hungariæ Regem, ei persuasit ut foedus cum Turcis initum rumperet : credidit miser Princeps , & quòd Turcarum copiae in Asia distine- rentur , existimavit facilem fore victo- riam : commissum est ad Varnam seu Warnam 11. Nov. 1444; jamque Tur- cæ cedere incēperant, cū Amurathe II Turcarum Imperatore, Christum ipsum adversus Christianorum perfidiam palam invocante , subita rerum commutatio facta est , Christiani ad internecionem deleti sunt, Rex ipse & totius mali auc- tor Julianus occubuerunt, patuitque deinceps Turcarum armis Pannonia, ut in

Ration.  
Temp.  
part. 1.  
lib. 9. at  
ann.  
1438.  
1500.

hunc usque diem tantæ cladis vulnus sentiat Christianus orbis. Porro Cardinali Juliano illius perfidiæ consilium deberi adeò apud Historiarum Scriptores certum est, ut nec ipse Petavius, quamquam Romanæ Aulæ laudibus plus æquo studens, rem dissimulare potuerit: *Ad pacem*, inquit, *cum Uladislaao Rege Hungariae* æquissimis conditionibus ineundam compulsi (Amurathem). *Sed eam, Turcis Asiatico bello dissentis, temerè disturbarunt Hungari, haud levi Christianæ rei damno. Si quidem eorum exercitus ab Turcis ad Warnam profligatus est; quo in prælio cum Uladislaus ipse Rex, tum Julianus Cardinalis, repetendi contra fœdus belli auctor, occubuit.* Et hujus tamen hominis dicta ut totidem oracula ad fastidium repetit P. Wavrius!

Verùm ut ad Dissertationem nostram redeamus; satis ut arbitror perspicias, mi Theodore, duobus his capitibus de Pontificis & Concilii auctoritate semel statutis, hinc spontè consequi nihil æquius, nihil pacificum magis, nihil in ipsum Pontificem reverentiùs fieri potuisse ab iis qui Constitutionem *Unigenitus* suscipere reformidant, quàm ut à Pontificis judicio ad Generale Concilium provocarent. Quid enim aliud facerent tot Episcopi, Parochi, Academiæ, Canonici, Monachi

chi &c. quibus apparet Constitutionem multis capitibus Scripturæ & Traditioni adversari? An ad ipsum Pontificem recurrerent? At enim integro triennio aut quadriennio nihil aliud egerunt, quàm ut demissis precibus, missis ablegatis, scriptis literis, expositis suis argumentis, aliquid saltem solatii, aliquid lucis, aliquid sanæ doctrinæ in rebus controversis, à Pontifice impetrarent. Nec aliud ab initio ad hunc diem responsum obtinuerunt præter verba durissima, comminationes perpetuas, ac denique denunciationem segregationis Ecclesiasticæ. Quid aliud, inquam, post hæc omnia facerent reluctantes, quàm ut omne hoc negotium ad supremum in terris tribunal referrent?

Hæc sanè agendi ratio & fidei & rectæ rationi & Ecclesiasticæ disciplinæ tam consona est, ut nemini ante hæc tempora in mentem venisse arbitrer ridiculum illud systema, cui innititur totus libellus à Mechliniensi Præsule probatus, *Réfutat. du Mé-* quodque nunc in Belgio Epistolis Pasto-  
*moire &c.* ralibus & ineptis aliquot scriptiunculis ostentatur. Quamobrem illud tanquam sponte sua collapsurum ne attingi quidem in Dissertatione. Hic tamen, ne infirmitatis conscientia adscribant adversarii



hoc silentium , brevissimè id refellere juvat.

Aiunt itaque : Etiam si Pontifex errare posset , non fuisse tamen provocandum ad Concilium generale , utpotè non existens nec facile exstiturum , sed ad Ecclesiam universalem quæ non minùs extra Concilium quàm in Concilio infallibilis sit. Addunt porrò jam ab universa Ecclesia Constitutionem esse susceptam ; causam sic finitam ; adeoque provocationi ad Concilium locum hic nullum esse.

Sed isti qui audent provocationem ad Concilium tamquam rem novam omnibus maledictis onerare , edant , obsecro , exemplum aliquod ubi ad Ecclesiam dispersam juridica provocatio instituta sit. An non ut Regni Ordines non dispersi sed congregati auctoritatem exercent , ita & Ecclesiæ Pastores congregati in generali Concilio supremum suum tribunal habent ? An non id clamat ipsa Apostolo-

**AB. XV.** rum praxis qui *convenerunt videre de verbo hoc* ? An non omnium seculorum disciplina , secundùm quam ob causas hac hodierna multò leviores , quandoque generalia Concilia coacta sunt ?

Verùm , inquiunt , Ecclesia non magis extra Concilium quàm in Concilio errare potest. Atque hic magnum aliquid sibi protulisse videntur , laborantque ut  
illius

ius dicti veritatem demonstrent. Sed  
 lubet illos interrogare, an id ignorarint  
 Apostoli & Sancti Patres? Et si non  
 ignorarint, an propterea minus credide-  
 rint generalia Concilia sæpè non utilia  
 tantum sed & *necessaria* esse, quod & Lib. 1. de  
Concil.  
cap. 11. Bellarminus disertè fatetur? Desinant er-  
 go nugacissimum argumentum Appellan-  
 tibus objicere, aut simul illud universæ  
 Ecclesiæ ipsisque Apostolis objiciant.  
 Sed illud potius considerent, etiam si  
 promissa Christi Ecclesiam omni tempo-  
 re ita tutam præstent, ut numquam in  
 ea unanimi consensu pro Catholica veri-  
 tate error doceatur; posse tamen oriri  
*dies nubis & caliginis*, quibus error mul-Exech:  
XXXIV,  
 tum pervagetur, vi, fraude, æquivocis  
 vocibus obtrudatur, jamque prava doctri-  
 na non *portiunculam tantum*, sed *totam pa-*Vincenz:  
Lirin.  
common:  
cap. 41  
 riter Ecclesiam commaculare conetur; quod  
 & tristissimis exemplis Ariani & Mono-  
 thelitici furoris comprobatum est, & vi-  
 rorum maximorum, Athanasii, Hilarii,  
 Sulpitii Severi, Hieronými, Augustini,  
 Vincentii Lirinensis, Maximi, crebris  
 vocibus deploratum. Hoc ubi accidit,  
 quod aliud remedium Apostoli, quod a-  
 liud perpetua Ecclesiæ consuetudo reli-  
 quum fecit, quàm ut *convenient* Episco-  
 pi & Presbyteri *ἀπόστολοι καὶ πρεσβύτεροι* vi-  
 dere de verbo hoc §

Scio, quod isti jactare non cessant, multas hæreses absque generalis Synodi congregatione damnatas esse: & pariter scio, quod illi dissimulant, multas etiam non consulto Pontifice damnatas esse; qualia sunt ista hæresum portenta pleraque<sup>a</sup> duobus prioribus Ecclesiæ seculis exorta sunt. Sed tum demum istud accidit, cum universæ Ecclesiæ de ea re sensus omnibus manifestus esset, cumque esset *aperta perniciēs*, ut de Pelagiana hæresi Augustinus loquitur. At quis ita desipiat ut in similibus dogmatum loco numeret doctrinam de Gratia per se efficace, necessitate amoris Dei super omnia, aliisque capitibus de quibus agit Constitutio?

L. 4. contra Epist. Pelag. ad finem.

Postremò fictitia est, quæ hîc jactatur, universæ Ecclesiæ consensus. Ut enim omittam plures Episcopos & Presbyteros Constitutioni apertè resistere quàm olim hæresi durante Ariano & Monothelítico impetu; de ipsis illis qui Constitutionem amplecti videntur, quàm multa dici possunt! Nam

1. Ut Constitutionis doctrina ubique recepta censeatur, non sufficit ut ipsa Constitutio peregrina aliqua interpretatione aut vago modo recipiatur, sed constare debet illud ipsum à recipientibus damnari quod ii docent qui recipere detrectant;

trectant. Hoc & res ipsa loquitur & Jesuitæ frequenter inclamarunt. Porro

2. Palam est Gallicanos Antistites plurimos ex iis qui Constitutionem susceperunt, simul tradere eadem dogmata quæ Appellantes tradunt : atque ita dogmatum illorum damnationem ab illis non suscipi liquet.

3. Quod aliorum regnorum Episcopos attinet, nemo illorum affirmare audet se iudicium Episcopale de omni hoc negotio instituisse ; nemo exponere quo sensu damnet propositiones damnatas. Et tamen impudentissimum sit negare, multos illorum doctrinæ Gratiæ efficacis aliisque hodie controversis inhærere. Itaque hi rursus non de dogmate ipso consentiunt. Inanis ergo est tot nominum, tot regionum ostentatio, quæ passim non minus ineptè quàm ambitiosè usurpatur, at nusquam ineptiori & pueriliori stylo quàm in Epistola Pastoralis Gandavensi.

4. His adde, quàm parum libertatis sit Episcopis italis à Romana Aula, quàm parum Hispanis ab Inquisitione.

5. Denique sunt ingentes Provinciæ ex quibus non nisi unius Episcopi aut unius Inquisitionis testimonium refertur.

Si ergo rem ex vero æstimes, iudicabis profectò nullam hinc nisi vocum & syllabarum

barum consensionem esse, circa res ipsas summum diffidium. Ut numquam magis ad *questionum veritatem eliquandam*, ut Augustinus loquitur, necessaria fuerit œcumenica Synodus quàm his temporibus.

At nulli magis intolerandi sunt adversarii, quàm ii qui de dogmatum veritate Appellantibus consentientes, hæresim tamen & schisma, per summam calumniam, inclamare non desinunt. Nec sanè capio quo animo P. Wavrius alterum è libellis suis ita inscripserit : *Dissertatio de presenti hæresi & schismate quorundam in Gallia exortis*. Si enim, ut ille contendit, malè crediderint ea dogmata quæ ipsis cum Wavrio communia sunt per Constitutionem fuisse damnata, jam non alia ratione peccant quàm quod à vero Constitutionis sensu aberrant, & potuisse ea dogmata à Pontifice damnari existiment. Qui verò ob has tantùm causas ut schismaticos & Hæreticos proclamat Episcopos non paucos, Presbyterorum & Laicorum innumerabilem turbam, viderit an non ipse in schismatis crimen præceps ruat.

Nos interim, mi Theodore, dum hæc procella defævierit, conservandæ veritati, unitati, charitati, unicè operam demus. *Non turbetur cor nostrum*  
*neque*

Joan.

XIV. 27.

*neque formide.* Dormit paulisper Jesus <sup>Joan.</sup>  
dum navicula penè mergitur. Nostrum <sup>XIV. 27.</sup>  
est assiduis precibus Jesum inclamare, ut  
surgat, imperetque ventis & mari. Sed  
ne surgens Jesus nos increpet ut *modica* <sup>Matth.</sup>  
*fidei* homines, persuasissimum habeamus <sup>VIII.</sup>  
non posse mergi naviculam cui Jesus præ-  
est. Itaque Ecclesiæ Catholicæ indi-  
vulso nexu cohærentes, illius de omni  
hoc negotio iudicium exspectemus; nec  
hæretici aut schismatici loco habeamus  
ullum ex iis qui sanctissimæ matris illius  
iudicio se parere velle profitentur. *Et Gal. VI.*  
*quicumque hanc regulam secuti fuerint, pax* <sup>16.</sup>  
*super illos & misericordia & super Israel*  
*Dei.* Vale.

17. Januar. 1719.

## DISSERTATIONIS

## P A R S P R I M A.

*De fidei Romani Pontificis infallibilitate.*

**N**on hic illud agitur ut universæ Traditionis Catholicæ mole opprimatur commentitium illud non errandi privilegium : quamquam enim tantum opus perquam utile foret, nec illi agro istiusmodi seges desit, non quadraret tamen illud præsentī instituto : nec enim tam scriptionem condimus, quàm adumbramus ! consilium tamen est aliquam Traditionis illius imaginem delineare. Namque ex omni Ecclesiæ seculo quiddam feligentes quod ad causam pertineat reliqua vel indicantes tantummodo, vel etiam omnino prætermittentes, quodammodo suggeremus quid in hac re præstari posset.

Res quidem certa est omnibus controversiarum peritis, ut dogma aliquod ad Apostolicam Traditionem pertinere censeatur, non plane esse necessarium, ut de illo ex omni seculo scripta testimonia pro-

proferantur. Sunt quædam secula quibus rari fuerunt boni Scriptores; plerique in iis pertractandis solent maximè versari quæ sua ætate agitabantur. Manet tamen aureum illud Vincentii Lirinensis *ἀπὸ πάντων*; *Quod ubique, quod semper, quod ab omnibus*, dum plerisque seculis dilucida testimonia pro dogmatis veritate, nulla aut rara adversùs illam demonstrantur; etsi fortassis uno aut altero seculo nulla apud Scriptores qui exstant, de illo dogmate mentio injiciatur. Ea tamen est in hac quæstione argumentorum omnium ubertas, ut nullo seculo desint scripta testimonia, pleraque etiam insigni quadam nota illustriora. Sic videlicet, ut vel tardioribus, aut adversæ opinionis tenacioribus omni tempore non vestigia tantùm, sed ampla semita ad veritatem ostendi posset, consultum nobis voluit divina sapientia; & tantò quidem abundantior lucem subministravit, quantò noverat impensius conaturos homines potentes & vaferrimos, ut tam latè patentem errorem (fictitiam infallibilitatem Pontificis intelligo) velut omnium suarum machinationum fundamentum, omnibus viribus & artibus constabilirent.

Scio hìc non defuturos qui ad singula occinant suum illud *Ex Cathedra*, unicum scilicet in desperata causâ perfugium: nec  
tamen



*i Tim.*  
76. 4.

tamen arbitratus sum circa illas *verborum questiones languendum* esse, & perpetuò laborandum ut ad singula ostenderetur agi illic de Pontifice loquente *Ex cathedra*. Ut enim omnes nebulæ quas hac distinctiuncula objicere nituntur, facilè queant dissipari, satis erit hic pauca præmonuisse.

1. Indiscriminatim docent Patres, Concilia, ipsi Pontifices, posse Romanos Pontifices erronea dogmata proferre: nec ulli in mentem venit ante hæc novissima secula, illum omnino infallibilitatis genus in illis agnoscere: numquam item adhibita mystica illa distinctio de *privato Doctore & Pontifice ex Cathedra* loquente. Indiscriminatim igitur accipienda sunt illa testimonia, nec sine temeritate illorum pondus elevare student Recentiores quidam, tam inani & novitia distinguendi ratione.

2. Sæpè accidit ut illa distinctio fuerit necessario adhibenda, si modo tam vera quàm commoda fuisset: numquam tamen adhibita fuit, ne in Honorii quidem causa tantoperè agitata. Nihil igitur hinc distinguendum censuerunt illorum temporum Catholici omnes.

3. Cùm omnes post Bellarminum Transalpinarum opinionum sectatores, voces illas *Ex Cathedra*, ad singulos penè versus  
usur-

usurpent, nihil tamen hætenus etiam inter illos minus certum est quàm quid illæ voces significant. Alii accuratum rei examen; alii Synodum Diocesanam; alii Collegium Cardinalium; alii plura etiam postulant: plerique nunc illud dicunt, loqui Pontificem *Ex Cathedra*, cùm omnes fideles alloquitur; verùm hoc isti non edicunt, an necesse sit Pontificem conceptis verbis pronunciare, se ad omnes loqui: quod si affirmant, quandonam obsecro *Ex Cathedra* loqui centebuntur Pontifices, qui vixerunt priusquam solemnes illæ Bullarum formulæ usu receptæ essent? Si negent, ad idem incertum delabimur. Sola igitur istarum vocum ambiguitas hominumque mutuas conjecturas abigentium pugnæ, & nos onere singulis cavillis respondendi liberant, & quàm sit ruinosum omne istius systematis ædificium, satis produnt.

4. Ut tamen quod res est, fatear, non ex omni parte vana videtur hæc distinguendi ratio. Alia enim est cuiusvis Episcopi auctoritas cùm pro munere suo docet, mandat, vetat, agit, quàm si in communem Theologorum ordinem se cogens de re quadam, ut ceteri, disputet: consimili proinde ratione de Summis Pontificibus censendum videtur. Atque ita, si lubet, *Ex Cathedra* censentur

tur loqui, cùm in rebus ad fidem pertinentibus non privatim disputabunt, sed ut Episcopi pronunciabunt; cùm Decreta condent; cùm de fide consulentibus respondebunt, quibuscumque tandem verborum formulis concepta sint, ad quoscumque directa sint illorum responsa: ita & tunc cùm ad populum pro concione dicent, quippè *Ex* illa tam veneranda Apostolici muneris *Cathedra* pronunciantes. Ad quam notionem si, ut æquum sanè videtur, redigi se patiantur Romanarum opinionum vindices, jam omnium seculorum testimonia ipsis occlamitabunt, Romanos Pontifices *Ex Cathedra* loquentes, non tantùm errare posse, sed & aliquoties errasse. Utrumque breviter jam demonstrandum est.

## S E C U L O I.

**N**ON sine admirabili consilio divinæ providentiæ factum est, ut ipsis Apostolicis temporibus orta sit grandis controversia de ritibus Mosaïcis. Ex illius enim serie & fine norma relicta est secuturis seculis iudiciorum Ecclesiasticorum; ex qua discimus non per unum quemlibet Apostolorum successorem (ne Petri quidem) ferri sententiam quæ controversiis circa fidem natis sua solius auctoritate

et auctoritate finem imponat. Nec enim unus Apostolus sententiam tulit; sed *con- Act. xv.*  
*uenerunt Apostoli & Seniores videre de ver- 6.*  
*bo hoc.* Quin postquam in sacrosancta illa Synodo Petrus sententiam dixit; non continuo censuerunt Apostoli aliive fideles causam finitam esse; sed *Respondens v. 13.*  
*Jacobus dixit: Viri fratres, audite me.* Moxque indicatis testimoniis Prophetarum, fert & ipse sententiam: *Propter v. 19.*  
*quod ego judico &c.* Et post hæc, *Tunc v. 21.*  
*placuit Apostolis & Senioribus cum omni Ecclesia.* Neque, ut jam multi observant, scriptum est in Epistola Synodica, *Visum est Spiritui Sancto & PETRO;* sed; *v. 28.*  
*Visum est Spiritui Sancto & NOBIS.* Adde quod pars decretoria Epistolæ, ipsis penè B. Jacobi, non B. Petri, verbis concepta est, ut apparet ex v. 29. Quibus omnibus quid aliud posteros docere voluerunt Apostoli, nisi tum solum certò constare Spiritum Sanctum locutum esse, cum universa Ecclesia sententiam tulit, non verò postquam Petrus Petri successor solus locutus est? Plus aliquid audet Pelagius II. Romanus Pontifex in celebri Epistola ad Episcopos Istriae, quam S. Gregorii Magni (cujus operâ in rebus maximis utebatur Pelagius) calamo exarata ex stylo multi conjiciunt: ita enim de S. Petro loquitur: *Diu quippe resistis,*

stuit, ne ad fidem gentes sancta Ecclesia sine circumcissione reciperet . . . . qui tamen à Paulo postmodum ratione suscepta, dum quosdam gentiles ad Ecclesiam venientes pondere servanda circumcissionis onerarent, dicit: Cur tentatis Deum, imponentes jugum, quod neque Patres nostri neque nos portare potuimus? Numquid, fratres dilectissimi, Petro Apostolorum Principi: IBI DISSIMILIA DOCENTI, debuit ad hac responderi: Hec quæ dicis, audire non possumus; quia aliud ante prædicasti? Si igitur in Trium capitulorum negotio aliud cum veritas quæreretur, aliud inventa veritate dictum est, cur mutatio sententiæ huic Sedi in crimine obijcitur, quàm cuncta Ecclesia in ejus auctore veneratur? Palam est ex his, credidisse Pelagium, & cum eo etiam, ut videtur, Gregorium Magnum, Petrum mutasse sententiam, atque ita non tantùm malè conversatum esse eum à Paulo reprehenderetur, sed & malè sensisse ac errasse. Nec tamen affirmamus rectè hac in parte existimasse Pelagium, quoniam reclamant Scriptores gravissimi etiam è Patribus: ast illud saltem apparet credidisse Pelagium, errori obnoxium fuisse ipsum S. Petrum. Quantò magis illi obnoxii erunt ejus Successores!

SECULO II.

**P**roximum ab Apostolicis temporibus argumentum præbere videtur. Victoris Papæ cum Asianis Episcopis contentio quoad diem quo Paschæ festum quotannis celebrandum esset. Quos ille omnes aut à communione removit (quod eruditis quibusdam visum est) aut certè remoturum se est comminatus. Qua de re Apostolica & Paulina libertate eum reprehendit magnus Irenæus. Manserunt in sententia Asiani : quos usque ad Nicæna tempora, nemo catholicus censet à communione Catholica remotos fuisse, quidquid demum Victor decrevisset.

Quibusdam nullius pretii videtur argumentum ex illa controversia desumptum ; quoniam omnis ea quæstio non ad fidem, sed ad Ecclesiasticos ritus tantummodo pertineat, ut aiunt. Hos verò rogatos velim, ut rem paulò maturiùs expendant. Non tam erat Christianæ doctrinæ ignarus Victor, ut nesciret tolerandos esse diversos ritus qui neutra parte fidem attingerent, tolerabatque ipse magnam in aliis ritibus diversitatem. Hunc ergo ritum aliqua parte ad integritatem fidei pertinere existimabat. Si rectè existimabat, non igitur persuasum

B.

erat

erat Catholicis Romani Pontificis iudicio sub anathematis poena standum esse; etiam in causis fidei: sin male, docuit igitur ad fidem pertinere, quod à fidei compage erat alienum; atque ita erravit iudicans de rebus fidei. Rectè enim Joannes Major animadvertit, hæresim esse si quis dixerit ad fidem pertinere quod ab illa alienum est, perindè ac si alienum à fide dixerit quod ad illam pertinet.

Nec tamen malè fortassis id existimaverit Victor; cùm post Nicæni Concilii iudicium, passim hæretici habiti sint adversæ opinionis sectatores; qui sanè schismatici tantùm dicendi forent, si de mero ritu hìc actum fuisset qui ad fidem non spectaret. Et revera quibusdam ritibus fides necessario quodam vinculo veluti connexa videtur: sic enim iisdem ferè temporibus in hæresum numero Clemens Alexandrinus collocat Hydroparastatas, hoc est illos qui vinum consecrandæ aquæ admiscere volebant. Quis porro scit, an non opinionem aliquam Judaicam suo ritu foverent Asiani illi? Certè, ut jam diximus, ubique inter hæreticos collocantur, dicunturque Quarto-Decumani. Nec tamen illos ob Victoris sententiam quisquam hæreticos existimavit, priusquam centum & pluribus post Victorem annis,

Lib 1.  
Strom.  
ἐπὶ τοῦ...  
ἁγιστοῦ...  
ἵστο γὰρ  
ὁ καὶ  
ὑδὼς ὑί-  
λου ἰουδα-  
ρισμοῦ.

*De R. Pont. fctitia infailibilitate. 27*  
annis, ab univerſa Eccleſia in Nicæna  
Synodo damnati eſſent.

S E C U L O I I I.

**N**Otiſſima eſt S. Cypriani cum Ste-  
phano Romano Pontifice contro-  
verſia. Sententiam rogatus Cyprianus,  
docuerat nullum extra Eccleſiam eſſe ve-  
rum baptiſma, ac proinde hæreticos  
omnes ad Eccleſiam revertentes, ruruſum  
eſſe baptizandos. Contra Stephanus va-  
lidum cenſebat hæreticorum baptiſma,  
ac ne hoſpitio quidem aut colloquio di-  
gnabatur Cypriani legatos, Seductores  
& Pſeudo-Apoſtolos appellans. Cypria-  
nus Concilium habuit, quo illius opinio  
communibus ſuffragiis laudata eſt. Cum-  
que de eadem re ſcripſiſſet in Aſiam,  
reſponſum accepit à Firmiliano Cæſareæ  
Cappadocum Epifcopo, qui ſuo & vici-  
norum Epifcoporum nomine Stephani  
ſententiam acriter exagitabat. Manſit in  
ſententia Cyprianus cum Africanis Epi-  
ſcopis; manſit Firmilianus cum Orienta-  
libus; & quamvis illorum doctrina una-  
nimi conſenſu poſtmodum rejecta fuerit,  
nemo tamen illos aut hæreticos aut ſchiſ-  
maticos judicavit: nemo igitur cenſuit  
deuiſſe illos Stephani Decretum ut à  
Spiritu Sancto profectum amplecti. Mit-



to quòd quibusdam eruditis visus est Stephanus in diuersum errorem incidisse, dum edicit nullos à *quacumque* hæresi reuertantur, rebaptizandos esse. Mitto quòd iisdem videantur Athanasius & Basiliius, etiam post Synodos Arelatensem & Nicænam, Cypriani opinionem secuti (addi potest Pacianus) illa enim huic causæ sufficiunt quæ apud omnes sunt in confesso.

Jam hoc abunde est ad rem quæ agitur. Quid enim amplius desiderari queat, quàm ut ostendantur plerique Africani, multi Orientales Episcopi, dogmaticum Decretum \* Pontificis rejecisse, nemine Pontificiam infallibilitatem inclamante? Certè modo alicui argumento negativo, ut vocant, vis insit, huic inerit. Sed habemus quod addamus. Nec enim tantummodo Cypriani agendi rationem nemo reprehendit, sed impensè laudavit Magnus Augustinus, qui omnium maxime in eadem controversia pertractanda desudavit. Occurrunt multa ab illo in hanc partem dicta, omnibus iis operibus quæ in Donatistas scripsit. Unum aut alterum

\* De iis qui putant non ad dogma, sed ad disciplinam pertinuisse eam controversiam, vide libellum Gallicum cui titulus : *Refutation abr. du Traité du Schisme* ; ubi res hæc copiosè pertractatur.

alterum selegisse sufficiat. Ecce, inquit, Lib. de Unico Bapt. cap. 14. duo erant uno tempore, ut de aliis taceam, qui diversa sentiebant: duo erant eminentissimarum Ecclesiarum, Romana scilicet & Carthagenensis, Episcopi Stephanus & Cyprianus, ambo in unitate Catholica constituti: quorum Stephanus baptismum Christi in nullo iterandum esse censebat, & hoc facientibus graviter succensebat: Cyprianus autem in hæresi vel schisma baptizatos, tamquam non habentes baptismum Christi, baptizandos in Ecclesia Catholica existimabat. Multi cum illo, quidam cum isto etiam sentiebant, utrique cum eis in unitate consistentes. Eat nunc amarulentus Scriptor *De Schismate*, Traité du Schisme chap. 3. & 4. & neget posse in unitate Catholica & Apostolicæ Sedis communione consistere eos qui Pontificis Decretum aliquod dogmaticum rejiciant. Rursum alio loco Augustinus: *Quia tunc non extiterant nisi qui consuetudinem opponerent, defensiones autem ipsius consuetudinis non tales asferrent quibus illa talis anima moveretur, noluit vir gravissimus rationes suas, etsi non veras (quod eum latebat) sed tamen non victas, veraci quidem, sed tamen nondum asserta consuetudini cedere.* His similia frequenter repetit: cum enim Donatistæ auctoritatem Cypriani pro dogmatis sui defensione assidue in ore haberent, eadem assidue respondere cogitur Augustinus; respon-

sionis summâ semper huc redeunte, ut dicat idcirco Catholicum fuisse Cyprianum, quod illius ætate nulla auctoritas falli nescia controversiam dirimisset; Donatistas hæreticos, quod eandem sententiam tueri pergerent, *postquam universalis Ecclesia concordissima auctoritate veritas firmata esset.* Idem de eadem controversia iudicium tulit Vincentius Lirinensis acerrimi ingenii Scriptor: *Et o rerum, inquit, mira conversio! Auctores ejusdem opinionis Catholici, consecratores vero hæretici judicantur. Absolvuntur magistri, condemnantur discipuli: conscriptores librorum filii regni erunt, assertores vero gebenna suscipiet.* Nam quis illud sanctorum omnium & Episcoporum & Martyrum lumen, beatissimum Cyprianum, cum cæteris collegis suis in æternum dubitet regnaturum esse cum Christo? Aut quis contra tam sacrilegus, qui Donatistas & cæteras pestes que illius auctoritate Concilii rebaptizare se jactant, in sempiternum negotiosos esse cum diabolo? Et tamen nullum inter Cyprianum & Donatistas erat discrimen nisi quod in eadem causa Cyprianus Pontifici & multis Episcopis obsisteret, Donatistæ universali Ecclesiæ. Est ergo immensum discrimen inter auctoritatem Decreti Pontificii, etiam consensu plurimorum

Commo-  
nit. cap.  
9.

*De R. Pont. fictitia infallibilitate.* 31  
rum Episcoporum suffultam, & concordissimam Ecclesiæ auctoritatem.

## SECULO IV.

**C**ùm Ariana hæresis *penè orbem totum* Vincent. Lirin. *contaminaverat*, in constantissimis *commun-*  
orthodoxorum fuit Liberius Romanus *nit. cap.*  
Pontifex, qui *resistit* usque ad exilium, 6.  
*sed non usque ad sanguinem*: tædio enim *Hebr*  
exilii victus, beatissimum Athanasium a *XII. 4.*  
communione removet, Arianos ad suam  
communione admisit, Arianorum for-  
mulæ subscripsit. Quamobrem invictus  
ille Hilarius Pictaviensium Episcopus,  
cujus *unius beneficio servatas esse Gallias* Hist. Sacr. Lib. 2.  
immunes Arianae pestis, pro comperto  
habet Sulpitius Severus, tertio Anathe-  
ma in Liberium fertur torsisse, quod  
etiamnum exstat inter illius Fragmenta.

Hic desudant Transalpinarum opinio-  
num sectatores, ut cùm duæ fuerint, for-  
mulæ Sirmii conditæ, quarum posterior  
multo apertiùs priore Arianam doctrinam  
exprimit, priori tantùm non posteriori  
subscripsisse credatur Liberius. Multis  
eruditis aliter videtur. Verum ut omni  
non necessaria controversia abstineamus,  
ultro largiamur priori tantùm Sirmienfi  
formulæ subscripsisse Liberium: at si-  
mul qualis esset illa formula, audiamus

vel adversarios fatentes : \* *Prævaricatus est Liberius*, inquit mox citatus Scriptor, non quod formula hæretica subscripserit, sed formula fallaci, & qua uti Hæreticos occultandis erroribus suis non ignorabat : atque hoc sensu subscripsit Ariana perfidia, seu hæresis dolosè latitanti. Liberius igitur qui hic sanè ex Cathedra loquebatur (cùm alios à communione removeret, alios admitteret) subscripsit Formulæ dolosè quidem hæreticæ, sed hæreticæ tamen ; & quod rei caput est, subscripsit non ignarus esse formulam qua gaudebant uti hæretici, & præter quam nihil ab eo postulabant ut ejusdem cum illo communionis esse censerentur. Qui hæc omnia facit, ac præterea à communione Catholica ad Arianam apertè deficit, si non palam docere hæresim dicendus est, jam oportet omnium verborum vim in gratiam Pontificum mutatam esse. Non tam multa præstabant quidam ex iis qui in idololatriam lapsi censebantur primis Ecclesiæ seculis.

S E-

\* Libere a prævariqué non en signant une formule hérétique, mais en signant une formule captieuse, & dont il savoit bien que les hérétiques abusoient pour cacher leurs erreurs : & en ce sens il signa la perfidie Arienne, ou l'hérésie cachée artificieusement. *Traité du Schisme chap. 1. art. 2.*

## S E C U L O V.

**U**T fuit hoc seculum multis eruditisque Scriptoribus refertum, varia ex illo argumenta repeti possunt pro re de qua agitur. At unus pro omnibus sufficiat Augustinus. Jam illius quidem mens perspecta esse potuit ex iis quæ ad Seculum III ex illo prolata sunt. Unum aut alterum testimonium ejusdem generis adjiciemus.

Primum pertinet ad Cypriani causam. De hac jam audivimus differentem Augustinum, Cypriani constantiam non excusantem tantum, sed laudantem. Nunc audiamus de seipso profitentem, se eodem modo crediturum & facturum fuisse si Cypriani ætate vixisset: *Nec nos ipsi*, Lib. 2. de

inquit, *tale aliquid auderemus asserere, nisi* Bapt. cont. Donat. cap.

**UNIVERSÆ ECCLESIAE CONCORDISSIMA AUCTORITATE** q.

**FIRMATI:** cui & ipse (Cyprianus) sine dubio cederet, si jam illo tempore questionis hujus veritas eliquata & declarata per plenarium Concilium solidaretur. Et brevius: *Profecto issem in eandem sententiam.*

Profitetur itaque Augustinus, se adversus Stêphani Papæ defuisionem, amplexurum fuisse Cypriani sententiam, si ea ætate vixisset.

B 5

Aliud

Aliud clarissimum ejusdem Summi Viri testimonium exstat in causa Pelagianorum. Zozimus Romanus Pontifex ambigua fidei confessione delusus, hæresiarchas laudaverat; Catholicos accusatores Erotem & Lazarum Gallicanos Episcopos contumeliis oneraverat. Sed hæreticorum fraude perspecta, & re accuratiùs perpenſa sententiam mutaverat. De priore Zozimi judicio insigniter gloriabatur Julianus Eclanensis, Pelagianorum Scriptorum Coryphæus. Quid ad hæc Augustinus? Primum illud ait, non ipsa dogmata probasse Zozimum, sed æquivocis deceptum eos ab iis dogmatis alienos credidisse, ac idcirco laudasse. Sufficiebat id quidem ut Juliano responderetur: at hoc non contentus, ostendere voluit, quantum abesset ut Romani Pontificis, imo totius Romani Cleri judicium irreformabile existimaret. Sic itaque prosequitur: *Sed si, quod absit, ita tunc fuisset de Celestio vel Pelagio IN ROMANA ECCLESIA JUDICATUM, ut illa eorum dogmata qua in ipsis & cum ipsis Papa Innocentius damnaverat, approbanda & tenenda pronunciarentur, ex hoc potius esset PRÆVARICATIONIS NOTA ROMANIS CLERICIS INUTRENDÆ.*

Lib. 2.  
cont.  
duas Epist.  
Pelagian.  
cap. 3.

Magne

Magne Augustine! ecce, advenit tempus quo miserabiles reliquiae illorum dogmatum quae in ipsis & cum ipsis Papa Innocentius damnaverat, approbanda & tenenda pronunciantur! veritatis à te defensae juva defensores: ut tandem ab universa Ecclesia Romanis Clericis, sed ad ipsorum salutem merita prevaricationis nota innuatur.

## SECULO VI.

**H**Oc Seculo miras turbas concitavit illa de Tribus Capitulis controversia, hoc est, de scriptis Theodori, Theodoret, & Ibae; omnemque penè Orientem cum Occidente commisit. Erant scripta illa pro orthodoxis habita in Chalcedonensi Synodo, quamquam Nestorianam haeresim redolere non paucis viderentur. Ac revera Justinianus Imperator consiliis praesertim Theodorae conjugis suae, quae clam Eutychianis favisse creditur, eò adductus est, ut Trium Capitulorum damnationem quoquo modo ab Episcopis elicere niteretur, imprimisque à Vigilio Romano Pontifice, quem aliis de causis sibi obstrictum Theodora noverat.

Is sub initio restitit; sed ut Justiniano ac Theodorae morem gereret, tandem



damnavit hætenus defensa capitula, edito solemnissimo decreto quod *Judicatum* appellatur. Id ubi palam factum est gravissimos motus concitavit: apertè enim Illyrici & Africani Episcopi, atque omnes propemodum Occidentales se à Vigiliis communionem segregabant. Quorum clamore excitatus Vigilius, alterum decretum edidit cui nomen *Constitutum*, quo anathematizat eos qui Tria Capitula damnare ausint. At ab alia parte eodem ferè tempore Synodus Constantinopolitana, quam quintam Generalem vocant, anathemate feriebat eos qui Tria Capitula damnare detrectarent. Cui sanctioni Vigilius per metamorphosin novam consensit, abolitisque omnibus quæ pro Tribus Capitulis & ipse & alii decreverant, perpetuum anathema illis dixit; unius decennii tempore quater aut quinies sententiam immutans, ac fortioribus se aggrensus: idque *καὶ οὐκ ἀπολείπει*, ut aiebat celeberrimus Petrus de Marca Archiepiscopus Parisiensis. Hanc illius Tragoediæ brevissimam expositionem non existimavi argumentis firmandam, tum quòd vix ulla sit apud Historiographos Ecclesiasticos magis obvia, tum quod occasione Jansebianæ controversiæ in omnium penè ore versetur, passimque in libris ea de re editis occurrat.

Si hîc res tantummodò cum Jesuitis, aliisve quos non puduit affirmare etiam in declarando sensu scripti cujusdam aut libri non posse errare Pontificem, totumque illud controversiarum genus ad fidei integritatem pertinere, hi pulcherrimè hoc dilemmate constringi possent: Si ad fidem non pertinet controversia de sensu Trium Capitulorum, pari ratione ad illam non pertinet controversia de sensu Janseniani libri: Si autem ad fidem utraque pertinet, erravit circa fidem Vigilii qui in re eadem toties sententiam mutavit; cujusque *Judicatum & Constitutum* (duo solemnia Decreta; &, si quod usquam est, cathedratica) manifestè secum pugnant. Cuperem equidem rescire quid ad ejusmodi dilemma reponeret Jesuita quispiam, aut alius è ferocioribus adversariis; qui ab omni parte hæresim non minus improbè quam imperitè inclamant.

At quum non omnes cum istis desipiant, æquum est etiam iis facere satis, qui fatentur illam de Tribus Capitulis dissensionem, omnesque ejusdem generis ad fidei compagem non pertinere. Itaque id cum illis fatemur: largimur deinde, numquam circa fidei negotia pravè sensisse Vigilium: & contendimus tamen vel ex hac historia planum esse, quan-

Dissert.  
de quinta  
Synodo  
cap. 4.

tum abessent illius seculi Episcopi ab illa de Pontifice falli nescio sententia. Nec enim illud existimabant Occidentales Episcopi, de genuino sensu Trium capitulorum tantummodò agi, sed de ipsa Chalcedonenſi Synodo abroganda & Eutychiano errore ſanciendo. Statim enim ac Vigilii *Judicatum* per Occidentem vulgatum eſſet, cœperunt (ut ait vir ſummus Eminentiffimus Cardinalis Noriſius, Scriptor Tranſalpinus non pro ſuſpecto habendus) *Conqueri ſinguli ac deplorare, Synodi Calchedonenſis auctoritatem a Vigilio depreſſam, prodiſtam ab illo fidem, Eccleſiam pravo dogmate imbutam.* Qui ita querebantur, ob eaſque cauſas à Vigilii communione recedebant, an non illi exiſtimabant Vigilium ſolemni Decreto errorem docuiſſe, adeoque nihil minus eſſe quàm infallibilem? Erant autem illi non modo Illyrici & Africani Episcopi; ſed, ſi Eminentiffimo Noriſio fides, univerſi *Occidentales.*

## SE C U L O VII.

**V**ERùm inter omnia quæ proferri ſolent exempla adverſus illud non errandi privilegium, nullum illuſtrius proferri poſſe abitror quàm Honorii. Rem omnibus notam, paucis proponam. Vigebat

gebat hoc seculo controversia de unica aut duplici in Christo voluntate; Sergius Constantinopolitanus Patriarcha, Monothelitarum hæresi addictus, scripsit ad Honorium adulatrices literas, quibus Ecclesiæ Romanæ fidem magnificè extollit, ejusdem Ecclesiæ sententiam ab Honorio sciscitatur circa illam de voluntate Christi doctrinam. Respondit Honorius Sergio: collaudat, quod in rebus dubiis Ecclesiam Romanam consulat: proficitur se illius Ecclesiæ sententiam perscribere: Sergii Epistolam laudat: ipsumque tandem hortatur hoc modo; *Hec nobiscum Fraternitas vestra prædicat, sicut & nos ea vobiscum unanimiter prædicamus.* Qui hoc responsum neget ex Cathedra editum, vix credere possim eum non mala fide loqui. Quod enim Decretum augustius magisque Pontificium esse possit, quàm ubi Pontifex non de privata sententia sed de Apostolicæ Sedis doctrina interrogatus circa gravissimam controversiam qua omnis Oriens in partes scindebatur, & interrogatus non à privato quodam, sed à Constantinopolitano Patriarcha, qui proximam à Romano Pontifice personam in Ecclesia sustinebat; suæ Ecclesiæ fidem gravissimis verbis exponit? Et illa tamen talis Epistola in Sexta Synodo oecumenica, cum

cum suo Auctore damnata est ignibusque addicta: ubi assiduè Honorii nomen cum aliis Monothelitarum nominibus indiscriminatim recensetur. Non autem ut æquivoca, aut minus cauta, aut indirectè hæresi tantùm favens (quæ nunc sunt quorundam effugia) sed his verbis damnata est: *Retractantes dogmaticas epistolas, quæ tam à Sergio scriptæ sunt ad Cyrum, quàm ad Honorium quondam Papam antiqua Roma; similiter & Epistolam ab illo, id est Honorio, rescriptam ad eundem Sergium, hæcque invenientes ALIENAS existere AB APOSTOLICIS DOGMATIBUS, & à definitionibus Sanctorum Conciliorum & cunctorum probabilium Patrum, SEQUI VERÒ FALSAS DOCTRINAS HÆRETICORUM; eas omnino abjicimus.* Hæc dein Synodi sententia duobus sequentibus seculis in septima & octava Synodo confirmata est: &, quod Pontifices Romanos attinet, non modo Agathonii & Leonii II probata; sed aliquot seculis ab omnibus Pontificibus innovata dum consecrarentur; ut planum est ex professione fidei quam invenire est in *Libro Diurno Romanorum Pontificum*, quem edidit eruditus Jesuita Joannes Garnerius. Ut nemo hæresiarcha frequentius & solemnius damnatus sit, quàm cum infausta sua Epistola Honorius.

Fa-

*Ælio*  
XIII.

2.  
t. 9.

*De R. Pont. fictitia infallibilitate. 41.*

Facere non possum, etsi ineptum videri potest, quin hoc loco mentionem injiciam de miserabili quadam scriptiuncula quæ cùm hæc scribo ad manus meas pervenit. Fragmentum est stolidissimi Sermonis Mechliniæ habiti 13. Nov, 1718. idque Belgicè. Illud quamquam nihil complectitur quàm veteres quisquiliæ sine ordine ac judicio inter se compactas, sic tamen placuit suo Auctori ut typis vulgandum censuerit: nec cogitavit miser, nullis eum nisi imperitissimis posse fucum facere tam putidâ pagellâ: Peritioribus verò aut plumbeum aut impostorem visum iri se, quem has Cypriani voces *Sacerdoti Dei*, non pudeat pag. 8. Belgicè vertere *den Paus*, hoc est *Romano Pontifici*; cùm tamen manifestum sit de seipso illic loqui Cyprianum, non de Pontifice, ut centies blateronibus istis regestum est: & illi interea pergunt frigidissimas suas noenias novâ ferociâ inclamare, de responsione data nihil solliciti. Ast hæc indigna Cyprianici textus corruptio me penè ab instituto abduxerat. Nec enim idcirco de Fragmento isto mentionem facere volui, sed ut hominis illius arrogantiam plenam gloriationem in eum recidere commonstrarem. Ait multos annos frustra *desudasse* eos qui Pontificis infallibilitatem oppugnant, ut vel pag. 11.  
unum

unum exemplum alicunde eruerent, quo ostenderetur Pontificem aliquem de fide decernentem errasse. Quàm parum in tanta rerum copia desudandum sit, norunt ii quibus non penitus incognita est Ecclesiasticarum rerum historia. Sed si quos nosse velit ille Scriptores qui in hac causa quærendis evasionibus *desudarint*, noverit esse Bellarminum suum (cujus absurdissimam censuram, ab ipso Exe-  
cuted Veronio \* castigatam, velut oraculum profert) noverit esse omnes Transalpinarum opinionum institores, cum illis ad hoc ineluctabile de causa Honorii argumentum respondendum est.

Primum enim audacissimus ille errorum patronus Albertus Pighius, commentus est Acta sextæ Synodi adulterata esse: secuti sunt Baronius & Bellarminus, qui cæteroquin doctissimi Scriptores cum sint, ubi ad Pontificias controversias ventum est, ita præ nimio affectu in obvia quæque ruunt & impingunt, ut animi causa ineptos esse velle dixeris. Itaque hæc istorum fabula tam malè adornata

\* Bellarminus . . . durus censor . . . . . ejus  
censura potius censura digna foret, qui sic tali audet  
censura notare Doctores tam graves. Franc. Veronius in Regula Fidei ab Illustrissimis Walemburgi-  
cis Latine reddita. §. 15.

nata est, ut etiam à Transalpinis Scrip-  
toribus passim rejiciatur. Atque etiam si  
veritate niteretur, non efficeret tamen  
quin à VII & VIII Synodo, plurimis-  
que Pontificibus, & Honorius & Episto-  
la ejus damnati essent.

Aliud commentus erat Cardinalis de  
Turrecremata: cujus iterum responsio-  
nem arripiunt (ut quavis tabulam nau-  
fragi) Baronius & Bellarminus; videli-  
cet malè à Synodis & Pontificibus in-  
tellectas esse Honorii Literas, ac reverà  
orthodoxas esse, sed improvidè scriptas.  
Hoc responsum, etsi verum non fatea-  
mur, impugnare hìc nihil necesse est.  
Sive enim benè, sive malè intellectæ  
sint Honorii Literæ, existimarunt equi-  
dem tres Synodi œcumenicæ, totque  
Pontifices, hæreticas esse: ac proinde  
non dubitarunt quin solemnissima Ro-  
mani Pontificis decreta hæretica esse  
possent.

Duas responsiones, quarum una est,  
non esse Cathedram Honorii respon-  
sionem; altera, non esse damnatam ut  
hæreticam, sed hæreticis suo silentio fa-  
ventem; supra ex ipsa rei serie, verbis-  
que Concilii refutavimus. Novum com-  
mentum Desirantii, qui Romanæ Aulæ  
novum decus Clementis XI favore acces-  
sit, ne commemorare quidem lubet.  
Dum



Tum quod pudeat tali homini respondere: tum quod vix ulli fucum fecerit illa adinventio: tum denique quod etsi vera esset, rediret equidem eadem argumenti vis, quæ mox ad secundam Baronii ac Bellarmini responsionem explicata est.

Sic isti omnes post tot & tam varias evasiones, nullam hæctenus excogitarunt quæ argumenti vim attingeret. Hoc illud est quod in re quapiam *desudari* dicitur. Sibi itaque & suis deinceps servet hanc voculam aliasque non minus vanas, ridiculus concionator Mechliniensis.

## SECULO VIII.

**O**Rta disceptatione de imaginum usu atque honore his deferendo, celebrata sunt varia Concilia & pro imaginibus & contra illas. In his eminet Nîcenum secundum, quod septimum generale censetur. Hoc etsi confirmatum esset ab Adriano I Pontifice, non tamen illius decreta infallibilia sunt habita: quin omnis Ecclesia Gallicana reclamavit. Cùm enim existimarent Galli, Nîcenos Patres, cumque iis Adrianum Pontificem, cultum aliquem ipsis directè imaginibus impertiendum sanxisse, contrarium ipsi sanxerunt in Concilio Francofordiensi, quo trecenti circiter Episcopi con-

convenisse scribuntur. In eamdem sententiam ivit Synodus Parisiensis aliquot post annis celebrata. Imò ipse Imperator Gallorumque Rex Carolus Magnus Opus adversus Nicenum Concilium edidit, & ad Pontificem misit; usus in eo conscribendo operâ gravissimi tum Scriptoris Alcuini, ut nonnullis visum est: appellatur illud passim; *Libri Carolini*; editumque primum est ex antiquis codicibus seculo XVI à Joanne Tillio Episcopo Meldensi, cum hoc titulo: *Opus illustrissimi & Excellentissimi seu spectabilis viri, Caroli Magni, nutu Dei Regis Francorum, Gallias, Germaniam, Italiamque, sive harum finitimas Provincias Domino opitulante regentis: contra Synodum quæ in partibus Græciæ, pro adorandis imaginibus, stolidè sive arroganter gesta est. Et quod Pontificem nominatim attinet, sine tergiversatione ad Augustos scribit Synodus Parisiensis mox citata, his verbis: \* Et ideo primum Epistolam Domini Hadriani Papæ, quam pridem pro imaginibus erigendis, Constantino Imperatori & Herenæ matri ejus ad eorum deprecationem in transmarinis*

\* Epistola hæc ita inscripta est: *Excellentissimis ac Victoriosissimis Deoque amabilibus Augustis, Dominis Hludovico & Hludbario, Serenissimis Imperatoribus.*

rinis partibus direxit, coram nobis legi fecimus: & quantum nostræ parvitatî res patuit, sicut justè reprehendit illos qui imagines Sanctorum temerario ausu in illis partibus confringere & penitus abolere præsumserunt, sic indiscretè noscitur fecisse, in eo quod superstitiosè eas adorari jussit. Pro quarum etiâ causa Synodum congregari præcepit, & sua auctoritate sub jurejurando censuit, ut erigerentur & adorarentur & sancta nuncuparentur; cum eas erigere licitum, adorare verò nefas sit. Hæc sententiarum diversitas aliquantisper duravit: ac nemo sive illis sive posterioribus temporibus existit, qui Synodos illas ac Imperatores hæreseos accusaret, quamquam palam rejicerent non modò definitionem Pontificiam, sed definitionem numerosissimæ Synodi cum Pontificia auctoritate conjunctæ; nullaque idcirco inter Romanam & Gallicanam Ecclesiam scissio facta est. Neque refert si dicatur malè à Gallis intellectam sententiam Pontificis & Niceni Concilii. Omnino enim illud & in hoc & similibus exemplis memoriâ tenendum est, non istud propriè agi, hi non an illi rectè senserint; sed istud, omnes illos qui Pontificiæ sanctioni obfisterent censuisse Pontificem errasse, neque eo nomine ab aliis Catholicis pro hæreticis aut schismaticis esse habitos, quòd Pontificum

cum decreta impugnarent : Unde consequens est, neutram contendentium partem credidisse Pontifices errorum immunes esse.

## SECULO IX.

**A** Synodo œcumenica hinc rursus argumentum subministratur; itemque ab ipso Romano Pontifice Adriano II. Cùm enim Constantinopoli habenda esset Synodus ( quæ octava œcumenica est ) de causâ Ignatii & Photii, scripsit ad illam Adrianus II. In iis Literis quantum potest attollit Apostolicæ Sedis dignitatem, quæ pro Ignatio adversus Photium pridem sententiam tulerat. Et quoniam obijci poterat, Honorii Decretum fuisse à Sexta Synodo rescissum atque damnatum, in eam rem ita differit. *Licet Honorio ab Orientalibus post mortem anathema sit dictum, sciendum tamen est quia super hæresi fuerat accusatus, propter quam solèi licitum est minoribus majorum suorum moribus resistere, vel pravos sensus liberè respuere.* Hæc Adriani Epistola in *Actio* jam dicta œcumenica Synodo lecta fuit VII. & probata.

Ex illa porro hæc colliguntur: 1. Honorii crimen fuisse *hereseos* crimen, non verò cujusdam neglectûs ut quidam cum  
excu-

excusare conantur, 2 : Fateri Adrianum, fas esse Decretum Pontificium *super hæresi accusare* & illius *prævos sensus liberè respuere* ; adeoque non esse infallibilia illa Decreta , 3 : Tunc fas esse Episcopis *minoribus*, in unum congregatis, damnare Pontificium Decretum ut fecerat Sexta Synodus, cujus Patres Adrianus significat per *τὸ Orientales*, cujusque sanctionem probat. Quid amplius desideratur hodie ab Appellantibus, circa Clementis XI Decretum illo Honorii multò tectius ?

## S E C U L O   X .

**S**UB exitum Seculi noni & initio Decimi miras tragœdias in Sede Romana peperit causa Formosi Romani Pontificis. Is cùm esset etiamnum Episcopus Portuensis & Legatus Apostolicæ Sedis, seu verò, seu falsò, variorum criminum accusatus est, in quibus erat etiam crimen perduellionis. Hinc Joannes VIII Formoso, dignitatem abrogavit, coegitque jusjurandum præstare quo sponderet se in communione laica omni vita permanfurum. Mortuo Joanne, Marinus Romanus Pontifex Formosum crimine & jurejurando solvit, Sedique Portuensi restituit. Post, ipse Formosus ad Apostoli-

stolicam Sedem evectus est. Formoso  
 successit Stephanus VII, homo immani  
 odio in Formosum æstuans : Ne sus-  
 pectos testes proferamus , audiatur Baro-  
 nius, etsi fortassis in ea re aberret quòd  
 de Formoso tam magnificè sentiat : *V;* <sup>Baron. ad</sup>  
*summa collecto conventiculo Episcoporum si-* <sup>ann. 897.</sup>  
*mulque Presbyterorum Cardinalium sui simi-* <sup>n. X.</sup>  
*lium , Formosi venerandum cadaver effossum,*  
*è sepulcro extractum , tanquam viventem*  
*hominem ad iudicium adductum , judicari*  
*voluit atque damnari , & in penam tribus*  
*digitis amputatis in Tiberim demergi.* Jam  
 hoc quidem furere est. At illud magis  
 in rem nostram facit , quòd in eodem  
 conventiculo seu Concilio decrevit Ste-  
 phanus , omnes ordinationes sacras à  
 Formoso factas irritas esse. Hoc quo-  
 que eodem loco fatetur Baronius. *Ad-*  
*jecit perfidus , ut omnes ab eodem Formoso*  
*Pontifice Sacris Ordinibus initiatos exaucto-*  
*raret.* Ac revera multos eò adegit ut no-  
 vam ordinationem susciperent. Stephano  
 proximè successerunt Pontifices aliquot,  
 qui exiguo tempore vixerunt : restituerunt  
 tamen Formosi memoriam, ejus ordinatio-  
 nes ratas esse sanxerunt, rescideruntque acta  
 Stephani cum suo Concilio. Sed anno 907  
 succedente Sergio III, homine ab omni  
 parte scelerato , iterum nova rerum fa-  
 cies apparuit. Ille enim convocata Sy-  
 nodo

nodo Formosum rursus damnavit, ejus acta rescidit, ordinationes irritas pronuntiavit, & excommunicationem vibravit in eos qui à Formoso consecrati sacrorum ordinum munia obire auderent non suscepta nova consecratione.

Solent hîc nonnulli effugium captare ea via, ut quæ in Conciliis suis egerunt Stephanus VII & Sergius III, ad meas facti controversias redigant, in quibus falli posse Pontifices ipsi Transalpini Scriptores fatentur. At nequaquam satisfacit hæc responsio. Omne quidem illud negotium ad facti controversias spectat quod Formosum ipsum tangit, an nempe perduellis, an perjurus, an contra leges Canonum à Portuensi Sede ad Romanam translatus. Verum hîc aliud insuper agitur: an videlicet sacræ ordinationes factæ ab homine perduelli, perjuro, contra leges Canonum ad Pontificatum evecto, irritæ sint, & ita irritæ ut qui à tali homine consecrati fuerint nova consecratione indigeant, perinde ac si numquam consecrati fuissent. Quæ res si ad fidei controversias non pertinet, nec ad illas pertinebit exsecranda hæresis in Concilio Constantiensi damnata, qua statuebatur Papam, Imperatorem, Episcopum &c. desinere esse Papam, Imperatorem, Episcopum, dum in peccatum mortale labitur. Itaque

que decretum fidei contrarium con-  
derunt Stephanus VII & Sergius III, &  
hoc quidem cum Concilio. Certè illos  
erroris arguere non veretur Auxilius se-  
culi X scriptor, qui à Formoso sacris  
initiatuſ erat, & quòd ordinationem va-  
lidam eſſe certiffimè ſciret, noluerat ad  
Sergii Synodum convenire aut novam  
conſecrationem ſuſcipere. Scripſit enim  
pro ſe libellum ad Dialogi formam, duo-  
bus colloquentibus, quorum unus illi *In-  
fenſor* alter *Defenſor* dicitur; ſub Defen-  
ſoris perſona latet ipſe Auxilius: illi in-  
ter alia multa, cùm objeciffet Infenſor  
adverſari eum Romanæ Eccleſiæ, re-  
ſpondet Defenſor: *Aliud ſunt Pontifica-* Lib. 2.  
*les Sedes, aliud Præſidentes. Proinde ho-* cap. 18.  
*nor & dignitas uniuſcujuſque Sedis venera-*  
*biliter obſervanda ſunt. Præſidentes autem*  
*ſi deviaverint, per devia ſequendi non ſunt.*

## SECULO XI.

**S**ylveſter II initio hujus ſeculi Roma-  
nus Pontifex, fuerat prius Rhemen-  
ſium Archiepiſcopus, dicebaturque Ger-  
bertus. Succeſſerat Arnulpho Rhemen-  
ſium Archiepiſcopo exauſtorato. At Pa-  
pa Joannes XV quum Arnulphum ſine  
nutu ſuo de Sede dejici non potuiſſe con-  
tenderet, omnes Episcopos qui in Ar-  
C 2 nulphum



nulphum sententiam tulerant sacris interdixit, Conciliumque adversus Gerbertum convocavit. Gerbertus cernens nonnullos Pontificia censura perterrefieri, scripsit gravissimam Epistolam ad Seguinum Senonensem Archiepiscopum. Multa illic de iniquitate negotii & Pontificiæ auctoritatis abusu disputat; ubi hæc inprimis verba notanda sunt: *Sit lex communis Ecclesiæ Catholica Evangelium, Apostoli, Propheta, Canones Spiritu Dei conditi, & totius mundi reverentia consecrati; & decreta Sedis Apostolica ab his non discordantia.* Censet ergo quædam *Decreta Sedis Apostolica* ab Evangelio, Apostolis &c. *discordare* posse. Quæ porro Gerbertus tum scripsit, adeo nullo pacto oberant legitimæ auctoritati Apostolicæ Sedis, ut non impedierint quo minus ipse deinde Pontifex eligeretur. Sed nec ille Pontifex factus, quæ prius egerat aut scripserat, revocavit.

Eodem seculo floruit S. Petrus Damiani. Hujus in celebri Epistola ad Alexandrum II Pontificem, hæc sunt:

*Lib. 1. Petrum planè in faciem resistens Paulus ob-*  
*Epist. 12. jurgat, & coram omnibus reprehensibilem*  
*judicat: quod ille non in accusationis tulit*  
*injuriam, sed benignè & patienter accepit;*  
*quod non ex livore sed ex caritate procedere*  
*perspicuè recognovit. Sed ecce, dicitur:*  
*Ego*

Ego sum Episcopus, Ego sum Pastor Ecclesie: Non debeo à commissis ovibus accusationum patere molestiis: Etenim in causa fidei dignus sum etiam in pravis moribus equanimiter ferri. Sed dic mihi, quisquís es, numquid legisti quod in Evangelio scriptum est: Si peccaverit in te frater tuus &c. Si Ecclesie ergo referenda est causa quorumlibet fratrum, quomodo non etiam sacerdotum? Porro si sacerdos qui in Ecclesia peccat, dedignatur in Ecclesia discuti, quis jam ferat Ecclesie se legibus coerceri? Fateor hunc Scriptorem non agere eo loco nominatim de Romano Episcopo, sed de Episcopis generatim: verum cum exemplum B. Petri proferat, apparet eum Petri Successores itidem ut alios Episcopos sua disputatione attingere. Quòd autem non de controversiis tantum ad personarum causas pertinentibus, sed etiam de causis fidei agat, ipse totidem verbis profitetur.

## S E C U L O XII.

Q Uod hìc proferendum est exemplum, ad VIII seculum referri poterat: At cum is qui Pontificis Decretum liberrimè rejicit XII seculo vixerit (Gratianus nempe Canonum Collector) ad hoc seculum non incommodè

adscribetur. Res ita se habet. Gregorium II Pontificem consuluerat Bonifacius Germanorum Apostolus de variis suis dubitationibus. Consuluerat autem, non ut disceret privatam Pontificis opinionem, sed

Tom. 6.  
Concil.  
Labbe.  
Col.  
1448.

*Qualiter seruet vel doceat . . . . Sancta Apostolica Romana Ecclesia.* Hinc & Pontifex in responsione sua planè profitetur, se nomine Apostolicæ Sedis, adeoque *ex Cathedra* loqui; ait enim: *Beatus Petrus Apostolatus & Episcopatus principium existit: & consulenti tibi de statu Ecclesia, non ex nobis quasi ex nobis, sed ejus gratia qui aperit os mutorum . . . qualiter tenere debeas, Apostolici vigoris doctrinam dicimus.* Quid igitur fiet de infallibilitate, si Pontifex tam solemniter definiens erraverit? At erravit certè. Secundo enim loco inter quæsitæ sua, interrogabat Bonifacius: *Si mulier infirmitate correpta, non valuerit debitum viro reddere; quid ejus faciat jugalis?* Res sanè non valdè difficilis est, si Christum audiamus. Et tamen hoc modo respondet Gregorius: *Bonum esset si sic permaneret ut abstinentia vacaret. Sed quia hoc magnorum est; ille qui se non poterit continere, nubat magis.* Quid ad hæc autem Gratianus Decretorum Collector? Credititne irreformabile esse illud Gregorii Decretum? Imo verò quamvis privatus tantùm Scriptor, hanc notam

notam ei non veretur subjicere : *Illud* Decreti  
*Gregorii sacris Canonibus , imo Evangelica* part. 2.  
*& Apostolica doctrina penitus reperitur ad-* causa 32.  
*versum.* Adco nondum animos occupa- quest. 7.  
 verat opinio de Pontifice falli nescio. cap. 18.

## SECULO XIII.

**A**D hoc seculum revocamus contro-  
 versiam de dominio Franciscano-  
 rum : etsi enim illa in sequenti seculo ma-  
 jores tumultus pepererit , hoc tamen se-  
 culo inchoata est ; & hoc seculo condi-  
 tum est Nicolai IV Decretum quod  
 omnium planissimè & acerrimè pro Fran-  
 ciscanis pronunciat. Res ipsa omnibus  
 penè nota est. Contendebant nempe  
 Franciscani , suam paupertatem *altiore* ,  
 ut loquuntur , & severiorem esse omni  
 alia ; ea re , quòd librorum etiam , su-  
 pellectilis , vestium , cibi ac potus , do-  
 minium saltem *in communi* haberent ce-  
 teri Monastici Ordines ; Franciscani au-  
 tem , ne illud quidem ; sed omnium re-  
 rum *usum* tantummodo , dominio penes  
 Pontificem remanente. Ita S. Francisci  
 Regulam interpretatus est Greg. IX ;  
 ac post illum alii Pontifices. Ac cùm  
 illud discrimen *usus & domini* in hujusce-  
 modi rebus quæ usu absumuntur , non  
 satis serium quibusdam videretur , cò

progressus est ardor illorum *altissimè* pauperum, ut Christum ipsum & Apostolos illius discriminis auctores facerent, quos videlicet omni dominio etiam cibi & potus caruisse vellent. Mirum sanè Nicolaum IV ejusmodi opinionem solemnī Decreto *Exiit* voluisse firmare; voluit tamen & ita decrevit: *Dicimus quòd abdicatio proprietatis hujusmodi omnium rerum, non tam in speciali, quàm etiam in communi, propter se meritoria est & sancta, quam & Christus viam perfectionis ostendens verbo docuit & exemplo firmavit: quamque primi fundatores militantis Ecclesiæ prout ab ipso fonte hauserunt volentes perfectè vivere per doctrinam & vite exempla in eos derivarunt.* Et, quod magis mirèris, *in aliter sentientes excommunicationis sententiam profert, à quâ per neminem, nisi per Romanum Pontificem, possint absolvi.* Hæc doctrina Franciscanis perhonorifica, ut illis quidem videbatur, atque insuper non incommoda (neque enim idcirco parciùs aut viliùs illis victitandum erat quòd cibi usum non dominium haberent) altissimè illorum mentibus insedit, & nunc etiam videtur insidere. Verumtamen Joannes XXII Franciscanis non amicus; & quem fortè tædebat illius domini unde ad se nihil præter inane nomen rediret, longè aliud Decretum edidit,

dit, quo illud idem quod Nicolaus interposita anathematis comminatione sentire jusserat, ipse pro hæresi habet; sic enim decernit: *Assertionem hæreticam esse, per-* *Extra-  
vag. cum  
inter  
nonnul-*  
*tinaciter affirmare quod Redemptori nostro*  
*prædicto ejusque Apostolis, iis quæ ipsos ha-*  
*buisse Scriptura Sacra testatur, nequaquam*  
*jus ipsis utendi competierit; nec illa venden-*  
*di seu donandi jus habuerint, aut ex ipsis a-*  
*lia acquirendi.*

Quin eò progressum est negotium, ut Franciscani non ferentes sibi eripi illud tantopere adamatam paupertatis genus, in Pontificem insurgerent, hæreticum proclamarent, atque incitarent Cæsarem Ludovicum Bavarum, cui alia cum Pontifice diffidia erant, ut Joanni Pontificatum abrogari curaret, aut alium certè Pontificem ei objiceret: quod re ipsa contigit: Curavit enim Cæsar eligi Anti-Papam ex Franciscanorum Ordine; cui nomen Petrus de Corbaria: ille autem se nominavit Nicolaum V. His rebus omnibus ita in Franciscanos excaudit Joannes, ut plures ex illis comprehensos pro hæreticis cremari jusserit. Tantus erat utrimque ardor opinionis tuendæ.

Possent hic reponi totum illud negotium ad fidei controversias non pertinere. Id quidem non ægrè fatebor. Sed illud magis illos Pontifices errasse evin-

cit. Si enim ad fidem pertineret, alter tantummodo eorum aberrasset: cum autem ad fidem non pertineat, errant ambo dum opinionem incertam & ridiculam controversiam ad fidei dogmata referunt. Nec enim, ut norunt omnes, errat minùs qui fidei aliquid superaddit, quàm qui de illa aliquid detrahit.

*Statera  
Rationum  
&c. per  
Anton.  
Parmen-  
tier S. T.  
D. Levan.*

Cùm hæc scribo, ecce tibi novum libellum Lovanii editum, qui ad ejusmodi argumenta aliam responsionem dandam esse contendit. Scriptio equidem est jejuna, quæ & rerum Theologicarum imperitiâ, crassissima argumentandi ratione, Latini sermonis puerili inscitia horridaque barbarie, Auctorem prodit ab omni parte ad scribendum imparatum: ut nemo illum Doctorem Theologum esse conjiceret, si non appareret in titulo istud nomen. Itaque illius nullam sanè mentionem injecissem, nisi utile esset monere quàm assiduè laceessant adversarii; simulque cursim refellere novam quandam Pontificiæ infallibilitatis ideam quam hodie nonnulli sufficere putant, ut respondeatur plerisque argumentis ab Ecclesiastica historia petitis.

Miratur itaque Doctor iste virum quendam clarissimum hoc argumento usum. adversùs Pontificiam infallibilitatem: *Quèd in Decretalibus plura Pontifi-*

cum Romanorum irruerantur responsa omnino infundata; quedam etiam sibi invicem contraria. At enim, si vel ullum scriptorem celebrem de hujusmodi controversiis consulisset Doctor noster, comperisset hanc argumentandi rationem frequenter usurpatam esse; neque velut rem novam admirabundus ita narraret; *Vidi ego circiter à biennio &c.* Sed novane an vetus sit hæc argumentatio, quin eam saltem refellit? Quin docet valido aliquo argumento Decretales non esse ex iis Responsis quæ *ex Cathedra* redduntur? Fallitur enim multum si existimat *ideam justam infallibilitatis* aut Pontificiæ Cathedræ habendam illam quæ solius *Antonii Parmenier* auctoritate munita ostentatur. Nam, si nescit, hæc ejus *idea* longè illi dissimilis est quas alii Pontificiæ infallibilitatis vindices protulerunt. Hi enim omnes de vocibus *ex Cathedra* consentiunt, de re ipsa mirum quantum dissentiant: ut vel hinc appareat nullo firmo fundamento superexstructam esse illorum doctrinam. Aliter enim Bellarminus, aliter Cellotius, aliter Christianus Lupus, aliter alii responsionem *ex Cathedra* finiunt. Jam id quidem satis est ut respondeatur Doctori nostro quoad rem hanc: cum enim ille *ideam* suam ne vel colore quidem auctoritatis aut argu-



mentationis illustrare conetur, potest eâdem operâ rejici quâ est prolata. Nec tamen inutile fuerit hoc loco (quo à Decretalibus argumentum sumsimus) breviter refellere *ideam* illam, in qua & alii quidam horum temporum scriptores delicias faciunt; illudque ostendere, nihil minùs eam esse quàm *justam*; ac præterea eam opinioni Doctoris nostri non parum incommodi creare.

§. 23. *Dicendum itaque, inquit, Pontificis Romani infallibilitatem tantùm agnosci in casu quo ex Cathedra docens, hoc est assumpta plenitudine potestatis aliquid decidit in materia fidei aut morum, volens obligare totam Ecclesiam ad ita credendum. Hæc scilicet est illa idea justa quæ penè tot ambigua habet quot vocabula. Quid illud inprimis sibi vult: tantùm agnosci in casu &c.? An ita agnosci ab Antonio Parmentier? Atqui non erat cur istud tantoperè inculcaret: nec enim de illius sententia vulgo solliciti sunt homines. Si verò ita intelligat; istud idem agnosci ab omnibus Pontificiæ infallibilitatis patronis, profectò aut fallit aut planè fallitur. Sic enim Bellarminus ferè & qui eum sequi solent. At longè aliter alii: sunt enim qui volunt insuper necessarium esse ut Decreta affixa fuerint in acie campi Floræ & aliis locis consuetis; adeo ut nonnulli*

*De R. Pont. fctitia infallibilitate. 61*

nulli existiment etiam aliquod spatium temporis requiri quo affixa esse debuerint ; imò si intra illud spatium jussu Pontificis fuerint refixa & detracta , indicio illud esse , nec Cathedratica , nec Infallibilia fuisse. Quæ quidem ipsius Vasquezii opinio esse videtur. Alii rursus requirunt ut Pontifex debitè oraverit , rem ritè consideraverit , *non solus nec temerè* judicaverit. Ita Cellotius ; & , si rectè memini , etiam Bagotius , duo celebres Jesuitæ. Alii omnino necessarium volunt ut cum Concilio aliquo , saltem Diœceseos Romanæ , pronunciet Pontifex. Singulorum verbis referendis supersedeo : tum quòd multis nota sint ; tum quòd eorum præcipua recenscantur in libello qui multorum manibus teritur & teri dignus est , cui titulus : *Imago Pontificia dignitatis* cap. 4. Tantum igitur abest ut qui infallibilitatem istam jactant , idem sentiant , ut non minùs secum ipsi quàm cum infallibilitatis impugnatoribus dissentiant. Quod quid aliud indicat nisi nullam hæctenus *ideam justam* illius doctrinæ traditam esse aut tradi posse ? Nec minus ambigua sunt cetera Doctoris nostri : dum enim illud *ex Cathedra docens* , ita interpretatur ; *hoc est , assumpta plenitudine potestatis* , quid aliud agit quàm ut obscurum , quod ajunt , per

obscurius exponat? Namque ut omnittam illam plenitudinem potestatis soli Christo in Ecclesiam rectè tribui; quid, obsecro est, plenitudinem potestatis assumere? An illa ad integumentum morem nunc assumitur, nunc ponitur? An ad Pontificis voluntatem nunc cum comitatur potestas illa, nunc absistit?

Deinde ad materiam fidei & morum Pontificis infallibilitatem restringit hic Auctor. At non ita Jesuitæ Parisienses Collegii Claromontani, cum Thesibus publicis propugnarunt, eandem infallibilitatem Pontifici concessam esse quam Christus ipse habuit: Non ita ipse Antonius Parmentier cum duplici Scriptione Gallica infallibilitatem istam, etiam ad explicandum alicujus libri sensum protendit.

Preservatis: Se-  
cond præ-  
servatis.

Denique requirit, ut Pontifex velit obligare totam Ecclesiam ad ita credendum. Hæc quidem clausula multis illius opinionis Scriptoribus familiaris est; & est tamen fallacissima. Nusquam enim eloquuntur censeantne opus esse, ut Pontifex disertè pronunciet hæc aut his similia: *Se velle obligare totam Ecclesiam: Se præcipere omnibus & singulis Christi fidelibus*; an verò illis sufficiat ex ipso Decreto apparere hanc Pontifici mentem esse, illumque ut de rebus ad Catholicam fidem pertinentibus pronunciare? Jam illud fateor penè ridiculè interrogari:

ri : quis enim non videat ineptum esse si conceptis verborum formulis velut aligetur Decreti alcujus indubitata veritas? Et tamen sic ineptire solent adversarii. Objice illis Honorii literas , Ecclesiæ suæ fidem exponere volentis , atque ita perorantis : *Hæc nobiscum Fraternitas vestra prædicet, sicut & nos ea vobiscum unanimiter prædicamus* : Regerent, eum ex Cathedra locutum non esse. Quidni? Nempe uni tantummodo Patriarchæ , non omnibus fidelibus inscriptæ sunt literæ.

Quære item à Doctore nostro cur illi tam absurdum videatur si à Decretalibus argumentum fuerit petitum adversus Pontificis infallibilitatem , cum tamen illic sæpè Pontifices interposita anathematis poena quidpiam credi jubeant aut vetent? Fallor si aliud responsum daturus est, præter hoc : Decretales non universæ Ecclesiæ sed privatis Episcopis aut Presbyteris &c. inscriptas esse. Cogimur itaque adversarios ita interrogare , atque ita argumentari quasi dubium sit quo pacto sint responsuri : velintne scilicet quibusdam vocibus connexam esse infallibilitatem ; an verò sufficiat Pontificem de fidei negotio, quibuscumque tandem formulis utatur , pronunciare. Si postremum illud sufficere responderit , jam nulla causa est cur Honorii literas , cur

Gre-

Gregorii II, cur Nicolai IV, cur Joannis XXII, cur Bonifacii VIII, atque aliorum ejusmodi Décreta, Cathedratica non esse contendant: jamque immeritò negabit Doctor noster, à Decretalibus argumenta peti posse; nam illæ non nisi quoad verborum formulas diversæ sunt ab iis Decretis quæ ipse è Cathedra proficisci fatetur. Sin velint requiri ut disertis verbis Pontifex *omnes & singulos fideles* alloquatur, aut disertè enunciet se velle *obligare totam Ecclesiam*; tum verò quantum incommodi ipsi doctrinæ suæ pariant, considerent.

Primum enim: Non eo stupore arbitror esse Antonium Parmentier, ut nesciat ejusmodi formulas familiares non fuisse Pontificibus ante hæc postrema secula. Ex quo consequitur aut omnes priorum seculorum Pontifices *justam ideam* suæ infallibilitatis non habuisse: aut illa uti noluisse cùm maximè opus esset.

2. Ex quo præterea consequitur nec Concilia, nec Patres, ejusdem rei *justam ideam* habuisse: cùm nemini in mentem venerit auctoritatem Decretorum Pontificiorum ex verbis quibus concepta erant, metiri. Itaque usque ad tempora hæc novissima, omnis Ecclesia caruerit *justâ idcâ* illius auctoritatis, à qua, si fides Romanorum assentatoribus, omnis alia  
Eccle-

Ecclesiastica auctoritas ut à fonte originem ducit. Quod ut absque impietate dici nequit, ita corruat necesse est ridicula infallibilitas, quæ formulis verborum tota innititur.

3. At quod maximè premit adversarios, si ad formulas illas restringi velint infallibilitatem, jam planè corruunt pauca illa argumenta quæ à Patribus petere solent. Ubi enim illud tantoperè admatum totiesque repulsum : *Causa finita est* ? Certè Innocentii I Decretum, de quo illuc mentionem injicit Augustinus, *non omnibus & singulis Christi fidelibus*, sed Africanis Episcopis mittebatur : atque adeo, si formulis inhaerendum est, Cathedriticum non erat ; proindeque nihil ad causam faciet Augustini testimonium. Eadem ratione illud S. Hieronymi ad Damasum de tribus hypostasibus interrogans, ac velut à Damasi responsione pendens, nihil ad causam faciet : non enim Decretum ad omnes & singulos Christi fideles, sed privatas ad se literas Hieronymus flagitabat. Rursum cum de S. Leonis celeberrima Epistola, laudibusque ei tributis, & ea voce, *Petrus per Leonem locutus est*, different, extra causam loquentur : nec enim ea ad omnes Christianos sed ad solum Flavianum scripta erat. Qua igitur fronte ii qui Honori

rii

rii literas idcirco Cathedratikos esse negant quod ad solum Sergium Patriarcham scriptæ sint, argumentum petere audebunt à S. Leonis literis quæ ad solum Flavianum Patriarcham scriptæ erant? Aut igitur sua illa quotidiana argumenta abjiciant; aut aliquando fateantur non ex titulo aut conceptis formulis, Decretorum auctoritatem æstimandam esse.

Hæc quamvis breviter ac per transennam tantum notata, satis, ut opinor, declarant quàm fragilis sit & ruinoso fundamento superexstructa doctrina adversariorum, cum post tot literaria prælia, necdum inter eos constet quænam Pontificum Decreta Cathedratica & infallibilia censeri debeant. Atque illud præterea, aut nullo loco habendas esse eas voces *Ex Cathedra*: aut si aliquid significant, Pontificem certè & quemcumque alium Episcopum *Ex Cathedra* sua pronunciare, cum de rebus ad fidem pertinentibus decernit ac docet, quibuscumque tandem verbis sanctiones conceptæ sint. Rectè igitur ex quibuscumque Pontificum Decretis, ubi de fide agitur, argumenta peti possunt adversus illorum infallibilitatem; sive illa *Brevia* sint, seu *Bulla plumbea*, seu *Litera ad universos Christi fideles*, seu *Decretales*, seu quocumque tandem nomine censeantur. Quin illud verè

verè dici p̄teſt (quamlibet id mirum videatur Antonio Parmentier) non aliundè validiora argumenta quàm à Decretalibus peti. Si enim excipias has voces, *omnibus & ſingulis Chriſti fidelibus*, nuſquam plures & magis ambitioſæ verborum formulæ occurrent quàm in Decretalibus. Paſſim enim *anathema*, *excommunication*, *herēſis*, ſimileſque voces illic à decernentibus Pontificibus uſurpantur. Adde quòd & iſſis Pontificibus mens fuerit ſummam auctoritatem Decretalibus attribuerè, cùm eas in unum colligentes, veluti totidem Chriſtianorum leges ſuo Codici Eccleſiaſtico inferi voluerint. Eat igitur Doctor noſter, quæratque *ideâs* paulò *juſſiores*. Lectoris interim animum non offendet, ut arbitror, hæc veluti excuſſio : quæ & argumenta noſtra firmare & adverſariis evaſiones præcludere poſſit.

Vix hæc ſcripſeram, cùm opportunè *Differtatio de præſenti hæreſi &c.* ad rem iſtam proſilit alius libellus à P. Philippo Wavrio Ordinis Eremitarum S. Aug. editus : qui equidem quoad argumentorum robur nihilo prioribus felicior, quoad impropria nihilò mitior eſt ; ſed habet tamen quædam huc pertinentia ; quibus apertiùs & candidiùs iſtis ſuam *Cathedram* exponit ; *ideamque* infallibilitatis aliam profert. Quocirca ſupervacuum non



non erit, illa occasione alteram hinc, sed brevem, excursionem facere.

Is itaque sentiens quàm absona sit illorum opinio, qui volunt definitionem Pontificiam, ut Cathedratica censeatur, inscribi debere *omnibus Christi fidelibus*, quò videlicet doceat universam Ecclesiam, commentum illud rejicit, etsi admodum modestè ne istos sat potentes offendat.

Cap. 5.

Art. 3.

*Sanè, inquit, mirum videretur, quò privilegium S. Petro datum pro confirmandis Fratribus in fide, non nisi ad omnes simul confirmandos pertineret, non autem ad unam partem orbis V. G. Africam vel Europam; ac si omnes simul docens infallibilis esset, docens verò partem orbis, esset fallibilis.*

Cap. 4.

Art. 3.

*Quapropter, ut jam dixerat, quando Papa dogma aliquod pro heretico habendum sub anathemate precipit, indirectè hoc ad omnem sub cælo Ecclesiam pertinet in actu primo, Ubi tamen ne quidem illud requirere Wavrium arbitror velut omnino necessarium, ut voces ille *hæreseos* vel *anathematis* disertè usurpentur, cùm ipse timidè quidem fateatur, sed fateatur tamen, Honorii Literas Cathedricas fuisse, in quibus voces illæ non occurrunt.*

Rectè hæc (ut mihi quidem videtur) Wavrius, si solam *Cathedra* notionem attendas. Quin si id omnibus infallibilitatis patronis probaretur, jam non toties  
utrim?

utrimque supervacuè litigaretur, sed compendiaria ad veritatem via pateret. Verùm nunc ille consideret, quænam ex illius opinione consequantur.

1. Hæc quidem Cathedræ idea Wavrio probatur, & fortè etiam sex illius Approbatoribus. Sed ideam illam quam rejicit Wavrius, ut perpetuum adversus errantium Pontificum exempla perfugium, amplectitur Bellarminus, & qui cum magno numero sequuntur; in quibus & Mechliniensis declamator & Doctor Parmentier de quorum libellis verba fecimus. Alii ab utrisque dissentiunt. Ex quo novum robur acquirit argumentum desumptum à dissidio domestico illorum qui infallibilitatis ideam tradere contendunt.

Conatur quidem respondere Wavrius ad istud argumentum, quod & in aliis nuperis scriptionibus usurpatum fuerat; sed, ut in mala causa necesse est, infelicitè. Dicit enim dissidium illud non versari circa infallibilitatem ipsam, sed circa modum quo Pontifex sit infallibilis: quæstiones verò quæ ad rei modum tantum pertinent, non impedire quo minus de re ipsa consentiant; quam responsionem tribus exemplis talium controversiarum confirmat.

*Ibid.*

Fa:

Fatendum sanè id in nonnullis controversiis evenire : sed fatendum vicissim multas esse rursus controversias in quibus rei modus ad ipsam rei essentiam pertinet. Exempla obvia sunt. Calvinistæ quidam ita controversiam de Eucharistia cum Catholicis (& impensius etiam cum Lutheranis) componere studuerunt, ut dicerent credendum quidem Christum illic verè, realiter, imò substantialiter præsentem esse; at liberum esse & à fide alienum, quo modo id fieret disputare, præsentia corporeâ, an per fidem tantum. Nec tamen consenserunt Catholici aut Lutherani quæstionem illam de modo rei ad rem ipsam nihil facere.

Rursus ipsi Calviniani eodem more Socinianos & Remonstrantes repellunt. Hi enim fatentur credendum esse Jesum esse Dei Filium; sed quo modo sit, an naturâ, an per adoptionem, an per solam conceptionem de Spiritu Sancto, id verò negant ad fidei fundamenta pertinere. Nec tamen callida istorum hæreticorum responsio Catholicis, Lutheranis aut Calvinianis satisfacit. Quin ad istum Episcopii, nominatissimi inter Remonstrantes Scriptoris, cavillum pro meritis excandescens eruditus Calvinista Jurius, ita exclamat : *At ô vos cecos! Nullane igitur sunt fidei capita, in quibus rei modus nihilo-*

*Tableau  
du Socin-  
ian. Lett.  
IV.*

*De R. Pont. fœctitia infallibilitate. 71*  
*nilominus quàm res ipsa necessariò creden-*  
*dus est? Quod deinde vel ipsis Remon-*  
*strantibus fatendum esse, planum facit.*

Atque ut argumento *ad hominem* utar;  
ipse Wavrius frequenter laudandis cona-  
tibus impugnavit hanc Jesuitarum calli-  
ditatem, controversiam Ecclesiæ cum  
Pelagianis, circa Gratiæ necessitatem u-  
nicè versatam fuisse; non verò circa mo-  
dum quo Gratia in humanas voluntates  
operaretur. Quibus ille ex Augustino  
ostendebat, modum istius operationis ad  
ipsum causæ cardinem pertinere.

Cùm igitur negari nequeat rei modum  
sæpè à rei essentia separari non posse, su-  
perest an non id locum habeat in hac  
causa. Quod quidem planè existimo.  
Adeo enim iste modus ad ipsam infalli-  
bitatis existentiam pertinet, ut nullum  
fortasse ab Ecclesia condita Decretum  
Pontificium editum sit, quod ex consensu  
omnium infallibilitatis patronorum, si  
suar quisque opinioni inhærere velit, in-  
fallibile censendum sit. De singulis De-  
cretis id ostendere, res esset magni volu-  
minis: Sed tamen vel hoc solo argumen-  
to ostendi posse arbitror: Ante novissi-  
ma secula vix ullum occurrit Decretum  
Pontificium ad omnes Catholicos scrip-  
tum; itaque illa omnia fallibilia habenda  
sunt ex sententia eorum qui requirunt  
ut

ut disertè loquatur ad universos fideles. At his novissimis seculis, frequenter quidem illa formula usi sunt Pontifices, sed vix ullum istorum cum universo Cardinalium Collegio, aut Synodo suæ Dioceseos condiderunt; quo pacto igitur infallibilia erunt, ex sententia eorum qui infallibilitatis Cathedram constituunt non in solo Pontifice, sed in Pontifice aut cum cœtu Cardinalium suorum, aut cum Clero Romano pronunciante? Et quid si præterea quodque Decretum exigatur ad conditiones quas alii insuper requirunt? Ex his consequitur non tam ad modum quàm ad rem ipsam Scriptorum istorum diffidia pertinere. Cùm enim extra Cathedratica Decreta nullam Pontifici infallibilitatem inesse omnes fateantur, qui de Cathedra illa dissentit, de ipsa infallibilitate dissentit.

2. Ut rationi magis consentanea est opinio Wavrii, ita illud habet molestum quòd argumentis magis quàm alia premi & opprimi possit. Isti enim qui Decreta ad universam Ecclesiam dirigi debere volunt, hac sua recenter excogitata Cathedra respondent multis argumentis e Traditione petitis. At ubi semel convenit Pontificem ex Cathedra loqui, quotiescumque in fidei negotiis aliquid decernit; jam fit multo faciliùs ex Patrum  
&

& Conciliorum testimoniis planum facere, Pontifices sic loquentes errare posse.

3. Fit item facillimum, hac hypothesi admissa, exemplis evincere Pontifices ex Cathedra docentes reipsa errasse. Itaque rogo P. Wavrium ut hypothesi suæ inhærens, perpendat testimonia & exempla quæ hic breviter commemorata sunt: ac dein sibi persuadeat, id quod est verissimum, non esse nisi exiguam partem eorum quæ partim proferri, partim ulterius protendi possint: atque eadem bona fide qua in Honorii causâ usus est, statuat an non assiduè illic occurrant Decreta Cathedratica in quibus Pontifices aut errarunt aut certè vel errasse vel errare potuisse judicati sunt.

4. Quin vel ex solo Honorii exemplo, in quo rei veritatem partim agnoscit Wavrius, partim alia rursus responsione eam implicare conatur, perspiciat tandem quàm ruinosa sit illa infallibilitatis Cathedra. Profert ipse quatuor ad illud exemplum responsiones: (præcipuam tamen Bellarmini responsionem de non *intellectis Honorii Epistolis*, omittit; fortè quòd eam incommodam sentiret alteri suæ opinioni de infallibilitate in explicando cujuscumque libri sensu): Ex illis responsionibus fatetur tres sibi non placere: illam ergo quæ superest eum amplecti cen-

D

sendum

Cap. 5.  
Art. 3.

Action.  
XIII  
Concilii  
VI.

sendum est, quamvis nec istud disertè edicat. Hæc verò illa est qua dicitur, *Honorium in dogmate non errasse, neque sensisse cum Sergio; sed in modo agendi, non satis fortiter resistendo, & concedendo ut à verbis abstineretur per quæ hæresis magis erat discernenda à Catholico dogmate.* Amor enimvero non sensisse Wavrium, hîc sibi totidem verbis responderi posse quibus ille proximo Articulo Bellarmino & Desirantio responderat. Etsi enim daretur veram eam esse responsionem, illud semper manet, aliter judicasse Concilia VI, VII, VIII, ac damnasse Honorii Literas tamquam *sequentes doctrinas hæreticorum, alienas ab Apostolicis dogmatibus &c.* quin unis iisdemque vocibus damnasse Literas Sergii & Literas Honorii: ipsius verò Honorii nomen promiscuè inter nomina aliorum Monothelitarum Pyrrhi, Pauli, Sergii, Cyri, recitasse & pariter damnasse. Manet ergo, tria œcumenica Concilia judicasse Literas Honorii hæreticas esse: manet ex confessione P. Wavrii eas literas Cathedratikas fuisse. Vincat ergo eum veritas, & fateatur solo Honorii exemplo corruere infallibilitatem. Sed excursionum satis sit. Nunc seculorum ordinem percurrere pergamus:

SECULO XIV.

**Q**Uamquam hoc seculo celebris fuerit controversia de doctrina Joannis XXII circa statum justorum mortuorum usque ad supremi judicii diem, illam tamen hic præteribimus: tum quod jam vulgo nota sit; tum quod ad seculum XIII argumentum jam peti- tum sit ab alio Joannis XXII Decreto.

Aliud hoc seculo, nec ita passim notum, Pontificis testimonium reperitur: videlicet Gregorii XI Testamentum, Tom. 6.  
Spicilegii. quod ex MS. Codice edidit celeberrimus Lucas Dacherius, Ordinis Benedictini non minimum decus. Illic ita loquitur Pontifex: *Item volumus, dicimus, & protestamur, quòd si in consistorio, IN CONCILIO, vel in sermonibus, vel in collationibus publicis vel privatis . . . dixerimus erronea contra Catholicam fidem, quam coram Deo & hominibus, ut tenemur, præceteris profiteamur, colimus & colere cupimus; seu forsitan adherendo opinionibus contrariis fidei Catholica; scienter, quod non credimus, vel etiam ignoranter; aut dando favorem aliquibus contra Catholicam Religionem obloquentibus; illa expressè & specialiter revocamus, detestamur, & haberi volumus pro non dictis.* Ubi palam est Pontificem



tificem non dubitare quin fieri potuerit ut *adhaereret opinionibus contrariis fidei Catholicae* ; easque promiserit non modò in privatis collationibus, sed & *in Concilio* ; atqui si usquam , certè in Concilio *ex Cathedra* loquitur.

Hic illud præterea notare liceat, quantum illæ tam humiles voces moribundi Pontificis diversæ sint ab istis *Literis* solo nomine *Apostolicis* ; quibus feralis schismatis signum quodammodo erigitur adversus eos Episcopos, quorum ætatem, doctrinam , pietatem , aliasque insignes dotes ipsi nonnumquam adversarii commemorant : qui tamen etsi probè sentirent quanta vulnera Catholicæ fidei infligeret Constitutio *Unigenitus* , non postulaverant ut eam Constitutionem Pontifex *revocaret & detestaretur* (quod sanè facturus erat Gregorius XI si quod ei tale Decretum extortum fuisset) sed illud saltem , ut dilucida expositione earum opinionum quas damnare vellet, pacaret animos tot Episcoporum , Pastorum , Academicarum , Capitulorum , Religiosorum , ac Laïcorum : quibus illa Constitutio pepererat summum dolorem, summum timorem ne ipsa Religionis Christianæ elementa illic damnata essent, & ab se etiam damnari juberentur : quem heu ! timorem justum fuisse nihil magis con-

confirmat, quàm ipsa illa asperitas omnis expositionis spem auferens, & summo factu despiciens tot illustres viros tam diu supplices; qui summam in Pontificem reverentiam, penè cum dispendio veritatis, semper professi fuerant.

## SE C U L O X V.

**Q**uatuordecim priora Ecclesiæ secula; quibus Ecclesiæ Gallicanæ doctrinam incognitam fuisse Mechliniensium Præsul affirmaverat, emensi sumus: poteramusque proinde de insequentibus seculis silere; quibus multos illius doctrinæ vindices fuisse, nec ipsi adversarii negant. Vilem est tamen ad secula illa aliquid superaddere: ad singula nempe, considerationes quasdam quæ doctrinæ Gallicanæ etiam his seculis perseverantem firmitudinem, paucis verbis commonstrare queant.

Ut itaque ad seculum XV progrediamur, non hîc proferri tantum possunt privati scriptores, iique inter sui ævi præcipuos, recensendi, nempe Petrus de Alliaco Cardinalis Cameracensis, Joannes Gerson, Alphonsus Tostatus Episcopus Abulensis, de quorum sententia nemo istarum rerum non planè ignarus dubitat: sed universum Basileense Conci-

lium. Illud enim in Epistola Synodica, quæ Sess. 3 lecta & probata fuit, ita scribit: *Si Concilium errare possit; CUM CERTUM SIT PAPAM ERRARE POSSE; tunc & Papa & reliquo toto corpore errantibus, tota erraret Ecclesia, quòd esse non potest. Experientia etiam demonstrat: quia sæpè experti sumus & legimus, Papam, licet caput & principalem partem, errasse; reliquum autem corpus, Papa errante, errasse numquam legimus. Propterea reliquum sæpè totum corpus condemnavit aut excommunicavit aut deposuit Papam, tam ratione fidei quàm morum.* Scio tantùm abesse ut adversarii Concilium illud pro œcumenico habeant, ut potius cum Bellarmino suo passim omnibus probris onerent. At quàm sine idonea ratione ista dicant, affatim demonstratum à viro summo Antonio Arnaldo: Legi potest Parte Secunda hujus Dissertationis.

Verùm etsi daretur tantisper, non fuisset generale Concilium, vix inde aliquod robur amittet testimonium ejus. Namque Eugenius IV qui Concilium dissolvere se posse in animum induxerat, Bullam edidit quâ suas in ea re molitiones irritas esse ipse jubet, ac profitetur Concilium Basileense ab initio ad illud usque tempus fuisse & esse legitimum. Ea Bulla condita est circa tempora Sessionis.

74 , & lecta ac probata est Sessio-  
ne 16. Porro , ut jam diximus , Epistola  
Synodica Concilii lecta & probata fuerat  
Sessio 3 , atque adeo dubium esse ne-  
quit quin & illam Eugenius probaverit  
suo Decreto. Si itaque errarunt sic do-  
centes Basileenses Patres , erravit & ipse  
Eugenius eorum gesta confirmans. Ne-  
que ullo colore dici potest eum *ex Cæ-  
thædra* locutum non esse : quandonam e-  
nim apertius universam Ecclesiam docet,  
quàm ubi Concilium aliquod à plurimis  
pro generali habitum aut comprobatur aut  
rejecit?

Quin si & Concilii & Eugenii aucto-  
ritas seponi posset , quantum tamen pon-  
dus haberet testimonium tot Cardina-  
lium , Episcoporum , & celeberrimorum  
undique Doctorum , quibus Synodus illa  
constabat ; qui non velut incertam opi-  
nionem , sed ut communem omnium do-  
ctrinam tradunt , *certum esse . . . Papam ,  
licet caput & principalem partem , errare pos-  
se !* Non ita sanè loquuntur qui novas o-  
piniones introducere moluntur. Nec  
ipsorum hæreticorum impudentia eò pro-  
gressa est , ut dicere auderent doctrinam  
suam in Ecclesia Catholica certam haberi.  
Vix enim illa non hæreticorum , sed  
stultorum esset. Quoties Lutherus &  
Calvinus aliique ex istis facti sunt , nemi-

nem ante se iis temporibus Protestantium dogmata tradidisse, sed *se discessionem ab orbe terrarum fecisse* ! Tantum aberat ut dogmata sua passim certa haberi jactarent. Quantò minus tot viri orthodoxi, dignitate aliisque dotibus insignes, tam stultè in re omnibus aperta mentiri auderent, & publicam infamiam sibi consciscere ! Sed ultra progredi juvat. Fac ita insanisse Basileenses ut *certum* dicere auderent, quod ante 30 annos nemini Catholico in mentem venerat, ut vult Mechliniensis Archiepiscopus. An & Eugenio, & Concilio Florentino quod ille Basileensi opposuit, sic in Basileensium gratiam libuit insanire, ut hunc illorum tantum errorem, tam dementem impudentiam dissimulaverint; & sic dissimulaverint, ut Florentini Patres in amplificandis Papæ honoribus studiosè versantes, coacervantes quidquid uspiam magnificarum appellationum & titulorum reperirent, idque in unam quasi periodum ambitiosè redigentes, nusquam tamen diseritè edixerint Pontificem errare non posse ? Profectò illud adversariorum talibus temporibus silentium, confessionis locum habere potest.

Post tam ineluctabile argumentum, non tantum privatos hujus seculi scriptores proferre, supervacuum, ut jam diximus,

mus,

*De R. Pont. fidei infallibilitate. § 2*

mus, videri posset; sed nec ipsa Academiae testimonia sigillatim proferre necesse est. Suffecerit indicasse, hoc eodem seculo, Parisiensem, Colonensem, Lovaniensem, Viennensem, Cracoviensem, Herfordiensem, aliasque Germaniae Academias, aperte professas esse se ut rem indubitata habere, Pontificem errare posse. Illarum testimonia, pridem ab eruditissimo Launoio in Epistolis collecta, rursus relata sunt eleganti Opusculo, ad quod Lovaniensium Magistrorum responsio haecenus desideratur; sed nempè facilius est *iteratam Declarationem* edere, quàm argumentis respondere.

*Antiq.  
Facult.  
Lovani.  
Disc. cap.  
3. § 3.  
n. 4.*

His aliisque argumentis adducti viri Ecclesiasticae Traditionis scientia paulo magis imbuti quàm Mechliniensis Archiepiscopus, existimant circa ipsa Basileensis Concilii tempora primùm natam esse opinionem de infallibilitate Pontificia. Nec tamen illud ausim planè affirmare. Sufficit ostendisse hoc seculo vix aliquem dubitasse quin Pontifices in fide, itidem ut in aliis rebus, errare possent.

## S E C U L O   X V I .

**Q**Uamquam hoc seculo adulescere &, ut Casuistæ loquuntur, *maturecere* inciperet opinio de Pontificis infallibilitate, adhuc tamen sub initia illius, doctissimi quique Theologi eam rejiciebant. In his esse numerandos Joannem Majorem & Jacobum Almaïnum Parisienses Theologos nemo paulò peritior ignorat.

In 4. Sentens. de Ministro confirmat.

Sed maximi ponderis est in hac re auctoritas Adriani Florentii de Trajecto Doctoris Lovaniensis qui sententiam illam in suis Commentariis in Magistrum Sententiarum manifestè impugnavit; quòd deinde opus postquam factus est Romanus Pontifex Adrianus VI, tacitè comprobavit, cum sub ejus oculis Romæ excusum est. Atque idcirco ejus testimonium solitis cavillis contorquere nunc student adversarii; quasi locutus non sit de Pontifice *ex Cathedra* pronunciante: etenim, ut recenter ait Antonius Parmenstater, *Aliàs vir certè doctus insulsiſſimè pro-*  
*cessisset arguendo Pontificis fallibilitatem ex-*  
*responsis in Decretales relatis; cum consen-*  
*tiant omnes quòd, etsi in illis invenirentur*  
*errores, id fieret salva infallibilitate. Sci-*  
*licet homini salibus & leporibus pleno*  
*insul-*

statera &  
 pag. 28.  
 & 29.

*insulsiſſimum* videtur argumentum quod à ſua argumentandi ratione diſtat. Dabit tamen veniam ſi propter eas cauſas quas ad ſeculum XIII retulimus , neglecto faſtidio Antonii Parmentier , Adrianum rectiſſimè argumentatum credamus; eaſque Doctōris noſtri voces, *cum conſentiant omnes* , in mendaciorum aut inſcitiarum numerum referamus. Sed rectè-ne an ſecus argumentatus ſit Adrianus, parum ad rem facit: de ejus enim opinione agitur. Porro illum de quocumque Pontificis Decreto loqui , ad oculum patet vel ex ſolis hiſce ejus vocibus: *Non tamen dico Gregorium hīc errare , ſed eva-  
nuare intendo impoſſibilitatem errandi , quam alii aſſerunt.* Unde manifeſtè conſequitur eum de Cathedra-  
ticis etiam Decretis loqui; *cum eam impoſſibilitatem errandi re-  
jiciat quam alii aſſerunt.*

Nec mirum ſanè ita ſenſiſſe Adrianum: erat enim in Academia Lovanienſi doctrina Theologica inſtitutus: in quam Aca-  
demiā nondum irreperat infallibilitatis doctrina , ſed illæſa perſtabat doctrina contraria, quam ſub initia ſua , hoc eſt temporibus Baſileenſis Concilii indubita-  
tam Lovanii habitam fuiſſe tam mani-  
feſtum eſt ex Ænea Sylvio, ut rem fateri coactus fuerit ipſe Steyartius, & eo qui-  
dem loco quo maximè laborabat ut inſal-  
de Pontif.



libilitatis vindicem semper fuisse Lovaniensem Facultatem ostenderet.

*Antiq.  
Facult.  
Lovan.*

*Disc. cap.  
3. §. 1. 2.  
3. 4. 5.*

Illæsa, inquam, adhuc ibi perstabat doctrina contraria Adriani ætate: quin argumenta non contemnenda profert eruditus Auctor opusculi supra commemorati, quibus suadere nititur, integro & amplius seculo eam illæsam Lovanii perstitisse; primumque adeo in iis rebus illic innovasse Ruardum Tapperum, eundem scilicet qui & Pelagianorum reliquias, Fausti Rhegiensis libros & doctrinam, primus ibi commendare ausus est. Quo magis mirari fas est ejusdem Antonii Parmentier vel summam imperitiam vel impudentiam, qui cum ista sub oculis ejus scribuntur, iis tamen silentio prætermiſſis, pergit audacter occinere:

*Statena  
Enc. pag.  
25.*

*Romani Pontificis infallibilitas inter Lovanienses nunquam fuit controversa. Quin econtra tot tamque nobiles authores qui ex Facultate Theologica Lovanii prodierunt, de ista materia tractantes pro infallibilitate Romani Pontificis sine hesitatione tenuerunt.*

Possem equidem & alios hujus seculi scriptores in eandem rem referre, ut Adrianum Galterum, Joannem Arbo-  
reum, Franciscum à Victoria, Alphonsum de Castro. Ast fatendum tamen, adversam sententiam hoc seculo paulatim ita crevisse, ut sub illius exitum jam pa-  
trono-

tronorum numero alteram longè superaret. Nec tamen hinc tantopere adversariis gloriandum puto : nam præterquam quòd seculis præcedentibus vix ullum secum sentientem habuerint , facile est causas indicare istius incrementi.

Harum prima sit , exorta hoc seculo undique hærelum colluvies ; quæ omnes quamvis quoad alia dogmata dissimillimæ , in hoc tamen consentiunt Romanam Sedem esse illam Babylonem Apocalypti-  
cam & Antichristi thronum. Quas cum viri boni summo ardore impugnarent , cernerentque quanto in honore apud Catholicos semper fuisset Prima illa & Apostolica Sedes , facile evenit ut in illius dignitate asserenda diverso vitio veri limites multi excesserint. Atque hoc æstu sub hujus seculi exitum & in sequentis initia , viros ceteroquin doctos Baronium , Bellarminum , Jansenium Iprentem , abreptos fuisse , existimari æquum est. Quorum quòd magna fuit apud Catholicos auctoritas , multos secum in eandem sententiam pertraxerunt.

2. Quicumque humanum ingenium , tempori & potentioribus facile serviens , paulò penitus noverit , non mirabitur opinionem quæ Romani Pontificis potestati tam favet , ubi semel prolata est , brevi tempore vulgarem factam esse. Id

*Lib. de  
auctor.  
Eccles.*

jam suo tempore fieri cœptum, appositè & pro more suo scapham, scapham vocans Joannes Major, ita queritur: *Quòd plures Pontificem extollant quàm Concilium, non miraberis. Concilium rarò congregatur, nec dat dignitates Ecclesiasticas. Papa dat eas. Hinc ei homines blandiuntur: dicentes quòd solus potest omnia quadrare rotunda & rotundare quadrata, tam in spiritualibus quàm in temporalibus.*

3. Fatendum, plus æquo Scholasticis Theologis operam dedisse plerosque istius seculi scriptores, nec in Patrum voluminibus multùm fuisse versatos. Scholastici autem, etsi non omnes infallibilitatem Pontificis tueantur, tamen ex suorum temporum moribus rei veritatem frequenter æstimantes, solent illius potestati plus æquo tribuere. Quin apud eruditos compertum est in S. Thomæ Summa & Cætena occurrere quoad rem hanc non pauca adulterina Patrum dicta, sive ex libris subdititiis, sive memoriæ vitio, sive aliena fraude.

4. Nonnullos etiam in errorem traxerunt spuria illæ Isidori Mercatoris sub primorum Pontificum nomine Decretales Literæ: cùm & ultra modum auctoritatem Pontificiam extollant, & primorum seculorum venerandæ reliquiæ esse vulgo putarentur.

5. Mo:

5. Monachos Mendicantes Romanæ Aulæ privilegiorum suorum vinculo aliis-que nexibus obstrictos esse vulgo notum est. Hi autem quantum apud imperitam plebem libellis & concionibus possint, multis experimentis constat.

6. At nihil fortasse tantum promovit infallibilitatem, quantum hoc seculo nata Jesuitarum Societas. Hi cum & singulari voto, & titulis quibusdam non admodum Apostolicis, eidem Aulæ se addixerint, jamque nova sua Morali & præ Evangelica illa mirum quantum flexili, magnam sibi apud plerosque Catholicos Principes gratiam comparaverint, omnibusque passim si non sui amorem, terrorem certè impotenti dominandi libidine impresserint; ac denique magnam apud imperitos eruditionis famam sibi consciverint sua illa scriptorum copia, quorum etsi plerique pudendis erroribus scateant, seque mutuo ut grus gruem sequantur, quidam tamen (quod in tanto numero mirabile non est) verè eruditi sunt: Hæc, inquam, omnia cum Jesuitis adsint, faciliè his armis infallibilitatis doctrinam multùm propagarunt.

7. Quosdam etiam ex iis quorum eruditionem & opiniones formidabant Romani, Cardinalitiæ purpuræ fulgore ceperunt. Atque idcirco exigui ponderis

in

in hac re esse debet Perronii, Richelii, Rupefulcaldii, virorum politicorum, auctoritas; quam tamen jactant nonnulli, & in his iterum noster Antonius Parmentier. Nam ut scitè & verè dictum est:

*Protius. Auctoramentum non est leve purpura. Pridem Pontifices verum non didicere pati.*

Quo magis collaudanda hodie est eximia virtus Eminentissimi Cardinalis Noallii, qui quamvis & eo titulo & innato Catholicis erga Apostolicam Sedem obsequio, timeretur Constitutioni *Unigenitus* colla submissurus, feliciter hunc multorum timorem fefellit, omnibusque titulis fidem & veritatem potiore habuit.

8. Denique Pontificibus servit triste illud Inquisitionis Tribunal jam multis locis receptum. Cujus tantus terror est, tanta apud imperitos opinio, ut & in Episcopos (quis rem indignissimam sine gemitu commemoret!) tyrannicam potestatem exerceat. Paucissimi anni abierunt, ex quo mirante Europa, Hispaniensis Episcopus solius Inquisitionis auctoritate damnatus, Romam captivus abductus est. Quis dein miretur privatos homines nihil illic dictis aut scriptis audere quod Pontifici vel Inquisitoribus nonnihil displiceat; simulque cum liber-  
tate

*De R. Pont. fictitia infallibilitate.* 89  
tate sentiendi interire iis locis Traditionis, Historiæ, omniumque literarum amorem?

Hæ profecto tot tantæque causæ si corde sincero expendantur, non sinunt mirari cur postremis hisce temporibus tantum progressa sit infallibilitatis doctrina. Quin miremur potius inter tot adversa Deum promissorum memorem tot veritati patronos adversus tam periculosum errorem conservasse. In quibus, priusquam ad aliud seculum progrediamur, commemorandus est celeberrimus ille Michaël Baius; quo viro (quidquid sit de illius seu veris seu fictitiis erroribus)

*Nihil doctius, nihil humilius* fuisse, ipsi ejus adversarii agnoverunt.

Is porro quid de infallibilitate sentiret satis indicat, quamquam timidè ut rerum ejus conditio ferebat, gemina scriptiuncula ad Laurentium Westerhoven.

Card. Tol.  
letus Je-  
suita, &  
Ant. Pos-  
sevinus  
eundem  
Jesuita.  
Vide Ope-  
rum Baii  
part. I.  
pag. 481.  
& seqq.

## SECULO XVII.

**I**s quæ jam recensuimus armis latè vagata infallibilitas, hoc seculo altas radices egit apud Italos, Hispanos, Germanosque: nec tamen tam facilè credendum adversariis jactantibus omnes omnino istarum gentium Episcopos & Scriptores ita sentire. Plerique de ista controversia

¶ Vide *A-*  
*polog. Va-*  
*leriani.*

troverfia vix audiunt : alii fi quid bene sentiunt, proferre non audent, terrore Romanorum, Jefuitarum, aut Inquifitionis. Ingentem fibi aliisque Collegis fuis tempeftatem peperit circa annum 1650, celebris apud Germanos Capucinus P. Valerianus Magnus, quòd in collatione cum Crocio aliisque Lutheranis, infallibilitatem non negaverat quidem, fed tamen quòd ad fidei capita non pertineret, noluerat de illa litem moveri. Mox in illum libellis & intolerandis calumniis infurrexerunt Jefuitæ : quos cùm ille aliquantò acriùs repelleret, non quieverunt eorum odia, donec bonum Capucinum in carcerem conjici curaverint, unde aliquando emerferit nescio.

Si hæc apud Germanos geruntur ubi faltem Inquifitionis Tribunal locum non habet, quid, obfecro, in Italia, quid in Hispaniis fieret? Et tamen etiam in Germania unus & alter controverfiarum Scriptor hoc feculo prodierunt, qui infallibilitatem non fulciunt. At quòd eorum operum copia non eft, voces ipfas referre nequeo. Quòd fi etiam Thomam Anglum & Francifcum Davensportum proferrem, non aberrarem à vero: quod enim una manu Pontifici largiri videntur, mox altera refumunt. Sed quoniam fervente controverfia aliqua, quid de

de hac sentiant pauci Scriptores iique non valdè clari, parum referre existimo, non lubet in eorum dictis excutiendis diu morari.

Quapropter suffecerit proferre universam Ecclesiam Gallicanam (sic enim loqui licet, cùm nonnisi pauci & ignobiles illic reluctati sint) quæ quantum hoc seculo omnigena eruditione super alias Ecclesias eminuerit, nec ipsi adversarii ignorare possunt, aut negare audent. Illius sententiam cum summo plausu, ac nullo clarè reluctante annis 1663 & 1664 professæ est Facultas Parisiensis, ac anno 1682 grandis coetus Cleri Gallicani, cujus ingenium & animus erat celeberrimus Bossuetus Condomensium primùm mox Meldensium Episcopus, felix Religionis Catholicæ adversus quoscumque hostes per tot annos assertor. Decreta ista notiora sunt quàm ut ipsa verba hîc adscribi debeant.

Quid nunc referam illam clarorum virorum turbam, qui eo seculo suam Galliam exquisitissimis operibus illustrarunt; quique eam infallibilitatem quam sua auctoritate Episcopi & Facultates, Pastores, Regiique Senatus rejiciebant, universæ Traditionis mole & Ecclesiasticæ Historiæ luce ab omni parte expugnaverunt?

Quis



M. Fleu-  
ry.

Quis nescit doctrinam ac libros Richerii, Petri de Marca, Launoii, Arnaldi, Bossueti, Dupinii, Flori? Aut qua parte istis comparari possunt obscuri aliquot Gallicani Scriptores, quos infallibilitatis patronos jactare solent adversarii? Unum excipio Cardinalem Perronium virum doctissimum: sed de illo hoc dicere liceat, fuisse virum politicis negotiis valdè implicitum; è cujus dicto aliquo aut facto non statim ejus sententia æstimanda est. Norunt Jesuitæ quantum illos jussu Regis sui juverit Perronius in negotio de Auxiliis componendo: sed simul ex *Historia Congregationis de Auxiliis*, nosse possunt, quantum fallerentur istorum temporum Jesuitæ, cum ex ea re credidissent secum quoad Gratiæ controversias sentire Perronium.

Fuit autem hæc Ecclesiæ Gallicanæ, tam constans & perpetua doctrina, ut ipsis adversariis passim vocitetur *doctrina Gallorum*, *Libertates Gallicana*. Et tamen jam sæpiùs commemoratus Antonius Parmentier, ipsum illud fateri detrectat, ac putidissimis cavillis vocularum quasdam officiosas & urbaniores quibus sæpè pro rerum conditione aut veritas aut reverentia uti juberet, detorquet ad infallibilitatis doctrinam; idque tam infulsè.

fulse, ut & ipsum Illustrissimum Bos-  
fuetum (cujus dictum aliâ causâ referri  
in *Tract. de Schismate* non sensit) profer- *Statera*  
re audeat ut infallibilitatis assertorem, in *Ec.*  
ipsis illis Comitibus anni 1682 quibus erro- *pag. 41.*  
ri isti Lethale vulnus infixit. SS. Ber- *pag. 33.*  
nardum, Bonaventuram, Alexandrum  
Alensem, Albertum Magnum, Hugo-  
nem Victorinum, tamquam certissimos  
infallibilitatis vindices recitat, nulla ipso-  
rum voce relata. Quos quidem ita sen-  
sisse, fidem non faciet auctoritas nostri  
Doctores. Si quid tale dicere videtur S.  
Bernardus, non de solo Pontifice sed de  
Apostolica Sede loquitur.

Profert etiam duo quædam ex Histo-  
ria Universitatis Parisiensis, ubi sanè nul- *pag. 37.*  
la vox occurrit quæ infallibilitatem sa-  
piat: dicitur illic quidem ad Sedem A-  
postolicam *pertinere*, & *maximè pertinere*  
*approbationem doctrinarum, determinationem*  
*fidei &c.* At quis ea de re ambigit? Si  
hæc illi infallibilitatem sapiant, miror  
non omnes penè infallibilitatis adversa-  
rios testes ab eo advocari, inprimisque  
ipso Arnaldum & Quenellium quos tan-  
roperè exhorrescit. Frequenter enim &  
in Libris & in Literis utuntur, ut Ca-  
tholicos decet, iis vocibus quæ impensè  
extollunt Apostolicæ Sedis dignitatem.  
Sed

Sed si Historiam Universitatis Parisiensis legit Antonius Pármentier, quoties illic reperit fortissimè restitisse Universitatem illam quibusdam Pontificibus, etiam in rebus ad fidem pertinentibus? Eamdem sibi responsionem habeat de Episcopis Gallicanis anni 1650 & 1653: profectò risum tenere non potui cùm, istis officiosis dictis relatis, tamquam victorem vidi exsultare: *Nescio*, inquit, *an quispiam prædicta infallibilitatis assertor posset aptioribus terminis uti ad exprimendum suam de ista re sententiam.* Ego verò nescio an aliquis infallibilitatis impugnator Pontifici gratulaturus de quodam saluberrimo Decreto, iisdem aut paribus vocibus uti defugeret. Putidum & indignum est ex aliquo urbanitatis officio vuculas aucupari, & ex rigida quadam illarum significatione, suæ causæ patrocinium repetere. Næ infirmis testimoniis niri opus est homines istos qui ad talia confugiunt. Obiter tamen Doctorem nostrum monitum velim Literas 85 Episcoporum, non  
 pag. 40. *in Comitibus generalibus* scriptas ut ipse narrat, sed furtim ope P. Dinetti aliorumque Jesuitarum à singulis seorsum Episcopis extortam esse subscriptionem.

Ea sola quæ profert ex Comitibus anni 1626. infallibilitatem dogmaticè statuunt. Verum eo tempore, Cardinalis Richelii  
 ter-

terrifico imperio, Clerus suberat: atque illo praesertim anno, quo Pontificem quoquo modo sibi devincire studebat. Tantaque erat Richelii ea in re violentia, ut optimum virum & eatenus infractum Richerium ad revocandam sententiam (seu veriùs ad subscriptionem chartulae cujus sensus Richerio latebat) adegerit, duobus sicariis ex improvisò admotis: Ex qua sua subscriptione, quantumvis tam crudeliter extorta, tantum ille moerorem concepit, ut brevi post tempore extinctus sit. Ita narratur & Actis authenticis demonstratur in vita P. Josephi Capucini, itemque in opusculo posthumo doctissimi Bailleti de vita Edmundi Richerii. Rem istam non planè ignorare videtur Antonius Parmentier: at si illam ab omni parte scivit, quomodo non exhorruit hoc latrone quàm Theologo dignius votum chartis mandare: *Contra morbum Richerianum, seu curandum pag. 34 seu detegendum, utile omnino foret Richelianum remedium!* Sed quidquid sit de illis Comitibus anni 1626; uti una hirundo, quod aiunt, ver non efficit; ita talis aliquot Episcoporum professio efficere nequit, quin doctrina contraria dicatur perpetua fuisse in Ecclesia Gallicana; & maximè his novissimis annis, quibus simul cum Ecclesiasticæ antiquitatis fin-

singulari notitia, apud Gallicanos Præfules, Pastores, Doctores, Canonicos, Monachos, sanæ doctrinæ amor, & adulatrices Transalpinorum fabulæ viluerunt. Nam quòd ex Epistola quadam

- ¶ 42. Doctor Parmentier, qua excusant ea quæ in Comitibus anni 1682 gesta fuerant, id magis ostendit, hanc genuinam Episcoporum sententiam fuisse: nihil enim revocant quoad doctrinam, sed nullius auctoritatis esse volunt quæ decreverunt, optantque facta non fuisse quæ illic facta sunt. Et quidem nonnulla illic gesta, non Romanis tantum, sed iis ipsis qui cum Gallicanis Episcopis ceteroquin sentiebant, minus æqua visa sunt. Certè Rex ipse cùm scribit, referente Doctore nostro,
- ¶ 43. *Se rerum conditione ad eam rem adactum fuisse anno 1682, satis profitetur se nolle doctrinam illic propositam rejicere: quis enim dicat se rerum conditione ad errores declarandos adigi? Ceterum mirum est non addere Doctorem nostrum quo anno, à quot & quibus Episcopis ita Pontifici scriptum sit, aut ubi illa Epistola legi possit.*

De statu Academiæ Lovaniensis quoad hanc controversiam, multa rursus planissimè falsa habet idem Doctor: sed cùm ea de re jam illi in antecessum respon-

ſponderit Auct̃or mox laudatus; & fama ſit ſingularem reſponſionem Doct̃ori noſtro ab aliis parari, non diutius illi reſellendo immorabimur.

Ant. q.  
Facult.  
Lovan.  
Diſc.

Quin ut verè dicam quod ſentio, poſtquam de doctrina quadam intra Eccleſiam diſputari cœptum eſt, nec ea diſputatio adhuc univerſæ Eccleſiæ iudicio terminata eſt, minus neceſſarium videtur perquirere an aliquanto plures aut pauciores patronos habeat alterutra ſententia, maximè quum de iis rebus agitur in quibus plurimum valeant ſpes & metus, aliæque cauſæ ad ſeculum XVI relatæ. Omnino enim tum ſervanda magis eſt aurea hæc Vincentii Lirinensis regula:

*Quid ſi novella aliqua contagio, non jam Commo-  
portiunculam tantum, ſed totam pariter Ec-  
cleſiam commaculare conetur? Tunc item  
providebit (Chriſtianus Catholicus) ut  
antiquitati inhereat, quæ prorsus jam non  
potest ab ulla novitatis fraude ſeduci.*

Commo-  
nis. cap.  
4.

## SECULO XVIII.

**H**Ujus ſeculi initio idem quoad rem hanc erat rerum ſtatus qui ſeculo ſuperiore. Sed cùm ope Conſtitutionis, quam Rex Ludovicus XIV à Pontifice, omiſſis Episcopis ſuis, non ſine gravi doctrinæ Gallicanæ vulnere fla-

E

gita-

gitaverat, spem concepissent Romani; etiam Gallos sub opinionum suarum jugum mittendi; Christus Ecclesiæ suæ semper benignissimè prospiciens, malum illud quod cogitaverant vertit in bonum. Numquam enim luculentiùs patuit quàm validè, quàm tenerè suæ avitæ doctrinæ Ecclesia Gallicana inhæreret. Numquam fortius Supremi Senatus omnium Provinciarum suum in tutando sacro illo deposito ardorem palam fecerunt. Numquam tanto numero Episcopi, Pastores, Academiae &c. eidem doctrinæ clarissima & fortissima testimonia perhibuerunt, perguntque in dies perhibere. Jactant quidem adversarii ingentem numerum Episcoporum Gallicanorum qui Constitutionem *Unigenitus* susceperunt; sed more suo id faciunt, hoc est fide pessima.

Nam i, sciunt plerosque Episcopos cum expositionibus, imo relativè, ut dicitur, ad expositiones suscepisse. Sciunt ex XL illis Episcopis qui primi susceperant, multos instrumento publico, ac dein Literis ad Serenissimum Regni Moderatorem contestatos esse, se nonnisi relatione habita ad suum Documentum Pastorale suscepisse: sciunt alios qui ex isto numero supererant, dictum illud falsi non arguisse. Porro rursus sciunt ad-

versarii

versarii à se suisque frequentissimè scriptum esse & rectè scriptum, eos qui sic tantùm suscipiunt, non tam Constitutionem suscipere quàm expositiones proprias, imo veriùs Constitutionem rejicere. Jam itaque multum iste numerus imminuitur, vel adversariis fatentibus. At quantò apertiùs quotidie & gloriosius imminuitur, cùm multi Episcopi ex iis qui timore aliave causa quoquo modo eam susceperant, rescissis prioribus Actis, Eminentissimo Noallio aliisque fortissimis Religionis vindicibus se adjungant! cùm nemo interim ex iis qui Constitutionem ab initio rejecerant, sententiam mutasse sciatur.

2. Plerique ex iis qui in Galliis Constitutionem etiamnum tuentur, non infallibilitate Pontificia, sed universalis Ecclesiæ consensu (quem Constitutioni accessisse immerito autumant) se niti profitentur. Quidam etiam qui libellis Constitutionem propugnant, apertè profitentur se ab infallibilitatis opinione alienos esse. Adeo ut cùm Illustrissimus Mechliniensis Archiepiscopus, qui tam fervidè infallibilitatem deprædicat, cùm duos tantum hætenus libellos pro Constitutione editos sua auctoritate comprobarit, ab illa sua Approbatione excipere debuerit



*Résuta-  
tion du  
Mémoire  
etc.*

Gallicanam doctrinam quam alter illo-  
rum Scriptorum se amplecti profitebatur.

3. Imo ex tanto numero Episcoporum  
Gallicanorum pauci admodum proferri  
queunt qui infallibilitatis doctrinam in eo  
negotio professi sunt. Et tamen quan-  
tum laborarunt septuaginta annorum spa-  
tio Jesuitæ, qui apud defunctum Regem  
summa gratia valebant, ut tales Episco-  
pi Ecclesiis præfigerentur, qui & ipso-  
rum Societati & Romanis opinionibus  
præ ceteris addicti essent ! Sed nimirum  
nulla humana calliditate, fraude, poten-  
tia, vinci possunt consilia & voluntas  
Dei. Jure itaque diximus in nullo um-  
quam negotio illustriora suæ doctrinæ te-  
stimonia edidisse Ecclesiam Gallicanam.

Verum si eo nomine tantum boni Ec-  
clesiæ obvenit ex luctuosa illa Constitu-  
tione; quàm illustre Pontificiæ fallibili-  
tatis monumentum est ipsa Constitutio !  
Novimus & gaudemus jam nunc illam  
multis qui prius infallibilitatis doctrina a-  
nimum occupatum habebant, mentis o-  
culos aperuisse. Apud posteros autem,  
postquam contentionum nebulas Deus  
discutere dignatus fuerit, multò pluribus  
id eveniet. Fatentur enim adversarii eam  
*ex Cathedra* editam esse. Duo itaque  
tantum demonstranda supersunt.

1. Multas ex damnatis propositionibus  
in

in sensu plano, obvio, genuino, consentire cum doctrina & locutionibus sacræ Scripturæ & Traditionis.

2. Singulas tamen propositiones in sensu plano, obvio, genuino, damnatas esse. His enim demonstratis, nemo tam cœcus est qui non videat hinc consequi, Scripturæ & Traditionis doctrinam & ipsas locutiones à Clemente XI ex *Cathedra* pronunciantes damnatas esse. Itaque duo illa capita breviter pro hujus libelli modulo pertractemus.

Atque ut à primo ordiamur, jam illud quidem multis doctissimisque voluminibus abundè præstitum est, ad quæ aut planè nihil aut frigidissimum quiddam responderunt Constitutionis assertores. Nec mirum: libri enim isti Scripturarum, Conciliorum, Pontificum, Patrum testimoniis referti sunt. Adversarii autem nihil istorum habent quòd pro Constitutione sua proferant. Itaque qui rem hanc plenissimè demonstratam videre cupit, adeat modo hos Gallicos libros: *Observations sur la Constitution: Les Hexaples: Les 7 Memoires du P. Quesnel: Les Difficultez des Theologiens de France.* Aut, si Latinos malint, hos: *Propositionum damnatarum Collatio &c: Antiquæ Facultatis Lovaniensis Discipuli ad Recentiores &c.* Nos quibus non illud propriè institutum

est, paucas è damnatis-propositionibus referemus, jungemusque singulis unum alterumve Scripturæ aut Traditionis testimonium, damnatæ propositioni consentiens.

3. *In vanum Domine precipis, si tu ipse non das quod precipis.*

Lib. 10.  
Confess.  
cap. 29.  
& 37.

S. Aug. *Da quod jubes & jube quod vis. Psal. 126. Nisi Dominus edificaverit domum, in vanum laboraverunt qui edificant eam.*

Lib. de  
bono per-  
sev. cap.  
20.

Idem. *Quid autem meorum opusculorum frequentius & delectabilius innotescere potuit quàm libri Confessionum mearum, cum & ipsos ediderim antequam Pelagiana hæresis exstirpata? In eis certè dixi Deo nostro, & sapè dixi: Da quod jubes & jube quod vis. Quæ mea verba Pelagius Romæ eùm à quodam fratre coepiscopo meo fuissent eo præsentè commemorata, ferre non potuit; & contradicens aliquanto commotius, penè cum eo qui illa commemoraverat, litigavit.*

6. *Discrimen inter fœdus Judaïcum & Christianum est, quod in illo Deus exigit fugam peccati & implementum legis à peccatore, relinquendo illum in sua impotentia: in isto verò Deus peccatori dat quod jubet, illum sua gratia purificando.*

Cap. 31.  
v. 31. &  
seqq.

Jeremias. *Feriam domui Israël & domui Juda fœdus novum: non secundum pactum quod pepigi cum patribus eorum, . . . pactum*

*Num quod irritum fecerunt . . . sed hoc erit pactum quod feriam cum domo Israël post dies illos, dicit Dominus: Dabo legem meam in visceribus eorum, & in corde eorum scribam eam.*

S. Paulus. *Lex spiritus vita in Christo* Rom. VII. 1.  
*Jesu liberavit me à lege peccati & mortis.* Gal. 2. 3 4.  
*Nam quod impossibile erat Legi, in quo infirmabatur per carnem, Deus filium suum mittens in similitudinem carnis peccati, & de peccato damnavit peccatum in carne, ut justificatio legis impleretur in nobis.*

S. Aug. *Quomodo lex mihi epitularetur;* Serm. 155. de verbis.  
*jubens per literam, & non dans gratiam*

S. Thomas. *Lex nova est lex Gratia:* Apost. cap. 7.  
*& ideo primò oportuit quòd homo relinquere-*  
*tur sibi in statu veteris Legis, ut in peccatum* 1. 2. q.  
*cadendo suam infirmitatem cognoscens, re-* 106. art.  
*cognosceret se Gratia indigere.* 3. in corp.

9. *Gratia Christi est gratia suprema sine qua Christum confiteri numquam possumus, & cum qua illum numquam abnegamus.*

S. Paulus. *Nemo in Spiritu Dei loquens,* 1. Cor. XII. 3.  
*dicit anathema Jesu: & nemo potest dicere,*  
*Dominus Jesus, nisi in Spiritu Sancto.*

S. Gregorius Magnus Papa. *Quisquis* Lib. 2. in Sancto Spiritu tangitur, Dei verbum, id est Evang. unigenitum filium confitetur: & negare Dei Homil. 30. n. 5.  
*verbum non valet, quia jam Spiritus Sancti*  
*linguam habet.*

12. *Quando Deus vult salvare animam,*

*quocumque tempore, quocumque loco, effectus indubitabilis sequitur voluntatem Dei.*

Hæc propositio in textu Gallico libri, nil aliud est quàm versio horum carminum S. Prosperi addito ipsius nomine:

*Carm. de  
ingr. cap.  
13.*

*Nam si nemo usquam est quem non velit  
esse redemptum,  
Haud dubiè impletur, quidquid vult sum-  
ma potestas.*

Paulò post, idem vir Sanctus hoc rursum habet:

*cap. 16.*

*At verò omnipotens hominem cùm Gratia  
salvat,  
Ipsa suum consummat opus, cui tempus  
agendi  
Semper adest, qua gesta velit. Non mo-  
ribus illi  
Fit mora, non causis anceps suspenditur ullis:*

*Cap. 13.  
y. 9.*

*Esther. Domine Rex omnipotens . . . ?  
Non est qui possit tuæ resistere voluntati, si  
decreveris salvare Israël.*

*Enchir.  
cap. 96.*

*S. Aug. Neque enim veraciter ob aliud  
vocatur omnipotens, nisi quia quidquid vult,  
potest: nec voluntate cuiuspiam creatura vo-  
luntatis omnipotentis impeditur effectus.*

*Cap. 98.*

*Et rursum paulò post: Quis tam impie  
desipiat, ut dicat Deum malas hominum vo-  
luntates*

luntates quas voluerit, quando voluerit, ubi voluerit, in bonum non posse convertere?

27. Fides est prima Gratia, & fons omnium aliarum.

Concil. Trid. Fides est humana salutis <sup>Sess. 6.</sup> initium, fundamentum & radix omnis ju- <sup>cap. 8.</sup> stificationis.

S. Aug. Quam gratiam primò accepimus? <sup>Traët. 3.</sup> <sup>in Joan.</sup> Fidem. <sup>n. 8.</sup>

Idem. Ex fide autem ideo dicit Apostolus <sup>De Pra-</sup> justificari hominem non ex operibus, quia ipsa <sup>dest. SS.</sup> prima datur ex qua impetrentur cetera. <sup>cap. 7.</sup>

30. Omnes quos Deus vult salvare per Christum, salvantur infallibiliter.

S. Fulgent. Omnes quos Deus vult sal- <sup>De incarn.</sup> vos fieri, sine dubitatione sa-<sup>& Crat.</sup> vantur: nec <sup>cap. 31.</sup> possunt salvari nisi quos Deus vult salvos fieri; nec est quisquam quem Deus salvari velit & non salvetur.

S. Aug. An audebis dicere, etiam ro- <sup>De Cor-</sup> gante Christo ne deficeret fides Petri, dese- <sup>rept. &</sup> cturam fuisse si Petrus eam deficere voluisset; <sup>Grat. cap.</sup> 8. hoc est si eam usque in finem perseverare no-  
luisset? Quasi aliud Petrus ullo modo vellet, quam pro illo Christus rogasset ut vellet.

S. Bernard. Non possunt perire, pro quibus <sup>Hom. 3.</sup> Pater tradidit Filium in mortem ut vivant. <sup>de laud.</sup>

37. Gratia Adami sanctificando illum in <sup>Virg.</sup> semetipso, erat illi proportionata; Gratia <sup>Mar.</sup> Christiana nos sanctificando in Jesu Christo, est omnipotens & digna Filio Dei.

De cor- S. August. *Tales vires habebat ejus (A-*  
 rept. & *dami) voluntas quæ sine ullo fuerat instituta*  
 Grat. cap. *peccato, & nihil illi ex seipso concupiscen-*  
 12. & *tialiter resistebat, ut dignè tantæ bonitati &*  
 ibid. pas- *tantæ benè vivendi facilitati, perseverandi*  
 sim. cap. *committeretur arbitrium . . . nunc verò po-*  
 10. 11. *steaquam est illa magna peccati merito a-*  
 12. *missa libertas, etiam majoribus donis adju-*  
*vanda remansit infirmitas . . . Subventum*  
*est igitur infirmitati voluntatis humana, ut*  
*divinâ Gratiâ indeclinabiliter & insuperabi-*  
*liter ageretur.*

De bono Idem. *Post casum hominis non nisi ad*  
 persev. *Gratiam suam Deus voluit pertinere . . .*  
 cap. 7. *ut homo non recedat ab eo. Hanc Gratiam*  
*posuit in illo, in quo sortem consecuti sumus,*  
*predestinati secundum propositum ejus qui u-*  
*niversa operatur.*

38. *Peccator non est liber nisi ad malum*  
*sine Gratia Liberatoris.*

Jean. Christus. *Qui fecit peccatum, servus est*  
 VII. 34. *peccati . . . Si ergo vos Filius liberaverit,*  
 36. *verè liberi eritis.*

De Spir. S. August. *Nam neque liberum arbitrium*  
 & Lit. *quidquam nisi ad peccandum valet, si lateat*  
 cap. 3. *veritatis via.*

Lib 3. ad Idem. *Liberum arbitrium captivatum;*  
 Bonif. cap. *non nisi ad peccandum valet: ad justitiam*  
 8. *verò nisi divinitus liberatum adjutumque non*  
*valet.*

Oper. im- Idem. *Liberum autem esse quemquam ad*  
 perf. in *agen-*

*De R. Pont. fictitia infallibilitate. 107*

*agendum bonum sine adjutorio Dei... hoc vos ful. lib. dicitis; hinc estis Cœlestiani & Pelagiani. 3. cap.*

*Concil. Araus. II. Nemo habet de suo*<sup>101.</sup>  
*nisi mendacium & peccatum. Can. 22.*

*44. Non sunt nisi duo amores, unde volitiones & actiones omnes nostra nascuntur. Amor Dei, qui omnia agit propter Deum, quemque Deus remuneratur: & Amor quo nos ipsos ac mundum diligimus: qui quod ad Deum referendum est, non refert, & propter hoc ipsum fit malus.*

*S. Leo Magnus Papa. Duo amores sunt Serm. 5. ex quibus omnes prodeunt voluntates, ita di-*<sup>de jejun.</sup>  
*versa qualitatibus sicut dividuntur authori-*<sup>7. mensis.</sup>  
*bus. Naturalis enim animus qui sine dilectione esse non potest, aut Dei amator est aut mundi: in dilectione Dei nulla nimia; in dilectione autem mundi cuncta sunt noxia.*

*S. August. Non faciunt bonos vel malos*<sup>Epist. 155</sup>  
*mores, nisi boni vel mali amores. n. 15.*

*Prosper. - - - Manet ergo voluntas*<sup>Carm. de</sup>  
*Semper amans aliquid quo se ferat: &*<sup>ingr. cap.</sup>  
*labyrintho*<sup>27.</sup>

*Fallitur, ambages dubiarum ingressa viarum.  
Vana cupit, vanis timet & timet: omni-*  
*modaque*

*Mobilitate ruens in vulnera vulnere surgit.*

*56. Deus non remunerat nisi charitatem,  
quoniam charitas sola Deum honorat.*



1. Cor.  
XIII.  
1. 2. 3.

S. Paulus. *Si linguis hominum loquar & angelorum . . . Si habuero omnem fidem, ita ut montes transferam . . . si distribuero in cibos pauperum omnes facultates meas : & si tradidero corpus meum ita ut ardeam, charitatem autem non habuero, nihil mihi prodest.*

*De Grat.* \* Ubi non est dilectio, nullum bonum opus  
*Chris. cap. 26.* imputatur, nec rectè bonum opus vocatur.

*Serm. 11.* S. Bern. *Virtus charitatis sola castificat*  
*in Off.* *animum, sola purgat intentionem.*

*Pasch. n. 7.* 58. *Nec Deus est, nec Religio ubi non est charitas.*

*Epist. 1. cap. 4.* S. Joannes. *Qui non diligit, non novit Deum : quoniam Deus charitas est.*

*y. 8.* S. Aug. *Deo sacrificamus hostiam humi-*  
*Lib. 10.* *litatis & laudis in ara cordis, igne fervida*  
*de civit. caritatis . . . Hic est Dei cultus, hac vera*  
*cap. 3.* *Religio, hac recta pietas, hac tantum Deo debita servitus.*

*Serm. 53.* S. Petrus Chrysol. *Charitas ex Deo est.*  
*de pace.* *Sine Deo ergo est qui non habet charitatem.*

61. *Timor non nisi manum cohibet ; cor autem tandiu peccato addicitur, quamdiu ab amore iustitia non ducitur.*

*In Lucam* S. Ambr. *Qui metuit, reprimitur, non*  
*Lib. 8.* *emendatur.*

*n. 21.* S. Aug. *Inimicus iustitia est qui pœna ti-*  
*Epist. 144.* *more non peccat, amicus autem erit si ejus a-*  
*more non peccet : tunc enim verè timebit pec-*  
*care.*

care. Nam qui gehennas metuit, non peccare metuit, sed ardere.

S. Bern. Nec timor nec amor privatus Epist. 2. convertit animam. Mutant interdum vultum<sup>n. 3.</sup> vel actum, affectum numquam.

S. Thomas. Lex vetus dicitur cohibere<sup>1. 2. q.</sup> manum, non animum: quia qui timere pœna<sup>107. art.</sup> ab aliquo peccato abstinet, non simpliciter e-<sup>1. ad 2.</sup> jus voluntas à peccato recedit; sicut recedit voluntas ejus qui amore justitiæ abstinet à peccato. Et propter hoc lex nova, quæ est lex amoris, dicitur animum cohibere.

Ludolphus de Saxonia Carthusianus, De vita<sup>Christi</sup> seculi XIV scriptor piissimus. Servilis<sup>part. 1.</sup> timor est ille, quo quis timet peccare propter<sup>cap. 53.</sup> gehennam & non amore justitiæ: sed formidine pœna cohibet manum, sed non animum à peccato.

Institutio ad pietatem Christianam, edita jussu Concilii Moguntini anno 1549: Nec à malo recessisse putandus est, qui timore prohibitus malum perpetrare abstinet: nam qui metu pœna non peccat, adhuc ex ipso peccat, quod peccare vellet si impunè posset: & innocentiam coram Deo vel ex eo amittit, quia desiderio peccat.

65. Moïses, Propheta, Sacerdotes, & Doctores Legis mortui sunt, absque eo quod ullum Deo dederint filium, cum non effecerint nisi mancipia per timorem.

E. 7.

S. Joan.

- Cap. I.*  
*v. 17.* S. Joannes. *Lex per Moysen data est, Gratia & veritas per Jesum Christum facta est.*
- Rom.*  
*VIII. 15.* S. Paulus. *Non enim accepistis spiritum servitutis iterum in timore; sed accepistis spiritum adoptionis filiorum, in quo clamamus: Abba, Pater.*
- Rom. 1*  
*VIII. 3.* Idem. *Quod impossibile erat Legi in quo infirmabatur per carnem, Deus mittens filium suum &c.*
- Gal. II.*  
*21.* Idem. *Non abjicio gratiam Dei. Si enim per Legem justitia, ergo gratis Christus mortuus est.*
- Gal. III.*  
*21. 22.* Idem. *Si enim data esset lex quae posset vivificare, verè ex lege esset justitia. Sed conclusit Scriptura omnia sub peccato, ut promissio ex fide Jesu Christi daretur credentibus.*
- Gal. IV.*  
*22. 24.*  
*25. 26.* Idem. *Abraham duos filios habuit, unum de ancilla & unum de libera . . . quae sunt per allegoriam dicta. Hae enim sunt duo Testamenta. Unum quidem in monte Sina in servitutem generans, quae est Agar: Sina enim mons est Arabia, qui conjunctus est ei quae nunc est Jerusalem, & servit cum filiis suis. Illa autem quae sursum est, Jerusalem libera est; quae est mater nostra.*
- Hebr. III.*  
*5. 6.* Idem. *Moyses quidem fidelis erat in tota domo ejus tamquam famulus, in testimonium eorum quae dicenda erant: Christus verò tamquam filius in domo sua.*

*Idem.*

*De R. Pont. fictitia infallibilitate. III*

Idem. *Nihil enim ad perfectum adduxit* Hebr. VII.  
(ἡ τελειωσις) *Lex.* 19.

Idem. *Nunc autem melius sortitus est mi-* Hebr.  
*nisterium, quāto & melioris testamenti me-* VIII. 6.  
*diator est, quod in melioribus repromissioni-* 7. 8.  
*bus sancitum est. Nam si illud prius culpa*  
*vacasset, non utique secundi locus inquireret-*  
*tur: Vituperans enim eos dicit &c.*

Post tam illustria testimonia Spiritus Sancti, supervacuum videtur Patrum dicta proferre. Quid enim Patres verebuntur qui audent damnare hanc propos. 65, cujus doctrina unicus penè scopus est B. Pauli Epistolarum ad Romanos, ad Galatas, ad Hebræos. Illud ex his testimoniis modò inferamus, non posse damnari hanc Quenellii doctrinam, nisi eversa œconomiâ divinæ sapientiæ circa mysteria incarnationis & satisfactionis Christi, à Christo ipso & Apostolis mundo patefactâ. Ut proinde Fausto Socino quam homine Catholico dignior sit illius sacratissimæ doctrinæ damnatio.

69. *Fides, usus, augmentum, premium fidei, totum est donum pura liberalitatis Dei.*

S. Paulus. *Stipendia enim peccati, mors; Rom. VI.*  
*gratia autem Dei vita aeterna in Christo Je-* 23.  
*su Domino nostro.*

Idem. *Quis te discernit? Quid habes* 1. Cor.  
*quod non accepisti? Si autem accepisti, quid* IV. 7.  
*gloriaris quasi non acceperis?*

Con-

*Sess. 6.  
cap. 16.*

Concil. Trid. *Abfit ut Christianus homo in feipfo vel confidat vel gloriatur, & non in Domino: cujus tanta eft erga omnes homines bonitas, ut eorum velit effe merita quæ funt ipsius dona. Quæ postrema verba Concilium defumfit ex Epiftola S. Cœlestini I. Rôm. Pont. ad Episc. Gall.*

Hymnus in Miſſa Pentecoſtes. *Sine tuo numine nihil eſt in homine nihil eſt innoxium . . . Da virtutis meritum, da ſalutis exitum, da perenne gaudium.*

*De Bono  
Perſev.  
cap. 2.*

S. Auguſt. *Nam tria ſunt, ut ſcitis, quæ maximè adverſus eos (Pelagianos) Catholica defendit Eccleſia. Quorum eſt unum, Gratiâ Dei non ſecundum merita noſtra dari, quoniam Dei dona ſunt, & Dei Gratiâ etiam conferuntur merita univerſa juſtorum. Alterum eſt &c.*

*Carm. de  
ingr. cap.  
29.*

*Fons igitur meriti eſt lucis Pater. Inde  
quod in nos  
Fluxerit, hoc nobis majorum eſt cauſa bonorum  
Dum largitori ſua reddimus: æque relatis  
Augemur, noſtrumque bonum fit gloria  
dantis.*

*Cap. 34.*

*Idem. I procul infana impietas, artesque  
malignas*

*Pela-  
gium.*

*Aufer, & auctorem comitare excluſa Bri-  
tannum,*

*Nox*

De R. Pont. fictitia infallibilitate. 113

Nos humiles tenuesque sumus, grex par-  
vus, & altis

Inniti metuens: quia sufficientia nostra

Ex Christo est: si quid recti sapimus vo-  
lumusque

Illi debemus qui vincula nostra resolvit.

Proque malis bona restituit: non inve-  
niendo

Quod merito legeret, sed donans quo le-  
geretur.

Idem. Nam meritum ad mortem subeunt-Cap. 36.  
dam sufficit unum,

Ad vitam, nisi quod donarit Gratia, nullum.

Idem. Si quid enim recti gerimus, Do-Cap. ubi  
mine, auxiliante

Te gerimus: tu corda moves: tu vota pe-  
tentis

Qua dare vis, tribuis: servans largita,  
creansque

De meritis merita, & cumulans tua do-  
na coronis.

77. Qui non ducit vitam dignam Filio  
Dei, & membro Christi, cessat interius ha-  
bere Deum pro Patre & Christum pro capite.

S. Joannes. Qui facit peccatum, ex dia-Epist. 1.  
bolo est . . . omnis qui natus est ex Deo, cap. 3. 7.  
peccatum non facit . . . in hoc manifesti<sup>8. 9. 10.</sup>  
sum filii Dei & filii diaboli.

Idem. Quotquot autem receperunt eum, de-Joan. I.  
dit illis potestatem filios Dei fieri, his qui<sup>12. 13.</sup>  
credunt

*credunt in nomine ejus : qui non ex sanguinibus , neque ex voluntate viri , sed ex Deo nati sunt.*

*Rom. VIII. 9.*      S. Paulus. *Si quis spiritum Christi non habet , hic non est ejus.*

*Ibid. 9. 14.*      Idem. *Quicumque spiritu Dei aguntur , ii sunt filii Dei.*

*Serm. 4. cons. Arianos n. 22.*      S. Athanas. *In quorum cordibus Filius non est , nec etiam Deus eorum Pater dici potest.*

*In Epist. ad Ephes. lib. 3. cap. 5.*      S. Hieron. *Qui peccator est , & aliqua sorde maculatus , de Ecclesia Christi non potest appellari , nec Christo subjectus dici.*

*Tract. 5. m. 1. Epist. Joan. 8. 7.*      S. August. *Dilectio sola discernit inter filios Dei & filios diaboli. Signent se omnes signo crucis Christi ; respondeant omnes , Amen. Cantent omnes Alleluia : baptizentur omnes : intrent Ecclesiam : faciant parietes basilicarum : non discernuntur filii Dei à filiis diaboli nisi charitate.*

*Lib. 2. cont. Crescon. cap. 21.*      Idem. *Propter malam pollutamque conscientiam damnati à Christo , jam in corpore Christi non sunt quod est Ecclesia : quoniam non potest Christus habere membra damnata.*

*Lib. 4. de Bapt. cap. 3. n. 4.*      Idem. *Afferat qui potest , hujus columbae membra esse , qui seculo verbis non factis renunciant.*

*Fragm. 5. edit. Sirm.*      S. Alcim. Avitus Episc. Vienn. *Dicit Joannes Evangelista , quòd dedit eis potestatem filios Dei fieri , his qui credunt.*

dunt in nomine ejus; ut aut permaneat *filius bene vivendo*, aut certè per *carnalem conversationem rejiciat paternitatem*.

81. *Obscuritas sancta verbi Dei*, non est *Laicis ratio dispensandi se ab ejus lectione*.

David. *Beati qui scrutantur testimonia* *Psal.*  
*ejus.* CXVIII.

Idem. *Lucerna pedibus meis verbum tuum* 2. Ibid. 9.  
*& lumen semitis meis.* 105.

Nehemias. *Attulit Esdras sacerdos* *Le-2. Esd.*  
*gem coram multitudine virorum & mulierum* VII. 2, 3.  
*. . . & legit in eo aperte . . . de mane*  
*usque ad mediam diem in conspectu virorum*  
*& mulierum.*

4. Reg. XIII. 2. *Ascenditque Rex (Jo-*  
*sias) templum Domini, & omnes viri Ju-*  
*da universique qui habitabant in Jerusalem*  
*cum eo Sacerdotes & Propheta, & omnis*  
*populus à parvo usque ad magnum: legitque*  
*cunctis audientibus omnia verba libri fæde-*  
*ris qui inventus est in domo Domini.*

1. Machab. XII. 6. 9. *Jonathas sum-*  
*mus Sacerdos, & seniores gentis, & sacer-*  
*dotes, & reliquus populus Judæorum, Spar-*  
*tialis fratribus salutem. . . . Nos cum*  
*nullo horum indigeremus, habentes solatio*  
*sanctos libros qui sunt in manibus nostris.*

2. Machab. VIII. 16. 23. *Convocatis*  
*autem Machabeus septem millibus qui cum*  
*ipso erant, rogabat ne hostibus reconciliaren-*  
*tur, neque metuerent iniquè venientium ad-*  
*versum*



versum se hostium multitudinem, sed fortiter contenderent . . . Ad hoc etiam ab Esdra lecto illis sancto libro, & dato signo adjutorii Dei, in prima acie ipse dux commisit cum Nicanore.

AR. XV. S. Jacobus. Moïses enim à temporibus antiquis habet in singulis civitatibus qui eum prædicent in Synagogis, ubi per omne Sabbatum legitur.

Matth. 21. 25. Christus Dominus. Confiteor tibi, Pater, Domine cæli & terra, quia abscondisti hæc à sapientibus & prudentibus, & revelasti ea parvulis.

AR. VIII. 27. 28. S. Lucas. Ecce vir Æthiops eunuchus . . . revertebatur sedens super currum suum, legensque Isaiam Prophetam . . . Accurrens autem Philippus . . . dixit: Putasne intelligis quæ legis? Qui ait: & quomodo possum si non aliquis ostenderit mihi? Rogavitque Philippum ut ascenderet & sederet secum. . . . Aperiens autem Philippus os suum & incipiens à Scriptura ista, evangelizavit illi Jesum.

Rom. I. 1. 7. S. Paulus. Paulus Apostolus . . . omnibus qui sunt Romæ.

1. Cor. I. 2. Idem. Ecclesia Dei quæ est Corinthi . . . cum omnibus qui invocant nomen Domini nostri Jesu Christi.

2. Cor. I. 1. Idem. Ecclesia Dei quæ est Corinthi cum omnibus sanctis qui sunt in universa Achaïa.

Et.

De R. Pont. fictitia infallibilitate. 117

Et ita deinceps ad Gal. Ephes. Philip.  
Coloss. Theff.

Idem. *Quaecumque scripta sunt ad nostram* Rom. XV.  
*doctrinam scripta sunt, ut per patientiam<sup>4</sup>*  
*& consolationem Scripturarum spem ha-*  
*beamus.*

Idem. *Cum lecta fuerit apud vos epistola* Coloss. IV.  
*hac, facite ut & in Laodicensium Ecclesia<sup>16</sup>*  
*legatur.*

Idem. *Adjuro vos per Dominum, ut* 1. Theff.  
*legatur epistola hac omnibus sanctis fra-* V. 27.  
*tribus.*

S. Jacobus. *Jacobus . . . duodecim tri-* Jac. I. 7.  
*bubus quae sunt in dispersione.*

S. Petrus. *Petrus . . . electis advenis* 1. Pet. I.  
*dispersionis Ponti, Galatia &c.* 1.

Idem. *Simon Petrus . . . iis qui coe-* 2. Pet. I.  
*qualem nobiscum sortiti sunt fidem.* 1.

Idem. *Habemus firmiorem Propheticum* Ibid. 9.  
*sermonem, cui benè facitis attendentes quasi* 9.  
*lucerna lucenti in caliginoso loco.*

S. Judas. *Judas . . . his qui sunt in* Jud. I. 7.  
*Deo Patre dilectis, & Christo Jesu conser-*  
*vatis & vocatis.*

S. Joannes. *Beatus qui legit & audit* Apoc. I. 3.  
*verba Prophetiae hujus.*

Nihil necesse est Patrum dicta hic ad-  
nectere: tum quod jam vulgo notum sit  
omnes penè omnium seculorum veritati  
huic luculentissima testimonia perhibere;  
tum quod in brevi scripto difficilis sit dele-

ctus

Etus in tanta copia. Sed propinquiorum seculorum duo triave testimonia referre, fortasse non inutile fuerit.

S. Thomas. *Conclusio.* *Sacra doctrina cum cunctis hominibus communiter proponatur, in ea metaphoris & corporalibus similitudinibus divina exponi, maxime conveniens est.*

1. Part.

q. 1. art.

9. Q.

*Respondeo dicendum quod conveniens est Sacra Scriptura divina & spiritualia sub similitudine corporalium tradere. Deus enim omnibus providet secundum quod competit eorum natura . . . . . convenit etiam Sacra Scriptura qua communiter omnibus proponitur (secundum illud ad Rom. 1. sapientibus & insipientibus debitor sum) ut spiritualia sub similitudinibus corporalium proponantur, ut saltem vel sic rudes eam capiant; qui ad intelligibilia secundum se capienda non sunt idonei.*

De Vita  
Chris. in  
Prologo.

Ludolphus de Saxonia. *Inter omnes ergo scripturas precipue Evangelium, quod secundum Augustinum inter omnes divinas auctoritates qua sacris Litteris continentur merito praeceat, studeas pra manibus semper habere, & in corde tuo jugiter circumferre: quia hoc te de vita & moribus Domini nostri Jesu Christi & de omnibus ad salutem necessariis poterit clarius edocere.*

Lib. 4.  
cap. 11.

Auctor Imitat. Christi. *Duo namque mihi necessaria permaxime sentio in hac vita, sine*

sine quibus mihi importabilis foret ista miserabilis vita. In carcere corporis hujus detentus, duobus me egere fateor, cibo scilicet & lumine. Dedisti itaque mihi infirmo sacrum corpus tuum ad refectiorem mentis & corporis: & posuisti lucernam pedibus meis verbum tuum. Sine his duobus bene vivere non possem: nam verbum Dei, lux anima mea: & Sacramentum tuum, panis vita.

Joannes Picus Mirandulanus. Nihil <sup>Epist. ad</sup> Deo gratius, nihil tibi utilius facere potes, <sup>Francisc. nepotem</sup> quam si non cessaveris Litteras Sacras nocturna versare manu, versare diurna. Latet enim in illis cœlestis vis quadam viva & effusax, quæ legentis animum (si modo illas purè humiliterque tractaverit) in divinum amorem mirabili quadam potestate transformat.

88. Ignoramus quid sit peccatum & vera pœnitentia, quando volumus statim restitui possessioni bonorum illorum quibus nos peccatum spoliavit, & directam separationis istius ferre confusionem.

Lex Moïsis. Anima polluta quæ ededit Levit. de carnibus hostiæ pacificorum quæ oblata est <sup>VII. 26.</sup> Domino, peribit de populis suis.

Jeremias. Curabant contritionem filie populi mei cum ignominia dicentes; pax pax: & non erat pax. <sup>Cap. 6.</sup>

Ezechiel. Væ qui consuunt pulvillos sub <sup>Cap. 13.</sup> omni cubito manus: & faciunt cervicalia <sup>18.</sup> sub capite universæ ætatis ad capiendas animas;

mas; & cùm caperent animas populi mei; vivificabant animas eorum.

*Luc.*  
*XVII.*  
*13.*

Christus Dominus. *Publicanus à longe stans, nolebat nec oculos ad cælum levare: sed percutiebat pectus suum dicens: Deus propitius esto, mihi peccatori.*

*Matth. VIII. 7. 8. Ait illi Iesus: ego veniam & curabo eum. Et respondens Centurio ait: Domine non sum dignus ut intres sub tectum meum, sed tantùm dic verbo & sanabitur puer meus.*

*De lapsis. S. Cyprianus. Emergit, fratres dilectissimi, novum genus cladis; & quasi parum persecutionis procella saevierit, accessit ad cumulum sub misericordia titulo malum fallens & blanda perniciēs. Contra Evangelii vigorem, contra Domini ac Dei legem, temeritate quorundam laxatur incautis communicatio. Irrita & falsa pax; periculosa dantibus, nihil accipientibus profutura.*

*Epist. 30. Clerus Romanus. Absit ab Ecclesia Romana vigorem suum tam profana facilitate demittere, & nervos severitatis eversa fidei majestate dissolvere; ut cùm adhuc non tantùm jaceant, sed & cadant everforum fratrum ruinae, properata nimis remedia communicationum, utique non profutura, praestentur; & nova per misericordiam falsam vulnera, veteribus transgressionis vulneribus imprimantur, ut miseris ad everisionem majorem eripiat & pœnitentia.*

*S. Am-*

S. Ambros. *Volo veniam reus speret, pe-* Lib. 1. de  
*rat eam lacrymis, petat gemitibus, petat po-* pœ. it.  
*puli totius fletibus: ut ignoscatur & obsecret:* cap. 16.  
*& cum secundo & tertio fuerit dilata ejus*  
*communio credat remissius se supplicasse; fle-*  
*tus augeat miserabilior.*

S. August. *Ascendat homo adversum se* Serm.  
*tribunal mentis sue . . . Atque ita constitu-* 351. n. 7.  
*to in corde judicio . . . ab ipsa mente ta-* nova E.  
*lis sententia proferatur, ut se indignum homo*  
*judicet participatione Corporis & Sanguinis*  
*Domini . . . Quomodo in interiora veli &*  
*in illa invisibilia Sancta Sanctorum intrare*  
*audebit & poterit, qui medicinam cœlestis*  
*disciplina contemnens, noluit paulisper à vi-*  
*sibilibus separari?*

Concil. Trid. *Ad quam tamen novita-* Sess. 14.  
*tem & integritatem per Sacramentum pœni-* cap. 2.  
*tentia sine magnis nostris fletibus & labori-*  
*bus, divina id exigente justitia, pervenire*  
*nequaquam possumus: ut merito Pœnitentia*  
*laboriosus quidam Baptismus à Sanctis Patri-*  
*bus dictus fuerit.*

Concludamus itaque cum S. Paulo. 1. Cor.  
*Probet autem seipsum homo, & sic de pane* XI. 28.  
*illo edat & de calice bibat. Qui enim* 29.  
*manducat & bibit indignè, judicium sibi*  
*manducat & bibit, non dijudicans Corpus*  
*Domini.*

91. Excommunicationis injusta metus  
 numquam debet nos impedire ab implendo

debito nostro. Numquam eximus ab Ecclesia, etiam quando hominum nequitia videmur ab ea expulsi, quando Deo, Jesu Christo, atque ipsi Ecclesie per charitatem affixi sumus.

*Act. V.* Petrus & Apostoli. Obedire oportet Deo magis quam hominibus.

*Joan. XVI. 1.* Christus Dominus. Hæc locutus sum vobis ut non scandalizemini. Absque Synagogis facient vos.

*Luc. VI. 22. 23.* Et alibi. Beati eritis cum vos oderint homines, & cum separaverint vos, & exprobraverint, & ejecerint nomen vestrum tamquam malum propter filium hominis. Gaudete in illa die & exultate; ecce enim merces vestra multa est in calo.

*Lib. de Bapt. cap. 17.* S. Aug. Spiritales sive ad hoc ipsum pro studio proficientes, non eunt foras: quia & cum aliqua vel perversitate vel necessitate hominum videntur expelli, ibi magis probantur quam si intus permaneant.

*Lib. de vera Relig. cap. 6.* Idem. Sapè finit divina providentia per nonnullas nimium turbulentas carnalium hominum seditiones expelli de congregatione Christiana etiam bonos viros. Quam contumeliam vel injuriam suam cum patientissime pro Ecclesie pace tulerint, neque ulla novitates vel schismatis vel hæresis moliti fuerint, docebunt homines, quam verò affectu, & quanta sinceritate caritatis Deo serviendum sit . . . . Rarum hoc videtur genus; sed tamen

*tamen exempla non desunt ; immo plura sunt quàm credi potest.*

Gelasius I. Rom. Pont. Cui est illata *Decret. sententia*, si injusta est, tantò eam curare *Grat.* non debet, quanto apud Deum & Ecclesiam *part. 2. caus XI.* ejus neminem potest iniqua gravare sententia. *q. 3. c.* Ita ergo ea se non absolvi desideret, qua se *46.* nullatenus perspicit obligatum.

Hic sistemus. Decet enim meminisse non hìc eam rem ex professo, quod aiunt, pertractari; sed edì tantummodo specimen. Hæc autem & ejusmodi innumera quæ pro asserenda propositionum damnatarum veritate proferuntur, tam sunt luculenta, tamque copiosa, ut soleant Bullæ patroni quibus aliquid etiamnum sanæ doctrinæ & verecundiæ superest, ad nescio quas perversas interpretationes confugere; quarum ope sensum quemdam erroneum, sed peregrinum, & à genuina verborum significatione Auctorisque mente alienissimum, propositionibus affingunt invito sensu communi, invito idiomate Scripturæ & Traditionis, invito Clemente XI, invitis denique Jesuitis totius negotii architectis. Verùm ut appareat quàm inane sit omne istiusmodi effugium, juvat hìc ex Gallico sermone Latinè reddere, gravissimas considerationes tres quæ præfiguntur vo-



lumini Difficultatum Romæ à Gallicanis  
ablegatis exhibitarum.

Nam præterquam quòd rem pulchrè  
ob oculos ponant, accedit non exiguam  
illis auctoritatē tribuendam, cū no-  
mine Gallicanorum Episcoporum, ac  
Theologorum, qui Constitutionem susci-  
pere defugiunt, ipsiusque adeo Aulæ  
Francicæ auctoritatē Romam missæ sint  
Difficultates illæ.

### CONSIDERATIO PRIMA.

*Difficul-* „ **C**ONstitutio damnat propositiones  
*tez des* „ absolutè acceptas & in seipsis.  
*Theolog.* „ *Omnes & singulas propositiones prainser-*  
*de France* „ *tas, inquit Summus Pontifex, dam-*  
*&c. à pag.* „ *namus.*  
*7 ad 15.* „

„ Nulla illarum est quæ non aliqua  
„ nota & censura afficiatur. *Omnes &*  
„ *singulas . . . tanquam falsas, scandalo-*  
„ *fas, seditiosas, blasphemias, hereticas*  
„ *&c. respectivè damnamus.* Vetitum  
„ est eas tueri *conjunctim vel divisim*, ut  
„ quicumque illas *vel illarum aliquam*  
„ *conjunctim vel divisim docuerit . . . Ec-*  
„ *clesiasticis censuris subiaceat.*

„ Habet igitur unaquæque illarum  
„ causam singularem. Non inter se con-  
„ nexæ sunt velut partes ejusdem totius:  
„ suum cuique vitium inest quod eam

„ cen-

„ censura dignam faciat ; neque , ut  
„ omnia suadent , expendenda est earum  
„ connexio , nec liber de quo excerptæ  
„ sunt , nec Scriptor qui eas docuit .

„ Hæc consideratio cùm multum fa-  
„ ciat ad Constitutionis sensum perci-  
„ piendum , latiùs explicanda est .

„ Si Constitutio propositiones tantum-  
„ modo propter Librum ejusve Aucto-  
„ rem damnaret , non damnaret eas à  
„ quocumque Auctore *docerentur* , *defen-*  
„ *derentur* , aut *ederentur* ; neque earum  
„ defensionem omnibus utriusque sexus  
„ fidelibus interdiceret . Neque enim  
„ damnatum dici potest aliquid ubicum-  
„ que sit , nisi id quod nusquam bo-  
„ num est .

„ Neque etiam omnem eas defenden-  
„ di licentiam eriperet alioquin Consti-  
„ tutio . Absit enim ut voluerit Ponti-  
„ fex justitiæ & veritati defensionem e-  
„ ripere : debetur enim illud Ecclesiæ  
„ Romanæ gloriosum testimonium , sem-  
„ per eam eminuisse singulari tutelâ , qua  
„ justitiam & veritatem præteritis em-  
„ poribus fovit .

„ Quæ præterea alia causa esset prop-  
„ ter quam excommunicatione , hoc est  
„ omnium poenarum \* maxima , feriret  
„ eum qui *de eis etiam disputativè publicè*  
„ *aut privatim tractaverit* , nulla alia reli-

„ Etā libertate nisi eas impugnandi? Nec  
 „ enim refellere aut impugnare licet nisi  
 „ errorem aut iniquitatem.

*Eundem  
 propterea  
 librum  
 damna-  
 mus &c.  
 Constit.*

„ Rursum. Non ipsas alioquin propo-  
 „ sitiones declararet Pontifex causam ef-  
 „ se ob quam librum *Considerationum*  
 „ *Moralium* damnet. Postulat enim or-  
 „ do judiciorum, ut propositiones damna-  
 „ ri mereantur propter vitium aliquod  
 „ illis proprium & inhærens, priusquam  
 „ liceat damnare librum quemdam quia  
 „ eas propositiones contineat.

„ Si existimasset Pontifex propositio-  
 „ nes illas. planè consentire cum regula  
 „ sanæ doctrinæ, utique non eas nota a-  
 „ liqua affecisset damnando librum.  
 „ Nusquam definit veritas esse veritas,  
 „ ubicumque reperiatur: neque um-  
 „ quam licuit eādē cum errore censurā  
 „ illam involvere.

„ Qui, ut librum damnavit, non  
 „ inde excerperet nisi propositiones quæ  
 „ in seipsis bonæ sunt, is utique eradi-  
 „ caret triticum omiſſis zizaniis, sanæ  
 „ doctrinæ rivos interverteret, solum-  
 „ que illic relinqueret virus erroris. Sa-  
 „ tis intelligitur non potuisse hanc esse  
 „ mentem Pontifici, cū tam terribili  
 „ anathemate librum *Considerationum Mo-*  
 „ *ralium* perculit. Hinc & ipse in Con-  
 „ stitutione profitetur se excerptisse cen-  
 „ tum

„ tum & unam propositionem , um-  
„ quam continentes *fallacem hujus li-*  
„ *bri doctrinam* , & *summam hujus libri*  
„ *perniciem* ; tanquam *noxia zizaniorum*  
„ *semina è medio tritici* , quo tegebantur ,  
„ *educta* ; tanquam *improbam sanien* quæ  
„ *secto ulcere foras erumpat*.

„ Qui itaque Sanctitatis Sux menti  
„ servire voluerit , is judicare debet  
„ omnes & singulas earum propositio-  
„ num continere virus aliquod illis pro-  
„ prium ; idque ex seipso tam noxium ;  
„ ut quamvis nullo libro contineretur ,  
„ non desineret esse exitiale ; corrup-  
„ pendoque libro alioquin optimo suffi-  
„ ceret.

CONSIDERATIO SECUNDA. Id ex  
confide-  
ratione  
superiore  
consequi-  
tur.

„ Sensus in propositionibus damna-  
„ tus, sensus naturalis sit oportet ,  
„ qui ex vocum vulgari & propria signi-  
„ ficatione nascitur : quique ita suo  
„ splendore conspicuus est , ut fallere  
„ nequeat.

„ Ut itaque rectè teneatur doctrina  
„ quam Pontifex interposito anathema-  
„ te damnat , confugiendum non est ad  
„ sensus obscuros & abditos , peregri-  
„ nos , violentè expressos , & ab usitato  
„ sermone desectentes.

„ Hanc regulam præterire non sinit  
 „ ipse Pontifex, dum exponit suum in  
 „ edenda Constitutione consilium. Con-  
 „ testatur enim se *fallacem libri doctrinam*  
 „ *generatim solummodo hætenus indicatam,*  
 „ *pluribus singulatim ex eo excerptis proposi-*  
 „ *tionibus distinctius & apertius explicare,*  
 „ *atque universis Christi fidelibus noxia zi-*  
 „ *zaniorum semina è medio tritici, quo te-*  
 „ *gebantur, educta, velut ob oculos expone-*  
 „ *re: confiditque, Benedicente Domino*  
 „ *fore ut omnes tandem aperta jam manife-*  
 „ *staque veritati cedere compellantur: jam*  
 „ *videlicet denudatis & quasi in propatulo*  
 „ *positis, non uno quidem aut altero, sed*  
 „ *plurimis gravissimisque tum pridem dam-*  
 „ *natis, tum etiam novè adinventis erro-*  
 „ *ribus.*

„ Ex his inferre oportet, sensum pro-  
 „ positionum quem attingit Constitutio,  
 „ non alium esse quàm sensum obvium,  
 „ verbis ex usitato hominum sermone  
 „ acceptis; sensum in oculos insipientem,  
 „ tamque manifestum ut de eo ambi-  
 „ gendi locus non sit, nisi apud eos qui  
 „ *quasi in nocte sic in meridie palpare*  
 „ *amant.*

Breve ad  
 Regem  
 Christianis-  
 sim. 8.  
 Idus Maii  
 1714.

CON-

CONSIDERATIO TERTIA.

77 **M**ENS Pontificis damnantis propo-  
78 sitiones 101 fuit, *sedare, præfer-*  
79 *tum in florentissimo Gallia regno, exorta*  
80 *ingeniorum variè opinantium dissidia.*

81 Non itaque in antiquatas contro-  
82 versias, aut errores præteritorum se-  
83 culorum tenebris involutos, lata est  
84 Constitutio. Aliis gravioribus nego-  
85 tiis commotus fuit animus Summi  
86 Pontificis. Præsentius & metuen-  
87 dum magis periculum cum sollicitum  
88 reddidit.

89 Vidit in Ecclesia, & Gallicana ma-  
90 ximè, dissensionis æstu abhinc multis  
91 annis incitatos animos. Timuit ne in-  
92 geniorum in acerbiores scissuras protenden-  
93 tium diversitas, deinde pejora dissidia  
94 pareret. Huic malo viam præcludere  
95 voluit edendo Constitutionem quæ fi-  
96 dei & doctrinæ communis regula es-  
97 set, quæ diversas quaslibet Theologo-  
98 rum opinationes ad eandem senten-  
99 tiam redigeret, atque ita omnem dis-  
100 sentiendi materiem auferret. Hic sco-  
101 pus & finis Bullæ.

102 Tam luctuosorum dissidiorum origo  
103 plusquam satis nota est. Quibus ca-  
104 rum initia debeantur, notum est;

„ quorum artibus ad eam asperitatem &  
„ vehementiam, quæ nunc cernitur,  
„ perventum sit; & quàm pridem hoc  
„ sibi ex his dissidiis commodi parave-  
„ rint, ut impunè illis liceat impugnare  
„ non pauca certissima & gravissima Re-  
„ ligionis & Moralis Christianæ capita.  
„ Qui igitur de universo hoc negotio  
„ ex æquo judicare volet, intra hujus æ-  
„ vi spatium mentis oculos contineat.  
„ Hic enim ipsa Constitutionis verba nos  
„ consistre jubent: neque sinunt contro-  
„ versias, quarum antiquior ætas sit, si-  
„ bi pro scopo adsignari. Et sanè quis  
„ credat voluisse Pontificem universam  
„ Ecclesiam perterrefacere propter erro-  
„ res jam diu rejectos, quique nullum  
„ hodie patronum habeant? Æquiùs de  
„ eo existimandum est, credendumque,  
„ voluisse eum quorundam audaciam,  
„ ut putabat, contundere, ne omnia in-  
„ ter se permiscerentur. Atque ita ex-  
„ ponere voluit ipse quid amplecti, quid  
„ rejicere oporteat, ex iis de quibus no-  
„ stro tempore dissensio est; hoc est,  
„ circa liberum arbitrium, Gratiam  
„ Christi, primum maximumque man-  
„ datum de diligendo Deo, Pœniten-  
„ tiam, Sacræ Scripturæ lectionem, &  
„ hujusmodi plura.

„ Quàm

Quàm hæc firmo fundamento stent, vel hinc apparet, quòd non Appellantibus tantum, sed & asperrimis eorum adversariis certissima censeantur; quod nemo hætenus, nisi multum fallor, hujusmodi argumentis respondere tentaverit, quamvis jam toties prolata sint; denique quòd ista Constitutionis expositio non aliunde nisi ex lucidissimis creberrimisque ipsius Constitutionis verbis petita sit.

Liceat igitur universam hanc de Constitutione disputationem claudere hoc Syllogismo:

Clemens XI *ex Cathedra* pronuncians damnat *omnes & singulas* propositiones, in sensu distincto, aperto, manifesto, obvio; in seipsis; prout in Galliis de iis disputatum fuit.

Atqui multæ ex illis propositionibus sensu obvio &c. nihil enunciant nisi Scripturæ Sacræ, Conciliorum, SS. Patrum dogmata ipsis penè eorum verbis prolata.

Ergo Clemens XI *ex Cathedra* pronuncians damnavit dogmata Scripturæ Sacræ, Conciliorum, SS. Patrum.

Itaque nullum fortasse exemplum Pontificis *ex Cathedra* errantis, illustrius a-



pud posteros habebitur quàm Clementis XI.

His ad cumulum nuper accessit, quòd Pontifex suo illo seu Brevi seu Diplomate, quod *Literas Apostolicas* vocant, Episcopos aliosque Constitutioni reluctantes, qui sanè doctrinam suam multipliciter & dilucidè exposuerant, à Communionem sua separet, tamquam *Pastores errantes & in errorem mittentes*; adversum quos Pauli verbis fideles excitat: *Doctrinis variis & peregrinis nolite abduci.* Quis itaque dubitare possit quin aliquas saltem istorum Episcoporum, Pastorum, Academiarum &c. doctrinas damnet Pontifex, eosque propterea à Communionem sua segregatos velit? Quamobrem non tantum Regii Senatus Galliarum, non tantum Eminentissimus Noallius, non tantum Parisiensis Academia; sed & multi ex iis qui Constitutionem accepturi cum Catholicis expositionibus videbantur, postquam vident nullas preces, nullam moderationem tot annorum spatio aliquid elucidationis à Pontifice obtinere potuisse, de omni pacis ineundæ consilio desperantes, & à Constitutione & à Literis illis ad generale Concilium provocarint.

Et tamen non desunt in Belgio nostro, qui sanæ doctrinæ amantes, si superis placet

placet, videri gestiunt, qui Literas illas summo plausu exceperunt. Tolerari ista utcumque possent, si à quodam P. Wavrio aliove mendicante Monacho proficiscerentur; quibus Pontificem tamquam supra humanam conditionem sublatum intueri assuetis, magni favoris speciem præbet quidquid vel nomine tenus benignum est. At quod videre cogimur, Facultatem Theologicam Lovaniensem, sanæ doctrinæ quondam tam tenacem; totque insignibus viris honestatam, ita servire iniquitati, ut doctrinæ propriæ veluti oblita, ferientibus jugulum ultro præbeat, hoc est *Iterata Declaratione* non Constitutioni modò, sed & funestis illis *Literis Apostolicis* accinat, quis sine gemitu recogitet! Imo quis credat, nisi qui noverit jam triginta & amplius annorum spatio, vi, calumniis, fraudibus, id egisse Jesuitas, Desirantium, & Steyartium, ut contra jus fasque repulsis doctissimis piissimisque viris, ad illam Facultatem adlegerentur ii qui Romanæ Aulæ & Jesuitis aut placerent aut certè minus displicerent.

At quæ tandem est vanissimi triumphî materies? Nempè Pontificem in illis Literis dicere: *Ignorare non deberent sententias illas ac doctrinas, quas ipsi cum erroribus per nos damnatis confundunt, palam*

*liberè in Catholicis Scholis, etiam post editam à nobis memoratam Constitutionem, sub oculis nostris doceri atque defendi, illasque propterea minimè per eam fuisse proscriptas. Ex quo nonnulli inferunt, doctrinas de Gratia efficace, relatione operum in Deum, & necessitate contritionis, per Constitutionem minimè fuisse damnatas.*

Sed quàm inepta inprimis est ista Decretorum inter se collatio? Constitutio damnat propositiones clarissimas, plurimas, ipsis Scripturæ & Traditionis vocibus pronunciatas, omnium tristissimo sermone receptas, damnatque in sensu aperto, distincto, manifesto & omnibus obvio: Literæ Apostolicæ confusam vocem edunt de doctrinis Catholicarum Scholarum, nullo nominatim dogmate, nulla propositione prolata: Et tamen harum Literarum tenebras Constitutionis indeclinabili luci opponere non erubescunt isti! At propius urgeamus, paucisque palam faciamus, Literas istas non modo nihil subsidii adferre, sed augere potius suspicionem, ex mente Pontificis sanam doctrinam esse damnatam.

1. Non dicit Pontifex quænam illæ sint Catholicæ Scholæ quarum doctrinam intactam vult. Non desuerant qui crediderant damnari non posse propositiones 12, 30, & similes, nisi ipsorum con-

Congruistarum doctrinâ damnatâ : alii propositiones 87, 88, 91, ab ipsis Jesuitis traditas ostendebant. Quid si hæc sint illæ Scholæ quarum doctrinam damnatam non esse dicat Pontifex ? An id sufficiet Lovaniensibus Magistris ?

2. Fac etiam in aliis rebus eos malè intellexisse ejus mentem , certè quænam illæ sint non edicit. Quid si Gratiam efficacem salvam velit , necessitatem contritionis non velit ? quid si contra ? Idem de reliquis materiis quæri potest.

Nec enim in omnibus eos à mente sua aberrare dicit.

3. Cùm ad singulares controversias descendit Pontifex, tres tantùm commemorat : De utriusque Legis discrimine ; de virtute Gratiæ ; de charitate. Nul- lum autem verbum facit de necessitate Fidei , de Læctione Scripturarum , de Poenitentiae ministratone , de injusta excommunicatione , aliisque propositionibus quæ non minùs sollicitos habebant Episcopos & Pastores , quàm priores illæ. Et sanè mirum sit , si commonstrare possint Lovanientes quoad illas posteriores controversias, doctrinam quàm Episcopi renitentes damnatam putant, Romæ ab illo tempore *palam & libere* traditam fuisse.

4. Quin dum ad ipsas illas materias de  
utraq;

utraque Lege, Gratia, & charitate progrediuntur Literæ, augent suspicionem eorum qui mentem Pontificis fuisse autumant, etiam quoad illas materias damna-  
re sanam doctrinam. Nam.

5. De utriusque Legis discrimine nihil commemorat Pontifex præter eam novæ Legis *præstantiam quam omnes agnoscunt & profitentur*. Eam igitur intactam finit quam omnes, ac proindè etiam Moliniani, *profitentur*: non eam quàm omnibus maledictis assidue incessunt Moliniani.

6. Sic & *Divina Gratia virtutem* nullam aliam Clemens prædicat, nisi *quàm Catholicus nullus negat*. An porro illi Catholici non sint Jesuitæ, atque ille tantoperè adamatus præceptor ejus Sfondratus? Nullam ergo aliam Gratiæ virtutem à se damnatam negat, nisi eam de qua & Molina, & Lessius, & Sfondratus ipse consentiant.

7. Quid autem de charitate? *Charitatem nulli impensius laudant, nulli impudentius violant*. Nihil amplius. Is itaque hoc Brevi charitatis necessitatem intactam judicet, cui sufficiat frigidissima illa & penè antiquata Jesuitarum cantion-  
cula quam Breve venditat.

Quis non obstupescat ad eorum cœcitatē, qui post tot illata doctrinæ Catholicæ lethalia vulnera, & nova per has  
Lite-

Literas superaddita, sibi miserè plaudunt de inani aliqua vocula, qua nec unum *in individuo*, ut loquuntur, dogma conservatur? Et tamen ea sunt Lovaniensibus Magistris *documenta prorsus ineluctabilia!* Verè, *Gloria eorum in confusione ipsorum.*

Illud potius dicamus, ne quidem suscipi posse Constitutionem, etiam si tam *Philipp. II. 19;* orthodoxas undique expositiones proferrent *Literæ Apostolica*, quàm reipsa nullas proferunt. Illæ enim expositiones circa ipsam Constitutionem nihil immutarent: ostenderent forsan ad meliorem mentem rediisse Pontificem; aut, si ita lubet, non malam ei mentem fuisse in edenda Constitutione. At quamdiu talis, qualis edita est, manet Constitutio, semper in sensu obvio, aperto &c. damnat certissima fidei & morum capita, adeoque suscipi numquam potest, nam error ea esse non desinit.

Ipsæ igitur Expositiones orthodoxæ esse possent, Constitutio nequaquam: itidem ut Arianæ aut Calvinianæ formulæ orthodoxis expositionibus fortassis exornari possent; ipsæ verò orthodoxæ fieri numquam possent.

Denique pro coronide accedat Constitutionem natura sua, forma, & stylo tanto ampliorem auctoritatem habere quàm informes illæ Literæ, ut etiam si hæ

hæ aliquid circa negotia Constitutionis rectè statuerent, facilè posthac foret Romanis & Jesuitis Constitutionem, utpotè Cathedram, pro infallibili definitione obtrudere; Literas, utpotè non Cathedricas ex opinione multorum, nullo loco habere.

Hic finem Primæ Partis faciemus. Ignoscat Lector benevolus, si dissidiorum in Belgio nuperrimè exortorum occasione, seculo XVIII tantò diutiùs quàm aliis immorati sumus.

## DISSERTATIONIS

## PARS SECUNDA,

*In qua respondetur*

BELLARMINO

*impugnanti*

Decreta Concilii Constantiensis de  
potestate universalis Concilii in  
Romanum Pontificem.

*Ex opere posthumo Viri Clarissimi*

ANTONII ARNALDI,

*Latine reddita.*

**V**isum iri spero æquis rerum æstima-  
toribus, Ecclesiæ Gallicanæ de  
Constantiensis Concilii auctoritate  
sententiam huc usque à Schelstratani op-  
pugnatione sat tutam servatam esse. Sed  
erunt fortasse qui regerant, ex his non  
æquè tutam eam præstari ab aliorum as-  
sultibus, quoniam hæc victoriæ species  
pro-



provenire possit ex adversarii imbecillitate atque imperitia, bonam causam male tutantis.

Quapropter operæ pretium duxi iis facere satis qui ita affecti sunt. Itaque in istorum gratiam, censui bona fide exhibenda esse quæcumque à doctioribus probabiliora adversus illorum Decretorum auctoritatem excogitata sunt; & demonstrandum, ea omnia vel jam obtrita, vel ejusmodi esse quæ faciliè & paucis obteri possint.

In iis qui de hac re pro Romanæ Aulæ opinionibus scripserè, tum fama, tum eruditione eminent tres Cardinales, nempe à Turrecremata, Cajetanus, & Bellarminus. Sed ad causam satis erit Bellarmini argumenta excussisse, quòd is aliorum præcipua quæque in libros suos transtulerit. Eum igitur, ne cogar sæpè eadem dicere, solum impugnabo: atque ad sex capita revocabo quæcumque variis locis in hanc rem ab eo scripta sunt. Dicendi initium dabit Pisana Synodus, cujus veluti continuatio fuit ea quæ Constantiæ habita est. Disputandum itaque

1. De Concilio Pisano.

2. De Concilio Constantiensi generatim.

3. De Decretis hujus Concilii, quæ  
Ro-

*Resp. ad objectiones Bellarmini.* 148

Romanum Pontificem Concilio submissum esse sanciunt.

4. De Concilio Basileensi ea Decreta confirmante.

5. De Concilio Florentino quod Decretorum auctoritatem infirmasse fertur.

6. De Concilio Lateranensi sub Leone X.

## SECTION I.

*De Concilio Pisano.*

BELLARMINUS *Lib. 1. de Conciliis cap. 4.*

**A**ltera partitio Conciliorum complectitur item quatuor membra: quaedam enim sunt ab Apostolica Sede approbata, atque ab Ecclesia universa recepta: quaedam omnino reprobata: quaedam partim approbata, partim reprobata: quaedam nec approbata, nec reprobata.

Ad postremam hanc classem revocat Synodum Pisanam, de qua ita loquitur cap. 8. Generale nec approbatum, nec reprobatum videtur esse Concilium Pisanum quod anno 1409 deposuit Gregorium XII & Benedictum XIII, & elegit Alexandrum V. Siquidem S. Antoninus 3. part. tit.

tit. 22. cap. 5. § 2. & 3. *summa Historialis*, assertit, conciliabulum illegitimum, non verum *Ecclesia Concilium* fuisse. Et eventus idem ostendisse videtur: coactum enim Concilium fuit ad schisma tollendum, & tamen illud non sustulit, sed auxit. Si tamen sine dubio fuisset reprobatum, etiam sine dubio *Alexander VI* se non *Sextum* sed *Quintum* appellasset. Adde quod est ferme communis opinio, *Alexandrum*, & , qui ei successit, *Joannem*, veros Pontifices (forte addendum) fuisse. At certè ex tribus qui se tum pro Pontificibus gerebant, isti maximè ut veri Pontifices colebantur.

## R E S P O N S I O.

**I**nfirmæ sanè argumenta, ut his adductus Bellarminus dubitet, an legitimum sit Pisanum Concilium! Primum videlicet innititur S. Antonini auctoritati: quasi unius hominis opinio conferri queat cum auctoritate mille circiter Patrum, quorum trecenti & amplius fuerunt Episcopi: totidem enim Synodo Constantiensi interfuisse, auctor est ipse Bellarminus. Constantiensis autem Synodus Pisanæ vestigiis insistens, ejusdem continuationem fecit.

Nihilo validius est alterum Bellarmini argumentum: cum enim dejectis duobus  
in-

incertis Pontificibus alium creavit Synodus Pisana, qui verus & indubitatus Pontifex est habitus à majore numero principum & populorum, qui prius alterutri schismaticorum Pontificum parebant, certè non schisma auxisse, sed ad schismatis extinctionem plurimum contulisse dicenda est.

At illud miror, non sensitse Bellarminum sua se dogmata evertere, si ambigere velit de Pisani Concilii legitima auctoritate. Variis enim locis statuit Ecclesiam, cum aut omnino nullus est Romanus Pontifex, aut non alius quam incertæ auctoritatis, *sine dubio habere auctoritatem providendi sibi de capite*, ut ipse loquitur, Lib. 1. de Concil. cap. 14. eademque repetit Lib. 2. cap. ultimo. *Concilium potest, inquit, judicare tempore schismatis quis sit verus Papa, & providere Ecclesie de vero Pastore; quando is nullus aut dubius est. Et hoc est quod rectè fecit Concilium Constantiense.* At eadem profecto auctoritas inerat Ecclesie tempore Pisani Concilii. Ergo si rectè fecit Concilium Constantiense cum dubios Pontifices Benedictum XIII & Gregorium XII denuò repudiavit, rectè etiam fecerat Pisanum Concilium, cum eosdem à Pontificio culmine pridem dejecerat; atque Ecclesie præfecerat verum Pastorem, Alexandrum V. Hæc si extra dubita-

bitationem posita non sunt, nihil erit de quo dubitare non liceat, & causam vicerint Sceptici.

## S E C T I O II.

*De Concilio Constantiensi.*

BELLARMINUS *Lib. I. De Concil. cap. 7.*

**Q**Uintum inter Concilia partim confirmata, partim reprobata, est Concilium Constantiense, Patrum ferè mille ex quibus Episcopi amplius 300. . . . Hoc Concilium quantum ad primas Sessiones, ubi definit Concilium esse supra Papam, reprobatum est in Concilio Florentino, & Lateranensi ultimo. Quantum ad ultimas Sessiones, & ea omnia quæ probavit Martinus Quintus, ab omnibus Catholicis recipitur.

## R E S P O N S I O.

**H**Abemus igitur vel ipsum Bellarminum fatentem à Concilio Patrum ferè mille, ex quibus Episcopi amplius 300, definitum fuisse, Concilium esse supra Papam. Quis Catholicus sit quem in eandem sententiam non faciat propensum auctoritas tanta?

Et

Et quam tandem aliam, quæ hîc æquilibrium efficiat, proferet Bellarminus? Hæc videlicet, inquit ille: quòd istud Concilium reprobatum sit in Florentina Synodo. Atqui, ut istud largiamur, à non spernenda Ecclesiæ parte inter legitima non censetur Concilium Florentinum: fuitque, si Patrum numerum spectes, Constantiensi longè inferius. Addò etiam, quod infra demonstrabitur, falsum esse quod sibi sumit Bellarminus, quidquam in Florentino Concilio dictum aut gestum ad infirmanda ea quæ de Conciliorum auctoritate à Synodo Constantiensi sancita sunt.

Addit Bellarminus à Lateranensi Concilio sub Leone X. fuisse reprobatum Concilium Constantiense. Pulchrè equidem: quasi Concilium centum circiter Episcoporum, maximam partem Italorum ac ad Romanam Aulam pertinentium, sententia gravior censi debeat quàm Decretum œcumenici Concilii, quod è trecentis Episcopis constitit, & ad cujus veneranda comitia confluxerat, quidquid eruditius suo gremio fovebat Ecclesia. At plura de Lateranensi isto Concilio dicenda supersunt, de quibus infra disputabitur.

Cùm verò, ait idem Cardinalis, *ea omnia quæ probavit Martinus Quintus ab*  
G *omni-*

*omnibus Catholicis recipi*, jam profectò firmat ipse adstruitque quod eversum voluit. Ea siquidem omnia probavit Martinus, vel ipso Bellarmino referente, quæ in Concilio Constantiensi determinata, conclusa, & decreta fuerant *conciliariter* in rebus ad fidem pertinentibus. Atqui hæc decreta, quæ ad fidem pertinere fatetur Bellarminus, *conciliariter* facta esse vel ex eo constat, quòd non modo de iis à singulis Nationibus deliberatum sit, sed in solemni Sessione sint sancita: quæ enim ita sanciebantur, dicta sunt *conciliariter* gesta; de quibus verò separatim inter Nationum deliberationes agebatur, *Nationaliter* tantummodo gesta esse dicebantur. Hæc postrema quod Universo Concilio tribui non possint, probare noluit Martinus, atque idcirco utitur vocabulo *conciliariter*; quo verbulo mirificè exultarunt Bellarminus & Steyartius, ut alios tenuioris notæ scriptitatores omittam: quasi non eâdem operâ quæcumque alia decreta ejusdem Concilii labefactari queant, si quis ad singula cavillator occinat non ex iis esse quæ *conciliariter* gesta dici debeant: aut quasi non in ipsum Pontificem Martinum V, contumeliosa sit hæc illius vocolæ acceptio quam isti fingunt: quid enim aliud egerit Martinus, quàm illius vocabuli

am-

*Lib. 2. de  
Concil.  
cap. 19.*

ambiguo universam Ecclesiam ludificari, quo postquam omnia probasse putaretur, singula, istius interpretationis ope, posset destruere cum rebus suis expediret. Æquius omnino de Pontifice existimandum, censendusque omnia *conciliariter* gesta dicere, quæ communi consensu in Concilii Sessionibus decreta sunt. Itaque velit nolit Bellarminus, probavit etiam hæc decreta Martinus V, de quibus nunc lis movetur; quoniam & *conciliariter* gesta sunt, & ad *materias fidei* spectant. Quod si verum est, dabit vel ipse Bellarminus ea decreta ab universa Ecclesia suscipienda, imò jam suscepta esse.

Id ipsum etiam conficitur ex eo quod Eugenius IV & Pius II, dignitatis suæ supra modum studiosis Concilium Constantiense approbarint; alter Decreto quod exstat apud Odoricum Raynaldum pro Romana Aula partiarium Scriptorem; alter in Epistola ad Academiam Coloniensem, quæ passim *Bulla Retractionum* ejus dicitur. Iniquissimè igitur & cum summa contumelia in tam sacrum cœtum, accensetur Concilium Constantiense iis Conciliis quæ *partim approbata, partim reprobat* sunt: ausimque provocare quemlibet, ut proferat vel unum alicujus nominis Scriptorem, qui tale quidpiam e-

F 2

dere



dere ausus sit omni eo seculq. quo Concilium istud celebratum fuit.

### S E C T I O III.

*De iis Decretis Concilii Constantiensis quæ R. Pontificem Concilio submissum esse pronunciant.*

BELLARMINUS *Lib. de Concil. cap. ult.*

**H**ic sibi objicit Cardinalis hoc ex Germaniae argumentum : Concilium Constantiense Sess. 4. definivit, Concilium generale habere à Christo immediatam auctoritatem, cui omnes obedire tenentur, etiam si Papalis dignitatis existat. A quo se his modis tentat eximere.

Respondeo dupliciter. Primo : Concilium Constantiense esse legitimum & approbatum, sed non pugnare cum iis quæ diximus. Non enim definivit absolutè Concilia generalia habere à Christo potestatem supra Pontifices, sed tantum in casu, id est tempore schismatis, quando nescitur quis sit verus Papa : nam dubius Papa : habetur pro non Papa, & proinde habere super illum potestatem, non est habere potestatem in Papam.

R E

R E S P O N S I O.

**H**Æc una est ex illis interpretationi-  
bus quas Clerus Gallicanus rejicit: <sup>clar. Annal</sup>  
caretque revera non veritate tantummo-<sup>1681.</sup>  
do, sed & veri specie. Siquidem 1.  
Nullum tunc erat verum Schisma, cum  
Gregorius XII. & Benedictus XIII jam  
à Pisano Concilio rejecti essent, ac Joan-  
nes XXIII indubitatus Pontifex habere-  
tur à longè majori & saniori portione  
Ecclesiæ: nisi contendas semper dubium  
esse jus Pontificis veri, quotiescumque  
ambitiosus & perversus Anti-Papa à sa-  
cilegis ausis dimoveri non vult.

2. At ut etiam largiamur, aliis du-  
bium esse potuisse jus Joannis XXIII,  
non erat certè ipsi Concilio, quod Joan-  
nem XXIII & ante & post exauctora-  
tionem pro legitimè electo Pontifice ha-  
buit. Quod enim illum è dignitate de-  
jecerit, alià causâ fecit, nimirum prop-  
ter immania illius scelera: atque ut hæc  
gesta sua tutaretur, edidit Decretum il-  
lud in quo nunc Bellarminus cavillatur.

3. Eugenius IV numquam id effugium  
quæsit, cum tamen ignorare illud non  
potuisset, quippe qui Constantiensi Syno-  
do interfuit, & magnoperè tali quopiam  
argumento indigeret adversus Basileense

sess. V.  
Decr. 2.

Concilium à quo erat ei Pontificatus ab-  
rogatus. 4. Sed ipsa alterius Decreti  
verba rem conficiunt: *Qui statutis seu or-  
dinationibus aut praeceptis hujus sacrae Synodæ  
ET CUIUSCUMQUE CONCILII GENERALIS legitime con-  
gregati . . . obedire contumaciter contemse-  
rit &c.* Qui hæc de solo schismatis  
tempore accipienda esse voluerit, simul  
illud dicat, existimasse Concilii Patres,  
nullo umquam nisi schismatis tempore  
cogendum generale Concilium: quæ hy-  
pothesis & est perquam ridicula, & Con-  
cilii Constantiensis instituto planè pu-  
gnans, quod ad hoc ipsum tendebat ut  
frequenter Concilia cogerentur, id quod  
Ecclesiæ rebus valdè expedire censebant  
Patres Constantienses.

Habet & illud suam admirabilitatem,  
quòd Bellarminus ut ab hoc se argumen-  
to expediret, ea responsione usus sit cu-  
jus ipse vanitatem alio loco agnovit di-  
sertissimè. Si enim Constantiensis Sy-  
nodus ambiguae dumtaxat autoritatis  
Pontifices Conciliis submissos esse edixis-  
set, nihil profecto ab ea sancitum esset  
quod pugnaret cum veritate, vel Bellar-  
mino iudice: ipse enim, ut pridem de-  
monstratum est, variis locis docet, *Ec-  
clesiam sine dubio habere auctoritatem provi-  
dendi sibi de vero Pastore quando is nullus*

*aut*

*aut dubius est.* Atqui non veritus est affirmare, Constantiensem Synodum (tam sanctum, tam celebrem, tam numerosum cœtum) ea re fuisse ab Ecclesia reprobata, quod primis Sessionibus ab ea statutum sit, Concilium esse supra Papam. Itaque fide non bona ilud agit, ut persuadeat, *Concilium il'ud non absolute definivisse Concilia Generalia habere à Christo potestatem supra Pontifices, sed tantum in casu, id est, tempore schismatis, quando nescitur quis sit verus Papa.*

Patet itaque inanissimam esse hanc primam ejus responsionem: de altera videamus.

## BELLARMINUS *ibid.*

**S**ecundò responderi potest, non fuisse Concilium Constantiense, cùm id asseruit, hujusmodi ut quæstiones de fide definire posset: nam in primis non erat tunc generale Concilium, cùm tantum adesset tertia pars Ecclesie, id est ii tantum Prælati qui obediebant Joanni: nam qui obediebant Gregorio & Benedicto repugnabant iis quæ à Synodo fiebant. Deinde non aderat tunc certus Papa in Ecclesia, sine quo dubia de fide definiri non possum: in Concilio autem nullus erat Papa. Joannes enim XXIII, qui

*Concilium inchoaverat, jam inde recesserat  
cum quarta Sessio haberetur,*

## R E S P O N S I O.

**S**unt hæc alia effugia nihilo tutiora  
de singulis pauca dixisse suffecerit.

Primum illud sit: *Non aderat tunc cer-*  
*tus Papa in Ecclesia, sine quo dubia de fide*  
*definiri non possunt.* Falsum est quod sibi  
sumit Bellarminus; falsum pariter quod  
inde vult conficere: fuit enim Joannes  
verus ac indubitatus Pontifex: duo reli-  
qui pro Pontificibus se gerentes jam e-  
rant Anti-Papæ, cum Pontificia digni-  
tate à Pisano Concilio legitimè fuissent  
exuti. Fatetur ipse Bellarminus, ita sem-  
per sensisse Romanam Ecclesiam, quæ  
inter Summos Pontifices Alexandrum V  
& Joannem XXIII numquam non recen-  
suit: idque vel eo palam fieri, quòd Ro-  
dericus Borgia, cum Pontifex creatus  
est, non Alexandri Quinti, sed Sexti si-  
bi nomen adscivit.

At quamquam nullus fuisset in Ecclesia  
indubitatus Pontifex, qualis revera non  
fuit omni illo spatio quod à Joannis XXIII  
abrogatione ad electionem Martini V e-  
lapsum est, falsum equidem est, Syno-  
dum tam numerosam ac Constantiensis  
erat, res circa fidem controversas non  
po-

potuisse definire. Est istud novum Bellarmini somnium, cui nec Scriptura suffragatur nec Traditio; ipsiusque Constantiensis Concilii gestis reprobatur. Illo enim quod jam diximus spatio à Joannis abrogatione ad Martini electionem, damnata fuere tot capita ad Wicleffi & Hussi doctrinam pertinentia: neque ullus repertus est qui se professus sit ambigere, an à legitima auctoritate damnata sint. Eodem tempore ut hæretica damnata est Joannis Parvi execranda propositio: *Quilibet Tyrannus &c.* Nec Jesuitis honorificum esset, hujus damnationis pondus in quæstionem vocare: norunt illi causam; sed de hac dicere, non hujus instituti est.

Alterum effugium hoc est: *Non erat tunc generale Concilium, cum tantum adesset tertia pars Ecclesiæ, id est ii tantum Prælati qui obediebant Joanni: nam qui obediebant Gregorio & Benedicto, repugnabant iis quæ à Synodo fiebant.* Huic objecto penitus amovendo satis est ostendisse, Joannem XXIII fuisse unicum ac indubitatum Pontificem ceteros vero pro Pontificibus se gerentes Pseudo-Pontifices fuisse, ex quo Canonica sententia generalis Concilii Pisani, omni Pontificatus jure exciderant. Graviter siquidem aberraret, qui arbitraretur non aliter Concilium

lium censeri debere œcumenicum, nisi pro tali habeatur ab iis Episcopis qui jam prius schismati inhæsisserent, utcumque fortassis fide non pessima, sed cæco affectu in illud incidissent.

Non possum etiam quin illud addam, vocabulis turpiter abuti Bellarminum, cum numerosissimam Synodum, cui doctissimi quique intererant, *tertiam partem Ecclesiæ* fastidiosè vocat; quod videlicet duæ erant *obedientia* (ut vulgò vocantur) Pseudo-Pontificibus adhærentes; quæ tamen in unum cœtum coactæ, vix cum sexta orbis Christiani parte exæquari poterant. Anne igitur Ariminense oppidum, quo id temporis omnis Gregorii obedientia continebatur, *tertia pars Ecclesiæ* vicissim dicenda erit.

Quod verò his superaddit Cardinalis ille, *Episcopos qui obediebant Gregorio & Benedicto, repugnasse iis quæ à Synodo fiebant*; illud agit ut ambiguus oculis lectorum à rei cardine dimoveat: Nam illud quidem verum est, Episcopos illos schismate implicatos, Concilium Constantiense non agnovisse pro œcumenico, quod illum à quo fuerat coactum, legitimum Pontificem esse negabant. At falsum est illos impugnasse ea decreta quæ Pontificem Concilio submissum faciunt, Quin ea sibi valdè probari professi sunt, cum

cùm Joannis XXIII abrogationem ratam habuerunt: ac cùm præterea ii qui se Benedicti obedientiæ addixerant, ea demum lege Concilio se adjunxerunt, ut Concilium novum judicium haberet ad Pontificatum Benedicto abrogandum, quem isti pro legitimo Pontifice colebant.

Tertium denique Bellarmini effugium illud voco, ubi ait: *In Concilio nullus erat Papa: Joannes enim, qui Concilium inchoaverat, jam inde recesserat.* Verum istud quidem, sed statim ab ejus fuga, edixit Synodus nihil propterea de sua vel auctoritate vel integritate decessisse. Neque impediit hæc Pontificis absentia, quo minus à Martino Quinto statutum sit, ut omnes in quibus Wicleffianæ hæreseos suspicio hæreret, interrogarentur: *Utrum credant & teneant, & asserant, quòd quodlibet Concilium generale, & etiam Constantiense, universam Ecclesiam representet. Item utrum credant quòd illud, quod sacrum Concilium Constantiense universam Ecclesiam representans approbavit & approbat in favorem fidei & salutem animarum, ab universis Christianis fidelibus approbandum & tenendum: & quod condemnavit esse fidei vel bonis moribus contrarium, hoc ab eisdem esse pro condemnato tenendum & asserendum.* Spectabant ea potissimum ad damnationem errorum Wicleffi & Hussi, quæ fa-



cta est non tantum postquam Joannes XXIII aufugerat, sed & postquam ei dignitas erat abrogata.

Mitto quæ hoc loco his adjungit Cardinalis, ut ostendat hæc Concilii Constantiensis decreta non fuisse Martini V calculo comprobata: de his enim supra dictum est quod satis sit revincendæ tam manifestæ vanitati. Vide Sect. 2. Mitto etiam quæ in Concilio Constantensi sibi visus est deprehendisse, ex quibus conficere possit Pontificem Concilio superiorem esse: Nempè, inquit egregius conjector, in Bulla Martini V, quæ edita est approbante Concilio, interrogari jubentur omnes hæreseos suspecti; *An non credant, Romanum Pontificem habere in Ecclesia Dei supremam potestatem.* Quis non videat, quàm ineptè ex iis verbis hujusmodi consecutio exprimitur? Maximè cum in eadem Bulla, alia interrogatio palam faciat, hanc supremam potestatem ad singulas tantum Ecclesias pertinere, non ad omnes in unum cœtum coactas: quod quidem à fronte pugnat cum doctrina illorum qui Pontificem œcumenico Concilio superiorem faciunt.

SECTION IV.

*De Concilio Basileensi confirmante Decreta  
Concilii Constantiensis.*

**E**odem loco quo ista de Constantiensi Synodo scribit Bellarminus, objicit sibi Basileensem, Constantiensia Decreta confirmantem. Ut verò æqua de ejus responsione sententia ferri possit, colligenda duxi quæcumque de illa Synodo variis capitibus scribit. Vel ex eo enim solo patebit, inter se pugnantia de hac re protulisse; alia manifestæ veritati adversari; quædam rursus intricasse, quæ cum explicata sunt, ea quæ sibi objicit firmantur veriùs quàm auoveantur.

**BELLARMINUS** *Lib. 1. de  
Concil. cap. 7.*

**S**extum inter Concilia partim confirmata partim reprobata est Basileense, . . . Hujus Concilii nihil est ratatum & probatum, nisi quedam dispositiones circa beneficia Ecclesiastica, quas (pacis & unitatis gratiâ,) Nicolaus prædictus (Nicol. V.) approbavit. Concilium verò ipsum reprobat in Concilio Lateranensi ultimo. Sess. 11.

## R E S P O N S I O.

**E**N ut hoc loco Concilium Basileense exhibet veluti omnibus suis partibus reprobatum, præterquam *circa beneficia Ecclesiastica*: hac fortassis parte etiam reprobandum, ni clementer indulgisset Nicolaus V. Operæ pretium fuerit videre, num similiter aliis locis scribat.

BELLARMINUS *de Ecclesia*:

*Lib. 3. cap. 16..*

**A**D sextum dico, Basileense Concilium initio quidem fuisse legitimum: nam & Legatus aderat Romani Pontificis, & Episcopi plurimi: at quo tempore Eugenium deposuit & Felicem elegit, non fuit Concilium Ecclesia, sed Conciliabulum schismaticum, seditiosum, & nullius prorsus auctoritatis. Sic enim appellatur in Concilio Lateranensi ultimo Sess. 11.

## R E S P O N S I O.

**P**Ræclaram scilicet auctoritatem, & Bellarmino iudice idoneam quæ Basileensem Synodum sanctissimè celebratam, in ventos agat! Sed de Lateranensi illo postmodum dicetur. Inde tamen

*Resp. ad objectiones Bellarmini. 159*

men constat, nec ipsum Leonem. X  
omnino Basileensem Synodum reprobas-  
se, sed tantummodo ex quo Eugenium  
Sede movit, substituto ei Felice: sub  
initia autem erat *Concilium legitimum*: nam  
& *Legatus aderat Romani Pontificis* & *E-*  
*piscopi plurimi*. At eo ipso tempore quo  
legitimum fuisse agnoscit Bellarminus,  
definivit Concilio potestatem esse in Pon-  
tificem, instauratis Concilii Constantien-  
sis de hac re sanctionibus. Ipsum Bel-  
larminum hæc fatentem audiamus.

## BELLARMINUS *de Concil.*

*Lib. 2. cap. 11.*

**C***oncilium Basileense Sess. 2. unà cum*  
*Legato Pontificis consensu statuit, Con-*  
*cilium esse supra Papam.*

## R E S P O N S I O.

**H***oc ipse jam agnoscit. Addit qui-*  
*dem: Quod certè nunc judicatur er-*  
*roneum.* Verùm hæc mera est petitio  
principii: alibi enim agnoscit, etiam *nunc*  
inter Catholicos superesse controversiam,  
utrum hæc propositio; *Concilium est supra*  
*Papam*, sit erronea annon sit. Nos ve-  
rò erroneam non esse, ex iis ipsis quæ  
fatetur Bellarminus, nullo negotio con-  
ficimus.

ficimus. Neque enim absque ingenti temeritate id erroneum existimari potest, quod legitimum Ecclesiæ Concilium definiverit. Atqui fatente Bellarmino, Concilium esse supra Papam definitum est à Basileensi Concilio, eo tempore quo erat illud legitimum & generale Ecclesiæ Catholicæ Concilium; nimirum Sess. 2. in qua una cum *Legato Pontificis Episcopi plurimi communi consensu* id statuerunt. Itaque sine magna temeritate nequit ea doctrina erronea censi.

Hæc cùm fateatur Cardinalis, quo tandem pacto respondere poterit ad ea quæ sibi objicit ex Concilio Basileensi, definiente Pontificem Concilio obedire debere, juvat ipsum audire.

BELLARMINUS *Lib. 2. de  
Concil. cap. ult.*

**R**espondeo, *Concilium Basileense legitime inchoatum, sed illegitime terminatum.*

## R E S P O N D E O.

**A**Tqui non sub finem dumtaxat Concilii, sed ipso initio, cùm, fatente Bellarmino, *legitimum Ecclesiæ Concilium* esset, ab eo definitum est *Concilium esse*  
*supra*

*Resp. ad objectiones Bellarmini. 184*  
*supra Papam.* Ergo nec minimum veri colorem habet illud Bellarmini responsum.

BELLARMINUS *ibid.*

**Q**ua autem definivit Concilium Basileense de sua auctoritate *supra Pontificem*, nullus Pontifex probavit.

## R E S P O N S I O.

**G**ratias fingitur, quæ à legitimo Ecclesiae Concilio definita sunt, vim & robur non habere nisi accedat authentica Pontificis approbatio. Ex hoc enim consequeretur licuisse olim dubitare de iis quæ circa *ἐπεὶ τὴν* à Nicæna Synodo, & circa Spiritus Sancti divinitatem à Constantinopolitana sancita sunt. Nam quæ, obsecro, ratione demonstrabitur, isthæc à Sylvestro vel Damaso solemni approbatione insignita fuisse? Si verò approbata censeantur ex eo quod nihil adversus illa egerint aut dixerint illi Pontifices, contendam ego similiter, quòd Eugenius IV approbasse censendus sit, quod à Basileensi Concilio Sess. 2, cui intererat ipsius *Legatus & Episcopi plurimi*, definitum est, nempe *Concilium esse supra Papam*. Cùm enim istud Decretum non  
ignorat

ignoraret Eugenius, tamen Sess. 16. professus est, ab initio & deinceps fuisse legitimum ac generale universæ Ecclesiæ Concilium, nihil questus de iis quæ per Legatum suum Sess. 2, aliisque tribus aut quatuor Sessionibus, in hoc negotio gesta erant.

### BELLARMINUS *ibid.*

**S***Ed reprobavit ex professo imprimis Eugenius Papa, ut patet ex Concilio Basileensi Sess. 38.*

### R E S P O N S I O.

**N**ihil quidem adversus Constantiense Concilium aut ejus Decreta dicere ausus est Eugenius IV, cùm Florentiæ in Basileensem Synodum invehetur. Verùm ad infectandos Basileenses Patres, à quibus sibi perpetuò opponi Decreta ista graviter ferebat, venit illi in mentem ea damnare *in sensu Basileensium*. Non alienum ad causam fore arbitror, si in medium producam quæ hac de re dicta sunt in Basileensi Concilio, Sess. 38. Et enim eò nos vocat Bellarminus.

*Conatur Gabriel (ita Synodus vocat Eugenium, quem non jam amplius Pontificis loco habebat) sub obscuritatibus verborum*

borum mundum involvere, dicens se damnare & reprobare veritates prædictas de potestate Concilii generalis . . . supra Papam . . . declaratas per Constantiense & Basileense generalia Concilia, ad sensum Basileensem, quem, inquit, factò demonstravit: neque illum sensum explicans, nec in quo sensu eas approbare velit, manifestans, quæ fortassis ideo sibi taceret, quoniam manifestè vidit verba dictarum veritatum ita clara esse & aperta sicut sunt, quòd de nulla obscuritate notari merito possunt, nec ad multiplices pertrahunt sensus. Et per consequens quòd ille primus sensus juxta què m se dicit reprobare dictas veritates, nullatenus allegari potest. Hoc autem notum facimus universis Catholicis, quòd nullum sensum in his habet hac sancta Synodus nec habere vult, nisi quem sacra Synodus Constantiensis habuit in declarationibus suis, sensum verum & Catholicum, quemque semper habuimus in declarationibus per nos factis, in secunda, undecima, duodecima, vigesima nona, & aliis Sessionibus nostris ac Epistolis Synodali- bus, pariter cum Cardinalibus Sanctæ Romanæ Ecclesiæ, Patriarchis, Archiepiscopis, Episcopis, Oratoribus Principum, Abbatibus, Doctoribus qui in nostro cætu adfuerunt, fideliter & unanimiter credentibus, quòd Concilium habet potestatem immediate à Christo, qui Papa obedire tenetur, prout veritas præfata,



164 *Dissertationis Pars Secunda.*  
*fata, in Concilio Constantiensi declarata,*  
*definiuit.*

BELLARMINUS *ibid.*

**R** *Eprobavit item Ecclesia tota, qua Eugenium à Basileensibus depositum semper habuit pro vero Pontifice.*

R E S P O N S I O.

**P**aucis his verbis duo continentur lapsus eruditum hominem parum decentes. Primus cum veritate tam manifestè pugnat, ut res toleranda non sit. Si enim *Ecclesia tota Eugenium à Basileensibus depositum semper habuit pro vero Pontifice*, nullam ergo Felix V *obedientiam* habuit. Ut quid igitur in Bulla Nicolai V de Amedeo dicitur, *in sua obedientia Felix dictus*? Tantùm verò abest ut Eugenius, ex quo à Basileensibus dejectus est, nihilominus verus Pontifex ab universa Ecclesia sit habitus, ut ipse Raynaldus ad Ann. 1447, fateatur, quòd cum Cæsar Germanique Principes, medii Eugenium inter & Felicem mansissent, neutrius causæ studentes, anno demum 1447; hoc est novem annis ab exuto sua dignitate Eugenio, de eo agnoscendo certis conditionibus pacti sint, quarum præcipua

qua erat, ut solenni diplomate profite-  
retur, *Se suscipere, amplecti, ac venerari*  
*Concilium generale Constantiense, Decretum*  
*Frequens, & alia ejus decreta, sicut cate-*  
*ra Concilia Catholicam Ecclesiam militan-*  
*tem representantia.* Id verò Bellarmini  
hypothesi ipsa fronte adversatur, quæ  
statuit, hoc ipso ista Constantiensis Con-  
cilii decreta reprobari, si Eugenius  
post abrogationem in loco Pontificis ha-  
beatur.

Maximè verò hîc notandi sunt Bellar-  
mini vehementes affectus, quibus in il-  
lud vitii incidit quod *pondus & pondus*  
Scriptura nominat, quodque abominabi-  
le apud Deum esse testatur. Eâdem vi-  
delicet quam hîc excutimus paginâ, de-  
monstraturus, Constantiense Concilium  
non fuisse œcumenicum, dum illa Ro-  
manæ Aulæ invisa decreta condidit, ait,  
una dumtaxat obedientia constituisse, quam  
tantùm *tertiâ Ecclesiæ partem* confidenter  
vocat! Erat igitur tunc in ea opinione,  
quamlibet obedientiam, duobus Pontifi-  
cibus à Pisano Concilio ritè dejectis, ad-  
hærentem, tertiam Ecclesiæ partem me-  
ruisse dici: licet ea quæ Gregorium XII  
sectabatur, Ariminensis oppidi finibus  
clauderetur. Nunc verò eadem istâ pa-  
gina, eandem controversiam pertra-  
ctans, nempe de Concilii & Pontificis  
gemula

gemula auctoritate, eâdem confidentiâ affirmat, Eugenium à *tota Ecclesia* verum Pontificem *semper* habitum, quamvis Felix V ut legitimus Pontifex haberetur in universa ditione Ducis Sabaudorum, in pluribus aliis Provinciis; ac à Basilcensi Concilio, quod certè majore numero Christiani Principes pro generali colebant.

Alter Bellarmini lapsus diligentem Scriptorem nihilo minùs dedecet. Siquidem existimat, ut jam dicere coeperam, non posse Eugenium postquam ei à Basilcensibus Pontificatus ademptus erat, ampliùs haberi legitimum Pontificem, quin eâdem operâ reprobari censeantur illa decreta Synodi Constantiensis quibus Concilio in Pontificem potestas asseritur: quæ duo tamen à se mutuo aliena esse, vel ex sola Germanorum Principum pactione constat, de qua mox dictum est: & ex iis item quæ gesta sunt inter Carolum VII Francorum Regem, & Eugenii Oratores in Conventu Avarici Biturigum habito anno 1440. Cùm enim duo præsertim à Rege postulassent Oratores illi, primum ne ad illa quæ ad Eugenium dignitate privandum & Felicem ei substituendum gesta erant, Rex consentiret; deinde ut Pragmaticam Sanctionem aut irritam faceret aut certè illius

*Resp. ad objectiones Bellarmini. 167*

illius vim inhiheret tantisper : Rex, communicato Consilio cum Episcopis ac Regni proceribus ejus jussu Avarici Bivrigum congregatis, respondit: Sc Eugenio quidem adhæsurum, sed eatenus tantum, quoad utriusque partis jura sibi melius cognita fierent, aut per Concilium generale, aut per *Congregationem Ecclesie sue Gallicana*, melius & *extensius convocanda* Pragmaticam autem Sanctionem, duobus ante annis ad Basileensibus Concilii Sanctiones exactam & adornatam, omnino se integram servare velle professus est. Quo quidem manifestè & solemniter, tum Basileense Concilium, tum Constantiensis Concilii litigiola decreta confirmabantur. Ea etenim decreta veluti pro Pragmaticæ Sanctionis fundamentis jacta sunt. Patet itaque non satis accuratè loquutos, qui existimare præ se tulerunt, non potuisse Eugenium, post electum Felicem, legitimi Pontificis loco haberi, nisi rejectis Decretis Concilii Constantiensis.

BELLARMINUS *ibid.*

**R**eprobaverunt denique Basileenses qui tandem sese Nicolao subjecerunt.

RE

## R E S P O N S I O.

**T**Urpe est bonos juvenes qui securius rerum veritatem se assequi posse putant, si eam in celeberrimi Cardinalis Libris confectentur, insinceris narrationibus eludere & in errorem ducere: & istud tamen est quod hic agitur.

Numquam Basileenses Patres agnoverunt se errasse, sive Eugenio Pontificatum abrogando, aut tanto zelo Concilii in Pontificem potestatem asserendo. Numquam Gallorum, Anglorum, aut Sicularum Regibus, aut Delphino, qui anno 1448 pro componendis Ecclesiæ rebus tollendisque diffidiis strenuè adlaborarunt, in mentem venit talem aliquam confessionem à Concilii illius Patribus exigendam esse. Unum ab iis postulatum est, ut promitterent se Nicolaum V agnituros, si vellet Felix pacis causa se Pontificatu abdicare. Ac vicissim Patribus promissum est, cogendum intra sex menses generale Concilium in aliqua Galliæ civitate. Aut ergo fallit Bellarminus, aut crassissimè fallitur, cum affirmat Basileenses Patres reprobasse quod definiverant, videlicet *Concilium esse supra Papam.*

BELLARMINUS *ibid.*

**R** Eprobavit ipse Papa Felix, quem Basileenses creaverunt. Nam Papa Felix tandem cessit Nicolao Eugenii successori.

R E S P O N S I O.

**H** OC ipsum durius etiam eloquitur Cardinalis Lib. 2. de Concil. cap. 13. *Dum voluerunt Basileenses schismaticis viam praecludere, ipsi novum schisma fecerunt, creato Pseudo-Papa Felice V, qui postea cognito errore abdicavit se Pontificatu.*

Legantur modo pactionis inter Nicolaum ac Felicem initæ varia instrumenta: exstant illa Tomo XIII Conciliorum, novissimæ Editionis Labbæanæ Parisiensis. Ex omnibus patebit æquo jure & dignitate agi cum utroque Pontifice, & hoc uno inter se distare, quòd Felix dignitati suæ Ecclesiæ pacem prærulerit. Quemadmodum enim in Bullis Nicolai V cùm sermo est de Eugenio, vocatur ille *pia memoriæ prædecessor noster Eugenius Papa Quartus*; Felix verò, *Amedeus in sua obedientia Felix V nuncupatus*: ita in Decreto Basileensis Concilii Lausanam translati, Felix vocatur *Sanctissimus Dominus noster Felix V*; ejus verò competitors,

tores, *Gabriel & Thomas in sua obedientia Eugenius & Nicolaus nuncupati.* Quemadmodum Nicolaus revocat & resolvit censuras omnes à se aut Prædecessore suo latas in Basileense Concilium, in Felicem omnesque illis adhærentes: ita Concilium & Felix resolvunt censuras omnes à se latas in illos qui Eugenio, Concilii sententiâ sua Sede pulso, adhæserant, aut Nicolao V. Cautum etiam est, ut creati utrimque Cardinales, honores suos retinerent. Denique ut alia omittam quæ utrimque sunt paria, veluti *Absolutiones ad cautelam &c.* planè reperitur contrarium illius quod Bellarminus confidentissimè affirmat de Felice se abdicante *cognito errore.* Nam de illo verba faciens Nicolaus, ait: *Amedeo in sua obedientia Felice V nominato, jure quod in Papatu SE HABERE ASSE- RIT, cedere volente.* Ipse autem Felix Bullarum suarum unam ita exorditur: *Dum renuntiare Papatui de proximo intendimus propter dandam pacem Ecclesiæ, cujus contemplatu Petri Sedem Domino volente conscendimus.* Sanè qui de seipso testatur se propter Ecclesiæ pacem, *Domino volente*, Petri Sedem conscendisse, seque nunc propter eandem pacem velle Papatui renuntiare, quo pacto dici poterit ea re cessisse, quod vitiosam electionem

nem

rem fuisse existimaverit? Hunc tamen rei gestæ colorem obducere nititur Bellarminus, cum ait: *Pseudo-Papa Felix, cognito errore, abdicavit se Pontificatu.*

In hac profectò controversia evenit frequenter, (quod in multis aliis locum habet) ut qui partium studio pleni scribunt, de rebus iisdem mirum quàm loquantur diversa, pro varia causæ utilitate. Quam enim secum pugnantia proferre solent Transalpini Theologi, cum de Pontificibus & Pseudo-Pontificibus illis sermo est! Differendum est de diuturni schismatis spatio usque ad Concilium Pisanum? Idola & Anti-Papæ illis sunt Clemens VII & Benedictus XIII. Mox ubi de Constantiensi Concilio disputatur, mutata scena est: postulat enim causæ utilitas, ut sub illius initia fuisse putentur tres Pontifices, quo videatur Concilium non satis numerosum ut generale censi possit: itaque idem iste Benedictus cum Gregorio illico desinunt esse Anti-Papæ; quasi novum, imo meliorem titulum servandæ dignitatis Pontificiæ acquisivissent, ex quo à Pisano Concilio erat illis dignitas abrogata. Tantùm de illis veluti incertæ auctoritatis Pontificibus scribunt, hoc est eodem illos loco habent quo Joannem XXII, de quo idem sentiunt, quam-



vis ille tam legitimus Pontifex fuerit quàm certò alii duo Pseudo-Pontifices erant.

At ecce aliam metamorphosin. Electo Martino, jam Theologis istis nullius usus sunt Benedictus, ejusque sub Clementis VIII nomine successor: itaque hi rursus fiunt Idola & Anti-Papæ. Neque cogitant levissimi Scriptores non posse post schisma ab Alphonso Arragonum Rege instauratum, haberi Martinum V ut verum, unicum, ac indubitatum Pontificem; si schisma Ferdinandi (Alphonso patris) Benedictum XIII protegentis, efficere potuerit, ne Joannes XXIII indubitatus Pontifex esset, quod isti volunt.

Eadem est Transalpinorum inconstantia circa Felicem V. Numquam Ecclesia judicavit jure ne an injuria Pontificia dignitas illi delata sit: erant ea de re & Principes, & Episcopi, & Theologi, in varias sententias distracti: cuique Pontifici sua erat Obedientia, quemadmodum ante Pisanum Concilium evenit Pontificibus, quorum alter Romæ, Avenione alter Sedem habebat. Verùm Gregorius & Benedictus, quorum causa dubia prius erat, facti sunt planè Pseudo-Pontifices, ex quo ea præstare abnuentes quæ se ad pacem Ecclesiæ dandam

dam præstituros jurejurando confirmaverant, à Concilio Pisano Pontificia dignitate legitimè sunt exuti; & tamen hos satis molliter habere solent Transalpini Scriptores: qui iidem mox prosciunt maledictis Felicem V, confidentissimè *Pseudo-Papam* vocitantes illum, de quo numquam tale aliquid judicavit Ecclesia, qui à generali Concilio electus fuerat, ab eodem Concilio semper defensus; à nullo libero & neutri parti serviente Concilio damnatus; à nullo, quod ex utriusque competitoris obedientia congregatum, utriusque partis Cardinalibus & Episcopis constaret; hoc est, à nullo quale fuerat Pisanum, dum Benedictum & Gregorium fede dejecit.

Mira sanè istæc est judiciorum perversitas, de rebus tam similibus tam variè statuentium. Ausim tamen dicere, etiam magis istam in his conspici posse, ubi de Conciliis disputant, & quæ generalia, quæ non generalia habenda sint, ex iisdem affectibus judicant. Quod dico, jam planum faciam: ducit enim nos rerum series ad Florentinam Synodum, à qua adversus Constantiensia & Basileensia Decreta definitum esse vult Bellarminus, *Papam esse supra Concilium.*

## S E C T I O V.

*De Concilio Florentino quod Constantiensis  
Concilii Decreta reprobasse dicitur.*

BELLARMINUS *Lib. 1. de  
Concil. cap. 7.*

**C**oncilium Constantiense quantum ad pri-  
mas Sessiones, ubi definivit Concilium  
esse supra Papam, reprobatum est in Concilio  
Florentino, & Lateranensi ultimo.

*Idem Lib. 2. cap. 13.*

**C**irca tempora Conciliorum Pisani,  
Constantiensis & Basileensis, plurimi  
in eam sententiam ierunt, ut Concilium es-  
set supra Pontificem . . . & quamvis postea  
in Concilio Florentino & Lateranensi ultimo  
videatur questio definita; quia tamen Flo-  
rentinum Concilium non ita expressè hoc defi-  
nivit; & de Concilio Lateranensi quod ex-  
pressissimè rem definivit, nonnulli dubitant  
an fuerit verè generale, ideo usque ad hunc  
diem questio superest etiam inter Catholicos.

**R E.**

R E S P O N S I O.

**H**Æc satis significant, Bellarminum duo ista Concilia, Florentinum nempe ac Lateranense sub Leone X, inter se conferre quoad controversiam de Concilii in Pontificem potestate, ac contendere utrique illorum Conciliorum & certi aliquid & dubii inesse. Nam pro certo habet, Florentinum fuisse œcumenicum, non ita tamen *expressè* definivisse quid de hac re sentiendum sit: contra verò, non dubitat istud definitum esse à Lateranensi; sed an istud *verè generale* fuerit, ait non constare. At quod ille de utroque indubitanter affirmat, nos planè inficiamur: atque illud præsertim hoc loco contendo, nihil à veritate alienius dici posse, quàm si affirmetur rem esse omnibus Catholicis certam, Florentinum Concilium aut verè generale habitum, aut etiam habendum.

Illud imprimis constat, numquam ita sensisse Gallicanam Ecclesiam: neque hujus rei luculentius testimonium postulari queat eâ Epistolâ, quam Concilii Tridentini temporibus scripsit Cardinalis à Lotharingia ad Amanuensem suum, sed Pontifici exhibendam: *Gallorum constans sententia est, quòd Pontificem auctoritate an-*

reccelat generalis Synodus: Constantiense Concilium in omnibus æcumenicum habetur: probatur Basileense: Florentinum nec legitimum nec æcumenicum censetur: vitamque citius Gal-  
lis omnibus eripias, quàm eos in contrarium abducas. Ejusdem rei argumentum subministrat conventus ille Avarici Biturigum habitus anno 1440, cui cum Carolo VII Francorum Rege intererant magno numero Episcopi & Regni optimates. Cùm enim postulassent Eugenii oratores, ne Basileense Concilium veluti universale & legitimum Rex in ditione sua coli pateretur, præsertim ex quo illud Ferrariam transtulerat Eugenius, post consilia sex diebus communicata, tandem à Rege hoc responsi datum est: *Quod tenuerat Concilium Basileense pro legitimo, & ad ipsum Ambasiatores miserat; multa bonæ constituerat quæ approbat, nec unquam Congregationem Ferrariensem pro Concilio habuerat aut habebat: nec proindè Florentinam, quæ ipsa eadem est.*

At quo Scriptores istos Aulæ Romanæ suis armis conficiamus, recolenda tantummodo est illorum inconstantia, dum pro diversis causæ suæ utilitatibus de rebus iisdem scribunt diversissimè; quod & novissima sectione notavimus.

Non placet illis Concilium Constantiense

tiensæ œcumenicum haberi illo tempore quo definivit debere Pontificem Concilio *obedire*; constabat enim, inquiunt, solâ Joannis XXIII *obedientia*; cùm ii qui Gregorio & Benedicto parebant, Concilium œcumenici loco non haberent. Inane quidem illud prætextum est adversus Constantiensem Synodum; quòd, ut suprà evicimus, Joannes indubitatus Pontifex esset, ex quo duo alii, à Synodo Pisana reprobati, jam facti erant Pseudo-Pontifices: ut exigua pars Christiani orbis duobus istis adhærens, efficere non potuerit quo minùs Constantiensis Synodus legitima atque œcumenica & esset & haberetur. Hæc igitur isti Scriptores immeritò: at si illis arridebat tamen hoc argumentum, quæ tandem ista est judiciorum perversitas, ut non sentiant hinc multo magis consequi, non posse Florentinam Synodum ut universalem haberi? Eam enim ut *Conciliabulum* rejiciebat Basileensis Synodus, quæ etiam tum vige-  
bat, & quam Galli, Germani, Anglique amplectebantur. Idem sentiebant qui Felici V se addixerant, ut jam illas Provincias mittam quæ inter Eugenium & Felicem mediæ, neutri, priusquam causa diremta esset, voluerunt parere; & quæ profecto Ferrariensem aut Flo-

rentinum conventum non existimabant universale Concilium censi posse. Denique Gallicana Ecclesia, quæ non minus illis temporibus quàm nostris in præstantissimis orbis Catholici Ecclesiis numerabatur, licet interim Eugenium agnosceret, donec utriusque Pontificis causa accuratiùs excussa foret, quoad reliqua tamen Basileensi Concilio adhærebat, nec umquam illi probata est aut Ferrariensis aut Florentina congregatio: quòd non existimaret hanc Pontifici potestatem esse, ut invitis Basileensibus Patribus Concilium Ferrariam legitimè transferre posset.

Nec admodum juvabit Scriptores illos, si dixerint, immerito Florentinæ Synodi auctoritatem impugnasse omnes illos. Nam ut istud quod non minus falsò quàm confidenter jactant, illis largiamur; hoc modò edisserant, an non & immeritò Arragones & Ariminenses Constantiensi Concilio oblucentur? Si abnuunt, quid impudentius? Neque sanè abnuunt; sed merito-ne an immeritò factum sit non disputantes, factum tamen est, inquiunt: idque satis ad causam suam esse putant, si demonstrent, non fuisse eo tempore *obedientias* Benedicti & Gregorii cum Constantiensi Concilio junctas; quocirca universalis Eccle-  
siæ

fiæ Concilium dici non potuerit. Quid-  
nî igitur idem sentiunt de Florentino?  
Quidnî similiter dicunt: Merito-ne an  
immeritò Concilium Basileense, cui præ-  
erat Cardinalis sanctimonia insignis, tot-  
que intererant Episcopi & viri eruditi, ut  
*conciliabula* rejecerit Ferrariensem &  
Florentinum conventum: rectè ne Feli-  
ci V adhærentes idem senserint: rectè  
ne Germani neutrius partes sequentes,  
conventus illos non censuerint legitimos:  
ipsi denique Galli, etsi interim Eugenio  
faventes, Basileense Concilium colue-  
rint: Hæc omnia, inquam, rectè ne an  
secus facta sint, facta fuisse constat: suf-  
ficitque ad causam hanc, omnes illas  
Provincias (tantam videlicet orbis Chri-  
stiani partem) nullas partes in Concilio  
Florentino habuisse; nec illud aut legi-  
timum aut generale censuisse; ex his e-  
nim certum esse debet, non posse illud  
annumerari legitimis ac universalibus  
Conciliis. Judicent nunc æqui rerum  
æstimatores quæ habenda sit fides ejus-  
modi Scriptoribus, qui si id quod est fa-  
teri vellent, idem sibi dictum usurpa-  
rent, quod suarum partium Episcopis  
tribuebat Donatista quidam: *Quod volu-  
mus sanctum est.*

B. Ludo-  
vicus  
Aleman-  
nus.

Atque hæc de Concilii Florentini au-  
toritate sufficient. Quod verò addit



Bellarminus, ab illo Concilio adversus Constantiense & Basileense definitum esse Pontificis potestatem in Concilium, prodit inconstantiam suam. Ubi Constantiense Concilium in iis recenset quæ *partim reprobata* vocat, confidenter affirmat, ea parte reprobatum esse à Concilio Florentino, qua definiverat *Concilium esse supra Papam*: atque ecce duobus aliis locis de hac quæstione ex instituto disputans, fateri cogitur *non ita expresse* rem à Florentinis definitam esse: primò videlicet, Lib. 2. de Concil. cap. 13. ut suprâ demonstratum est: ac mox iterum cap. 17. cui hunc titulum fecit: *Summum Pontificem absolutè esse supra Concilium*. Eo enim loco, etsi pronuntiare audeat, opinionem suam *esse ferè de fide*, nihil ex Florentino Concilio profert, cùm tamen eo ad tam audacis pronunciati veritatem comprobendam indigeret, si quid illic simile fuisset definitum. Sed nimirum sensit, nihil istinc elici pro illo posse, nisi obtorto collo, quod dicitur, reluctantes ad se trahere vellet. Satiùs itaque duxit, illo capite ne mentionem quidem injicere de illo Concilio.

Itaque si ritè expendatur quid ex Concilio Florentino protulerit Bellarminus ad infirmanda Decreta Constantiensia, videbitur ille hac fere ratione dissidere:

Con-

Concilium mille ferè Patrum, in quibus trecenti Episcopi, conceptis verbis definivit, *Concilium esse supra Papam*: Aliud Concilium, Patrum numero priore isto longè inferius, ac de quo majori jure dubitatur an œcumenicum sit, magnificis quidem titulis & exquisitis appellationibus Summum Pontificem ornavit; verùm adeo nihil *expresse* circa hanc controversiam definivit, ut illius dicta non proferre satius duxerim. Hinc fortassis existimet quispiam, posterius illud Concilium ad prioris auctoritatem infirmandam nihil valere; verùm aliter mihi visum est; judicavi enim postulare utilitatem causæ quam susceperam, ut iudicatum affirmarem, posterius illud Concilium prioris Decreta de Conciliorum auctoritate abrogasse; non enim dubitavi, quin multi essent quibus illud dixisse sufficeret ad rejiciendum Concilium Constantiense, qua parte definivit *Concilium esse supra Papam*.

Utrumque turpe sit ita animo affectum esse, eò tamen ducit illa Bellarmini levitas, temporis & causæ tam indecorè servientis. Meliori sanè fide rem eandem pertractat Andreas Du Vallius. In-  
genue fatetur, nihil in alteram partem à <sup>M. Du</sup> Val.  
Concilio Florentino sancitum esse. Juvat integrum illius Scriptoris locum pro-

*Parisien-* ferre , præsertim quòd is sit qui reli-  
*sis.* cta vulgari doctrina Facultatis suæ ,  
 Transalpinorum causæ studuit , iis-  
 que proinde suspectus esse non debet.

*De supr.* Sic igitur ille : *Posterior verò sententia,*  
*potest. Pa-* qua Pontifex Concilio superior statuitur , non  
*pa part. 4.* est etiam de fide : tum quia satis constat ,  
*quest. 8.* Concilium Florentinum auctoritatem Papa su-  
 pra Conciliū non definivisse , etsi definiat  
 eum esse Christi Vicarium , totius Ecclesiæ ca-  
 put , & à Christo illi traditam potestatem  
 regendi universalem Ecclesiam ; quod nemo  
 eorum qui contra sentiunt , negat. Illius  
 enim potestatem in Ecclesiam universalem ubi-  
 que locorum diffusam , admittunt : & omnium  
 Christianorum Patrem & Doctorem eum  
 agnoscunt. Sed contendunt , Concilium Flo-  
 rentinum non propterea definivisse , eum in  
 Ecclesiam universalem , quatenus est legitime  
 congregata , & in Concilio aliquo generali-  
 ter per suos Prelatos unita & consensiens ,  
 potestatem habere.

## SECTION VI.

*De Concilio Lateranensi sub Leone X.*

BELLARMINUS Lib. 2. de Con-  
 ciliis cap. 17.

**L**ateranense ultimum sub Leone X Sess.  
 XI, disertè & ex professo docuit Pon-  
 tificem esse supra omnia Concilia , & repro-  
 bavit.

Resp. ad objectiones Bellarmini. 183

Evit contrarium decretum editum in Concilio Basileensi, solum, inquit, Romanum Pontificem, tamquam super omnia Concilia auctoritatem habentem, Conciliorum indicendorum, transferendorum, ac dissolvendorum plenum jus & potestatem habere, nedum ex Sacra Scriptura testimonio, dictis sanctorum Patrum, ac aliorum Romanorum Pontificum; sed propria etiam eorundem Conciliorum confessione manifestè constat.

Ad hunc locum nihil potest responderi, nisi vel non fuisse ab Ecclesia receptum, vel non definivisse hoc tamquam de fide. Sed non fuisse generale vix dici potest. Nam etsi fuerunt Episcopi paucissimi, nam ad centum non pervenerunt, tamen Concilium omnibus patebat & omnes vocati fuerant, & in eo Summus Pontifex verus & indubitatus præsidebat.

Quod autem non fuerit receptum, saltem ab omnibus, parum refert. Nam Decreta Conciliorum non indigent approbatione populi, cum ab eo non accipiant auctoritatem. Verum est quidem Decreta de moribus, si non recipiantur, & Pontifex conniveat, tandem consuetudine abrogari: sed hoc non accidit ex eo quod indigeant populi approbatione, sed quia Decreta mutabilia sunt, & cum Pontifex videt longo tempore ea non servari, & tacet, censetur ipse abrogare. Ad Decreta de fide immutabilia sunt, nec  
possunt.

possunt ullo modo abrogari postquam semel statuta sunt. Tale autem est hoc de quo agimus.

Quod verò Concilium hoc rem istam non definierit propriè, ut decretum fide Catholica tenendum, dubium est: & ideo non sunt propriè hæretici qui contrarium sentiunt, sed à temeritate magna excusari non possunt.

## R E S P O N S I O.

**H**Æc omnia tam inania sunt, tam ruinosa, ut facilè evertas uno Andreæ Duvalii loco, Romanis nec infen-

De Supr. si, nec suspecti.

potest. Pa- *Ad Concilium Lateranense, inquit, quod*  
pe, part. *multò expressius loquitur quàm Florentinum,*  
4. q. 7. *varia sunt responsiones. Quidam enim aiunt*  
*non fuisse verè & propriè generale, cùm ei*  
*vix centum Episcopi interfuerint. Alii di-*  
*cunt, caput illud undecimum in quo de auto-*  
*ritate Concilii supra Pontificem mentio fit, à*  
*Concilio non fuisse discussum aut examinatum,*  
*sed tantum perlectum coram Prælatis Conci-*  
*lii, qui sine prævio examine illud approba-*  
*runt: ideoque dici non conciliariter conclusum*  
*& definitam, sicut de Concilii Constantien-*  
*sis definitione dictum est. Alii sic rem ex-*  
*pediunt: Etiam si, inquit, Concilium ab-*  
*solutè fuisset generale (quod adhuc propter E-*  
*piscoporum paucitatem relinquitur incertum)*  
*tamen rem ipsam ut Decretum fidei Catholi-*  
*ca non definivit: nulla enim in verbis Con-*  
*cilii*

cui nota apparet, ex qua fidei definitionem colligamus: nam nec anathema pronuntiat in eos qui contrà sentient; nec dicit se hoc expressè aut propriè definire; aut esse de necessitate salutis ita credere; vel quid simile, ex quo expressa definitio colligatur. Alii denique respondent, Concilium eatenus auctoritatem Papæ supra Concilium definire, quatenus id ex Scripturis, Patribus, & antiquis Canonibus manifestè constare censetur: ad hæc enim, si omnia verba attentè expendantur, vim suæ definitionis, si qua sit, Concilium revocat: Atqui quod res illa de fide sit, ex nullo Scripturæ, Patrum, aut antiquorum Canonum testimonio constat: igitur non potest illud dici à Concilio Lateranensi tamquam de fide definitum. Caterum non tantum neutra harum opinionum hæretica est, sed etiam neutra est erronea & temeraria, saltem temeritate opinionis.

Quid igitur sibi vult Bellarminus, ubi cum præclaris doctissimisque Theologis veluti clementer acturus, non esse quidem propriè hæreticos, benignissimè scilicet proficitur? Nihil illi docent, præter id quod à Conciliis Constantiensi & Basileensi, vel ipso fatente Bellarmino, definitum est: & tamen benè cum illis agi existimat, si hæretici non habentur! Quin quo magis sentiant se illo crimine sola mitissimi Cardinalis indulgentia liberari, addit, illos

illos à temeritate magna excusari non posse. Neque censuram illam censurâ dignissimam, alio argumento firmat, quàm auctoritate Lateranensis Concilii sub Leone X : de quo fatetur quidem, tribus modis responderi posse, sed duobus prioribus immeritò rejectis, tertio demum aliquam veri speciem inesse agnoscit. Nos verò isthæc paulò diligentius pertractabimus.

Ait itaque imprimis, *vix dici posse* Lateranense non fuisse legitimum & generale Concilium. At, quod pace illius dictum sit, utrumque jure dicitur. Et enim nihil magis proprium est legitimo Concilio quàm libertas : quæ esse nulla potest, nisi eo loco congregetur ubi liberè & absque metu quisque possit ferre sententiam. Hac libertatè quia caruit Concilium Ephesinum secundum, *Latrocinium* dictum est, non Concilium : nec sine ineptia contendit Bellarminus, non alia cāusa illud Concilium nullum robur habuisse, quàm quòd noluerit Romanus Pontifex illius Acta confirmare. Quis porrò dicere queat in Lateranensi isto Concilio veram libertatem fuisse? Indictum à Julio II omnium Pontificum incitatissimo, cui majori curæ erant res bellicæ quàm Ecclesiasticæ. Is quo viam sibi ad Pontificatum sterneret, pa-  
cifici

Resp. ad objectiones Bellarmini. 187

cifici & religiosi hominis speciem præ se ferebat, proposito Cardinalibus jurejurando, quo is qui elegeretur ad Apostolicum munus, multa se præstiturum confirmaret, ac præsertim quòd nulli Regi, Principi, aut Domino, aut communitati non subdita sibi, non movebit bellum, aut cum eis ligam faciet ad inferendum alicui bellum sine consensu duarum ex tribus partium Dominorum Cardinalium. Item quia celerius convenit celebrari Concilium, promittet & jurabit, intra biennium à creatione sua, illud indicere in loco libero & tuto. Atque id quidem statim post sui electionem, quæ anno 1503 facta est, se præstiturum, juravit Julius; sed illius sacramenti parum memor, fuscitavit atrox bellum quo omnis Italia conflagravit; indicendi Concilii, & omnis Pontificii muneris adimplendi ex æquo securus. Nullo enim Concilio indicto, jam septem anni effluxerant, cum sensit seriò illius convocationem à Cæsare Maximiliano I, & Francorum Rege Ludovico XII flagitari: novemque Cardinales, quo se tyrannide illius eriperent, Pisas se recepisse, atque illic indixisse Concilium.

Tum verò illud disturbaturus Pontifex, mox aliud Romæ convocavit, ubi erat ipse ingenti exercitu & ad nutum paratissimo stipatus, egregiè scilicet juris-



*Apolog.**Conc. Pis.*

risjurandi religionem servans, quo adstringebatur convocare Concilium *in loco tuto & libero*, ad reformandam Ecclesiam in capite & in membris. Liberumne fuisset Episcopis, Gallis, Germanis, Anglis, Hispanis, proferre sententiam adversus tam iniquam & S. Petri Successore indignam agendi rationem! Atque istud est quod exposuerunt Patres Pisis congregati, cum eos ad suum istud Lateranense Concilium invitaret Julius, facta libera commeandi potestate. Responderunt enim, nullam sibi urbem Romanam minus tutam esse; cum palam esset habere illic Pontificem Equitum perditumque copias instructissimas, arces munitissimas, classem non procul paratam; urbem denique ipsam, populos finitimos bello & armis assuetos à suo nutu pendentes, assuetosque Capitaneos pro Pontificis voluntate Cardinales & Prælatos parvi pendere. Quam molesta esse non debet ista recusatio! Quis enim, ut elegantissime ait Clemens V, ad judicem grandi & feroci exercitu stipatum facile venerit? Quis auderet, aut qua ratione teneretur illis se ultronem offerre, quorum non temere violentia timeatur? Nec ad justissimum animorum Patrum timorem tollendum, ampla illa verba salvi-conductus à Pontifice oblatis proficiunt. Quæ enim solemniior umquam fides & promissa, quam illa

*De Capitulorum Conclavis? Quo verò pacto servata sint, creationes Cardinalium, & eorum libertas minimè servata ostendunt. Innocentius III docet, non teneri quemquam cum litteris salvi-conductus sese adversanti credere.*

Leo X, qui militari isti Pontifici successit, ac Lateranense Concilium continuavit, iisdem quibus Julius moribus fuit: perindè rei bellicæ studiosus, à reformanda Ecclesia perinde alienus. Nichilo itaque tutior sub illo erat Lateranensis Aula, aut aptior habendo Concilio libero. Diu erat ex quo ob Pontificum animos à servandis canonibus alienos, denunciatum fuerat Romanis, non censerì idoneum Palatium Lateranense ad Congregationem Concilii, in quo de Reformatione Ecclesiæ in capite & in membris agendum esset.

Ita jam palam locutus fuerat Joannes Dauvet in Parisiensi Curia Cognitor Regius, cùm à quodam Decreto Pii II variisque ejusdem molitionibus, ad generale Concilium provocaret, cùm enim diceretur Pius velle Concilium aliquod in istud Lateranense Palatium convocare, adjicit Regius Cognitor: *Nec credendum est, in veritate subsistere quod nonnulli ferunt, SS. Dominum nostrum velle in Laterano Concilium celebrare. Stante enim con-*  
tradi-

*eradiatione qua Summus Pontifex adversus Canones Conciliorum agere videtur, non illio esset plena deliberandi libertas. Merito itaque Concilium illud Lateranense, quod tanti facit Bellarminus, nec legitimum nec œcumenicum censeatur.*

Præterea, ut nihil jam de erepta libertate conquereremur, nihilne istud est quod fatetur idem ipse Bellarminus, huic Concilio paucissimos Episcopos interfuisse, qui *nec ad centum pervenerunt*? Adde-  
re potuisset in his ipsis vix alios quàm Italos fuisse, quin ex iis plerosque qui ad Pontificis Aulam pertinent. Eccui videri poterit ejusmodi cœtus idoneus ad Ecclesiam universalem exhibendam? Aut qua fronte eum talem censebunt ii, qui negant Constantiense Concilium, cùm ex 300 Episcopis magnoque eruditum virorum numero constaret, fatis universale fuisse ut Ecclesiam exhibere crederetur, quòd Arragones & quidam alii Hispanienses illi non interessent?

Altera responsio quam Bellarminus rejicit, hæc est; non fuisse Concilium istud ab Ecclesia receptum. Quod verò ille huic responso opponit, plane à causa alienum est. *Decreta, inquit, Conciliorum non indigent approbatione populi . . . Decreta de fide immutabilia sunt, nec possunt ullo modo abrogari postquam semel statuta sunt.*

**¶** *Tale autem est hoc de quo agimus.*

Ridiculè ! Non enim hic de Concilii  
Decretis agitur, sed de ipso Concilio :  
neque de populi, sed de Episcoporum  
approbatione ; quorum sanè ingens nu-  
merus, cum regionibus integris adversa-  
bantur Lateranensi Concilio. Quin il-  
lud constat, majorem partem Episco-  
porum Catholicorum noluisse probare ea  
quæ illic gesta erant : noluisse etiam  
Concilio interesse, quod nec liberum  
censerent, nec ejusmodi ut sincerè depra-  
vatorum morum & disciplinæ emendatio  
ab illo sperari posset.

Quàm ab eo Concilio recipiendo aliena nominatim fuerit Gallia, palam facit intercessio ac provocatio Senatus Parisiensis, & ejusdem urbis Academiae. Exstant illarum instrumenta Tom. 3. Collectionis rerum à Clero Gallicano gestarum pag. 148. Ubi & hæc leguntur: *Quia Senatus pro comperto habet, Congregationem quam Lateranense Concilium vocitant, omni ope ac studio moliri, quo Sanctionem Pragmaticam & Decreta in eo contenta &c. Certumque est Cognitorem Regium statim atque ista Sanctionis Pragmaticæ abrogatio illi innotuit, tum suo, tum Senatus, & omnium Gallorum nomine de illa... ad Concilium provocasse: idem Senatus amplius adhaerendo prædictæ appellationi & in*

*ea constanter perseverando, iterum provocavit & quantum opus de integra provocat propter causas & rationes in actis prædictæ appellationis fusè expressas, ad Papam melius consultum, & futurum Concilium generale legitime congregandum. Idem fecit Academia, ut ejusdem Libri pag. 162. conspici potest. An non hæc affatim demonstrant, nulla ratione posse illud Concilium dici legitimum aut generale, quidquid interim moliti sint Julius II & Leo X, ut veluti œcumenicum ab omnibus coleretur?*

At illud miror non animadvertisse Bellarminum, se adversus semetipsum arma suppeditare. Observat enim, ad fidem pertinere hanc controversiam, *an Concilium sit supra Papam*, an contrà: ac deinde, Decreta Conciliorum in iis quæ ad fidem pertinent, *immutabilia esse, nec posse ullo modo abrogari postquam semel statuta sunt*: adeo ut nec ipse Summus Pontifex adversus illa quidquam valeat. Hoc enim discriminis statuit Bellarminus inter fidei & morum Decreta, *Decreta de moribus si non recipiantur & Pontifex convineat, tandem consuetudine abrogari, quia Pontifex censetur ipse abrogare; non verò ita esse quoad Decreta de fide*: censet ergo ne ab ipso quidem Summo Pontifice Decreta de fide abrogari posse postquam semel

Per mo-  
res, ea  
quæ ad  
discipli-  
nam ex-  
terio-  
rem  
pertinent  
intelli-  
guntur.

mel statuta sunt. Ex his nullo negotio conficies frustra provocare Bellarminum ad Florentinum & Lateranense Concilium, quasi damnantia id quod in Constantiensi & Basileensi fuerat sancitum. Qua enim arte solvetur hoc argumentum.

Decreta Conciliorum generalium in iis quæ ad fidem spectant sunt immutabilia, nec ullo modo abrogari possunt ne ab ipso quidem Summo Pontifice, postquam semel statuta sunt: Atqui fatetur Bellarminus Concilium Constantiense (quod etiam eo tempore generale fuisse evicimus) *definivisse Concilium esse supra Papam*: fuitque de eo Decreto *Nationaliter* deliberatum & *Conciliariter* pronunciatum; accessitque proinde Martini V. confirmatio. Et fatetur idem Cardinalis, Concilium Basileense fuisse legitimum Ecclesiæ Catholicæ Concilium, cum in 2 Sessione cui intererat Pontificius Legatus, unanimi consensu statuit Concilium esse supra Papam.

Ergo illa Decreta duorum istorum generalium Conciliorum, sunt *immutabilia*: nec ullo modo abrogari potuere per posteriora Concilia. Atque ita frustra in proferendis Florentinis & Lateranensibus Decretis desudatur.

Tertia tandem responsio ad Lateranensis Concilii Decretum, quam non ex omni parte ausus est Bellarminus rejice-

re, hoc habet; dubium saltem esse, an id quod de auctoritate Pontificis statuit illud Concilium, *proprie definierit ut Decretum Catholica fide tenendum.*

Nos verò non id dubium, sed certissimè falsum esse contendimus: nam, ut rectè Duvallius suprà relatus, *Alii dicunt caput illud undecimum in quo de auctoritate Concilii supra Pontificem mentio fit, à Concilio non fuisse discussum aut examinatum, sed tantum perlectum coram Prælati Concilii, qui sine prævio examine illud approbarunt, ideoque dici non posse conciliariter conclusum & definitum, sicut de Concilii Constantiensis definitione dictum est.* Quod hîc de Decreto Concilii Constantiensis admittet ille, facit à Bellarmino in errorem ductus. At quod Lateranense Decretum attinet, argumentum ejus sanè validum est, & rem conficit. *Alii sic rem expediunt, prosequitur Duvallius: Etiam si, inquiunt, Concilium absolute fuisset generale (quod adhuc propter Episcoporum paucitatem relinquitur incertum) tamen rem ipsam ut Decretum fidei Catholica non definiunt: nulla enim in verbis Concilii nota apparet ex qua fidei definitionem colligamus. Nam nec anathema pronuntiat in eos qui contra sentient, nec dicit se hoc expressè aut proprie definire; aut esse de necessitate salutis ita credere; aut quid simile ex quo expressa definitio colligatur.* Id quidem verissimum est,

*Resp. ad objectionis Bellarmini. 19;*

est, perpendentique hanc Leonis X in Concilio Lateranensi orationem, patebit historicam potius narrationem esse quàm fidei Decretum. Sed hoc omne dilucidius fiet, ex hac alia Duvallii observatione. *Alii denique respondent, Concilium eatenus auctoritatem Papa supra Concilium definire, quatenus id ex Scripturis, Patribus, & antiquis Canonibus manifestè constare censetur: ad hæc enim, si omnia verba attentè expendantur, vim suam definitionis, si qua sit, Concilium revocat. Atqui quod res illa de fide sit, ex nullo Scriptura, Patrum, aut antiquorum Canonum testimonio constat. Igitur non potest illud dici à Concilio Lateranensi tamquam de fide definitum.* Pulchrè quidem hæc notavit Duvallius: sed potuisset validiora inde argumenta elicere. Non enim istud modo dici poterat, non esse hanc fidei definitionem, sed ne prorsus quidem esse definitionem; quoniam non aliud sit, quàm mera narratio, eaque non valde fida, ac quæ proinde nullo loco habenda sit. In promptu autem est illud demonstrare.

Namque undecima illa Sessio continet quamdam Leonis X Bullam, qua non dogma aliquod definiendum suscipit, sed sanctionem Pragmaticam abrogandam, quod Pontificis arbitrio permiserat Cancellarius Antonius Du Prat, sine Eccle-



siæ Gallicanæ assensu, post Bononien-  
sem Collationem inter Pontificem & Re-  
gem Franciscum I.

Præfatus Pontifex, in Pragmaticam  
Sanctionem, quæ tantummodo jubet  
Conciliorum Constantiensis & Basileensis  
leges circa Ecclesiæ reformationem ser-  
vari, acerbissimis vocibus invehitur,  
*Francia corruptelam* vocitat, *Sedis Aposto-  
lica detrimentum & vilipendium*, *schisma  
manifestum foventem & continentem*, *schis-  
matis tempore factam à non habentibus po-  
testatem*. Quasi verò in schisma omnis  
Gallia proruisset, cum unanimi omnium  
Regni Ordinum sententia probavit &  
servari jussit, quod ab œcumenicis Con-  
ciliis ad reformandam Ecclesiam sanc-  
tum fuerat.

Magnum deinde suæ causæ patrocini-  
um hinc arcessit Leo, quòd Baluensis  
Cardinalis Regem suum Ludovicum XI  
fallens, cum ad Pragmaticam Sanctio-  
nem abrogandam induxerat: quamvis id  
quidem irritum fuerit, intercedente Co-  
gnitore Regio quo minus Edictum Re-  
gium in tabulas Supremi Senatus refer-  
retur; ipsoque tandem Rege errorem in  
quem impulsus fuerat agnoscante, & sen-  
tentiam mutante.

Causam verò, quæ hanc Sanctionem  
Romanæ Aulæ facit esse tam invisam,  
non reticet Leo: scilicet (audite scelus)  
adimit:

adimit illa Pontifici facultatem conferendi beneficia Ecclesiastica Romana Ecclesie Cardinalibus, nec non aliis viris doctis & personis quibus abundat curia, & à quibus Sedis Apostolica & Romani Pontificis atque universalis, autoritas & potestas observaretur.

Post tam præclarum exordium, tandem ita decernit Pontifex: Quapropter S. Leonis I imitatione, qui in Synodo Chalcedonensi ea abrogavit quæ in Synodo Ephesina decreta fuerant, Leo X pronuntiat se salva conscientia, proprioque honore & ipsius Ecclesie dignitate non posse aut debere diutius pati Pragmaticam invetescere. His verbis continetur quidquid est dispositivum, ut vocitant in ea Bulla: & hæc est quam se ait Leo edidisse sacro approbante Concilio. Et de ista tali decernet Bellarminus, quique ejus veluti præceptoris vestigia premit Schelstratanus, non posse nos sine magna temeritate huic non assentiri! Paucos equidem futuros existimo, qui sentiant nefas esse dubitare, an non potuerit hic Pontifex salvâ conscientia finire ut Pragmatica Sanctione uteretur Ecclesia Gallicana.

Ut ut sit, quid in Bulla subsequatur audiamus. Respondet Pontifex ad objecta quædam pro Sanctione Pragmatica: quæ responsio tria aut quatuor complectitur, quæ manifestæ vanitatis sunt: ac præterea nonnullas hypotheses, quæ,

id evertunt quod illi maximè cordi erat constituere. Accipite objecta : *Neque quicquam referre, ait, quòd illa, omniaque contenta in ea, ex Decretis Synodi Basileensis deprompta & in Bituricensi congregatione condita & recepta fuerint.* Quibus ita respondet : *Cùm hac omnia contigerint post translationem Synodi Basileensis Eugenii auctoritate factam, ab eo tempore Congregationem Basileensem nomen mereri conciliabuli aut potius conventiculi, ideoque nullum robur habere.* An illud etiam jubebimur credere, omnia Basileensis Concilii Decreta, quæ in Galliis servanda statuit Pragmatica Sanctio, condita fuisse postquam Eugenius Concilium illud se Ferrariam edixerat transtulisse ? Atqui constat, ex omnibus illis Decretis non nisi duo edita esse post id temporis.

Sed benè habet quod ex his saltem liceat intelligere, nihil invenisse Leonem quod in aliis Decretis ac in ipso Basileensi Concilio reprehenderet, hoc est nihil omnium istorum potuisse reprehendere quæ ante illud Eugenii inceptum Basileæ gesta fuerant : imò satis liquet, omni illo tempore quod præcessit, legitimum Concilium fuisse ex sententia Leonis, cùm *ab eo demum tempore* in Conciliabulum desierit, ipso judice. Necesse ergo illi erat comprobare Decreta Sess. V. Concilii Constantiensis, quæ instaurata

& confirmata sunt in Basileensi, ante illam quàm dicunt translationem; atque eo tempore quo fuisse illud *legitimum* Ecclesiæ Catholicæ Concilium, in quo aderat Legatus Summi Pontificis & Episcopi plurimi, jam pridem audivimus fatentem Bellarminum.

Pergit respondere Pontifex: *Cum præsertim solum Romanum Pontificem auctoritatem super omnia Concilia habentem, Conciliorum indicendorum, transferendorum, ac dissolvendorum plenum jus & potestatem habere, nedum ex Sacra Scriptura testimonio, dictis Sanctorum Patrum, & aliorum Romanorum Pontificum etiam Prædecessorum nostrorum, Sacrorumque Canonum Decretis, sed propria etiam eorundem Conciliorum confessione, manifestè constet: quorum aliqua referre placuit.* Quod his verbis affirmat Pontifex, certum esse pro hypothesei habet, ex Scriptura, Patribus, Pontificibus, ipsisque Conciliis. Nihil ergo definit: non enim hoc agebatur: sed quod id causæ suæ opportunum sit, profert ut rem comperitam. Et agit quidem commodè: nam eatenus tantum jubet verbis suis fidem haberi, quatenus earum veritatem certis auctoribus planam faciet, ac primum Scripturis, ex quibus nobis proferri quod demonstret Pontifici ampliorem potestatem esse quàm Concilio, avidè profectò expectamus. Deinde SS. Patribus, in quorum scrip-

tis nil tale hæctenus repertum est. Postea ex Pontificibus, quorum fortasse aliqui postremis temporibus tale quid dixerint : quos dignitatis suæ plus æquo studiosos, in hac causa arbitros esse non decet. Denique ex ipsis Conciliis, quorum, quia visa est major auctoritas, testimonia quædam censet Pontifex esse proferenda.

*In Alexandrina enim Synodo, inquit, Athanasio ibidem existente, Felici Romano Pontifici ab eadem Synodo scriptum fuisse legitimus, Nicanam Synodum statuisse, non debere absque Romani Pontificis auctoritate Concilia celebrari.* Pulchrè sanè initium facit à commentitia fictæ Synodi Epistola, quæ inducit Synodum Nicænam ea dicentem quæ nusquam dixit : & quæ si dicta essent, non illud conficerent, esse Pontifici potestatem Concilia pro libidine dissolvendi aut transferendi.

Pergit : *Neque nos latet, eundem Leonem Pontificem Secundam Ephesinam Synodum ad Chalcedonem transtulisse.* Hoc verò etiam apertius falsum est. Secunda Ephesina Synodus initium & finem accepit Anno 449 : Chalcedonensis verò, mense Octobri anni demum 451 habita est, hoc est duobus annis postea quàm Ephesinæ finis esset impositus : nec Chalcedonem primùm, sed Nicæum convocata est ; atque à Cæsaribus quidem, ut illorum temporum ferebat usus,

Nicæâ.

Nicæâ Chalcedonem à Martino Cæsare translata est, ea re ut ipse posset Synodo interesse, nec eum procul Constantinopoli discedere sinerent Imperii negotia. Quo igitur auctore ait Leo X de Leone I: *Neque nos latet, Leonem Pontificem, secundam Ephesinam Synodum ad Chalcedonem transtulisse?*

Etiamnum pergit Pontifex: *Martinum etiam Papam Quintum, presidentibus suis in Concilio Senensi potestatem transferendi Concilium dedisse, nulla consensus ipsius Concilii mentione habita.* Aliud tanè indicatur ipso instrumento, quo declaratur Concilium Senis Basileam transferri, quod quidem Senis conditum fuit, perlectum verò in prima Basileensis Concilii Sessione. In eo enim nominatim notatum est, transferri Concilium non modo auctoritate Legatorum Martini V, sed & Deputatorum à nationibus: *Prædicti Domini quatuor Præsidentes . . . per organum unius ex ipsis, in ipsum locum, videlicet Basileensem civitatem, per ipsos Dominos Deputatos electam, consenserunt.*

Quod verò his adjungitur in Leonis X Bulla, de insigni honore quo prima Ephesina Synodus S. Cœlestinum, Chalcedonenfis S. Leonem, Sexta Agathonem, aliæ Synodi alios Pontifices prosequutæ sunt, responsione non indiget. Qua enim ratione ex his confici poterit,

falsum esse id quod duo Concilia generalia definierunt, Concilio potestatem esse in Pontificem, ac in eum posse animadvertere, si Concilii Decretis quæ ad fidem constituendam pertinent, aut ad extirpandum schisma, aut ad reformatandam Ecclesiam in capite & in membris, parere obfirmato animo negaverit? Non inferiores honores Concilia Cæsaribus detulere: at quis hinc putet consequi, nullum ex illis potuisse à Concilio excommunicari, ubi causa legitima subfuisset? *Excommunicari*, inquam, non *suis honoribus spoliari*; quæ duæ res multum inter se distant, licet eas non raro per summam imprudentiam & imperitiam commisceant Romani Theologi. Quorsum etiam Bullæ conditor, prætermittit quinta Synodo, à Quarta ad Sextam properat? An quòd non assentiente imò invito Vigilio Pontifice habita est: Illam tamen, non secus ac quatuor priores, se venerari professi sunt Summi Pontifices, ut patet tum ex Gregorio Magno, tum ex fidei professione ab electis Pontificibus edi solita, quam habet *Liber Diurnus Romanorum Pontificum*, editus ab erudito Jesuita Garnerio. Denique quantumcumque honorificis appellationibus à Sexta Synodo cultus fuerit Agatho, ab eadem tamen judicatus & damnatus est Papa Honorius I, quem semper vocitat

*Episco-*

*Episcopum Romanum*, ex quo intelligitur non existimasse Synodum Pontificem illum ob suam hæresim dignitate Pontificia excidisse.

Hæc sunt quæ mihi Bellarminum evolvendi, circa Constantiensis Concilii Decreta occurrerunt. Summa fide ejus dicta relata sunt: de illorum robore æquilectores censebunt: quos quidem diligenter animadvertere velim, præter Florentinum Concilium, & Lateranense illud sub Leone X, nihil à Bellarmino in medium adferri quod aliquem colorem habeat, si exceperis minutiores quosdam cavillos, quos ille cùm uno loco profert, altero ipse diffilat. Horum enim Conciliorum auctoritate nixus audet dicere, Synodum Constantiensem quam admodum numerosam & generalem fatetur fuisse, *reprobata* qua parte definivit *Concilium esse supra Papam*. Ex illis verò duobus Conciliis quæ ipse pro se profert, alterum mox deserit, nempe Florentinum, cùm ab eo nihil quoad hanc rem *expresse definitum* esse agnoscit: ut nec ipse verba ulla inde proferre ausus sit, fat probè sciens nihil illic definitum esse quod Constantiensis Concilii Decreto adversetur.

Ad solum itaque Lateranense Bellarminus redactus est: atque idcirco visum est



est de illo Concilio pluribus dicere, quod palam omnibus fieret quàm nullius sit momenti ejus in hac causa testimonium. Namque, ut paucis colligamus quæ de illo huc usque dicta sunt,

1. Non fuit Concilio sua libertas.

2. Nulla ratione dici potest generale : cum vix centum interfuerint Episcopi, iique maximam partem Itali.

3. Orbis Catholici spectatissimæ Ecclesiæ illius Concilii neque initia neque decursum probaverunt.

4. Quidquid tamen sit de ipso Concilio, certè quod ex illo profertur, nec Decreti nec definitionis speciem habet : sed mera est Leonis X narratio, id pro indubitato affirmantis pro quo nullum profert argumentum quod insincerum non sit.

5. Denique ipso Bellarmino auctore, non potuerunt Lateranenses abrogare quod ab œcumenicis Conciliis (Constantiensi nimirum & Basileensi) statutum fuisse demonstravimus. Ipse enim laudat hoc axioma verè Catholicum, quod & huic Scriptioni finem imponet : *Legitimorum Conciliorum generalium Decreta in materiis fidei immutabilia sunt, nec possunt ullo modo abrogari ubi semel statuta sunt.*

F I N I S.

# ERRATA.

- pag. 14. lin. 8. *lege*, pleraque quæ
- pag. 17. lin. 1. *formide*. *lege*, *formidet*.
- pag. 20. lin. 13. *illum*. *lege*, *ullum*.
- pag. 30. lin. 4. *dirimisset*. *lege*, *diremisset*.
- pag. 38 lin. 11. *Transalpinus*. *lege*, *Trans-*  
*alpinis*.
- pag. 42. lin. 27.  *censura*. *lege*,  *censura*.
- pag. 45. lin. 13. *illustrissimi*. *lege*, *inlu-*  
*strissimi*.
- pag. 48. lin. 12. *lege*, *Decretum Ho-*  
*norii Decreto*.
- pag. 55. lin. 9. *in sequenti*. *lege*, *inse-*  
*quenti*.
- pag. 66 lin. 1 *Cathedraticos*. *lege*, *Ca-*  
*thedraticas*.
- pag. 79. lin. 29. *Vix*. *lege*, *Vox*.
- pag. 85. lin. 19. *in sequentis*. *lege*, *in-*  
*sequentis*.
- pag. 90. lin. 27. *Davensportum*. *lege*,  
*Davenportum*.
- pag. 96. lin. 3. *amor*. *lege*, *amor crevit*.
- pag. 108 lin. 8. *Ubi*. *lege*, *S. Aug. Ubi &c.*
- pag. 112 lin. 19. *Fons*. *lege*, *S. Prosper*  
*Fons &c.*
- pag. 114. lin. 2. *adde: neque ex volun-*  
*tate carnis*.
- pag. 122. lin. 17. *pro*. *lege*, *pro*.
- pag. 127. lin. 1. *propositionem*. *lege*,  
*propositiones, tamquam*.

K

pag.

## E R R A T A.

pag. 134. lin. 13. tristissimo. lege, tri-  
tissimoe.

pag. 145. lin. 19. Concilium. lege,  
Concili.

pag. 147. lin. 19. studiosis. lege, stu-  
diosi.

pag. 148. in tit. Lib. de Concil. lege,  
Lib. 2. de Concil.

pag. 157. lin. 20. ratatum. lege, ratum.

pag. 159. lin. 16. lege, communi consensu.

pag. 162. lin. 21. ad. lege, ab.

pag. 180. lin. 2. definitum. lege, defi-  
nitam.

pag. 183. lin. 12. lege, non fuisse conci-  
lium generale, vel non fuisse ab Ecclesia.

pag. 185. lin. ult. indulgentia. lege, in-  
dulgentia.

pag. 197. lin. 14. inveterescere. lege, in-  
veterascere.

pag. 200. lin. 30. Nicæum. lege, Ni-  
cæam.

302.1

99 95 3763 30











BIBLOS  
Firenze





